

O LE EKALESIA A IESU KERISO O LE AU PAIA O ASO E GATA AI • IULAI 2015

O Le Liahona



**Talatu Faapaionia: Taulaina
o le Agaga i le Faamoemoe, i. 14**

**O Mea Uma e Le'i Aveesea: O Lesona mai
le Soifuaga o le Perofeta o Iosefa Samita, i. 20**

O Auala e Ola Amiotonu ai i se Lalolagi Amioleaga, i. 26

Saunia mo le Malumalu, i. 56, 76, 78, 79



*“O lenei, ai se faalogo i a’u upu nei, ma faia e ia, ou te faatusaina o ia
i le tagata poto, ua na faia lona fale i luga o le papa:
“Ona to mai lea o uaga, ua oo mai foi tafega, ua agi mai foi o matagi, ua
pesi mai i lea fale, a e lei pau lava ia; aua ua faavaeina i luga o le papa.”*

Mataio 7:24–25



O SAVALI

- 4 Savali a le Au Peresitene Sili: Ua Lelei
Saunia e Peresitene Dieter F. Uchtdorf
- 7 Savali a Faiaoga Asiasi: O Uiga Paia o Iesu Keriso—E Loto Faamagalo ma Alofa Mutimutivale

TALA FAAALIA

- 14 Paionia: O Se Taula mo le Asō
Saunia e Elder Marcus B. Nash
Aoao pe faapefea ona avea le agaga faapaionia o se taula mo i tatou i le taimi nei.
- 20 O Le Oo Mai o le Tusi a Mamona
Saunia e Matthew S. Holland
E pei o Iosefa Samita, e te le tau manaomia se olaga atoatoa ina ia avea ai ma se meafaigaluega mamana i aao o le Atua.
- 26 Seleseleina o Tau'i o le Amiotonu
Saunia e Elder Quentin L. Cook
E mafai faapefea ona tatou olioli i tau'i o le amiotonu i o tatou aiga?
- 34 Mataupu Faalelotu ma Faalemalo
Saunia e Elder Wilford W. Andersen
Ua i ai i le Au Paia o Aso e Gata Ai se tiutetauave e avea ma tagatanuu lelei e tusa lava poo fea o loo latou nonofo ai.

MATAGALUEGA

- 8 Tusigāmanatu Konafesi Aperila 2015
- 10 O Mea ua Tatou Talitonu I Ai: E Paia Faatulagaga o le Ekalesia
- 12 Tala Fou o le Ekalesia
- 38 O Leo o le Au Paia o Aso e Gata Ai
- 80 Seia Tatou Toe Feiloai: O Tamai Mamoe ma Leoleo Mamoe
Saunia e Peresitene James E. Faust

I LE FAAVAA

Luma: Ata na tusia e Dan Burr. I totonu o le faavaa pito i luma: Ata na pueina e Robbie George/National Geographic Creative. I totonu o le faavaa i tua: Ata na Pueina e [o le a oo mai] by Richard M. Romney.



42 Faatumulia i le Ola ma le Malosi

Saunia e Randal A. Wright
Faatino lenei faiga i lou olaga ma maua ai se soifua maloloina sili atu, sili atu le malosi, ma musumusuga e sili atu.

46 O Poutu o le Malosi i Hanikeri

Saunia e McKelle George
O le talalelei a Iesu Keriso e aumaia ai le faamoemoe, faatuatua, ma le malosi i le autalavou matutua o Hanikeri.



Vaai pe mafai ona e mauaina le Liahona o loo natia i le lomiga lenei. Faateite: Faauma le laina: "Ou te fia vaai i le malumalu. . ."



48 O Iesu Keriso — Lo Tatou Aloalii o le Filemu
 Saunia e Elder Russell M. Nelson
Ua na o le pau lea o le punavai o le filemu moni ma tumau o Iesu Keriso.

51 Tuusao i le Mataupu

52 Ua Saunia mo le Mauaina o le Perisitua Mekisateko?
Aoao atili e uiga i le tautoga ma le feagaiga o le perisitua

56 Saunia e Ulufale Atu i le Maota o le Alii
 Saunia e Elder Kent F. Richards
A o e faateleina lou tulaga o le matua faaleagaga, o le a e manao e sauniuni mo le ulu atu i le malumalu.

60 Sailia o se Auala e Faamagalo Atu Ai
 Saunia e Bonnie Brown
E faapefea ona e faamagalo atu pe a foliga mai e le mafai ona e tuu ese le tiga?

62 Pepa Lautele o I Ai Se Savali: Faasalalauina o le Susulu o le La

63 Musika i Lo'u Olaga
 Saunia e Sabrina de Sousa Teixeira
Sa ou faatoilaloina lo'u fefe e faasoa atu la'u taleni.



64 Sa Ou Talanoa i le Atua e pei o se Uo
 Saunia e Elder Juan A. Uceda
E mafai ona avea le Tama Faalelagi ma au uo mamae. Tatalo atu ia te Ia ma o le a Ia faalogo.

66 O le Malaga a Anna
 Saunia e Jessica Larsen
Ina ua taunuu Anna i Amerika, na te le'i iloa se tasi ma e leai se isi na tautala i lana gagana. Ona ia manatua lea o le fautuaga a lona tina ina ia tatalo.

70 E Tali Mai le Tama Faalelagi i Au Tatalo.
 Saunia e George R.
Sa ou iloaina e mafai ona ou fesoasoani i lo'u tausoga e ala i le anapogi ma le tatalo.

71 Musika: Mulimuli Mai ia te A'u
 Saunia e John Nicholson ma Samuel McBurney

72 Taimi o Tusitusiga Paia: O Le Faataoto i Taleni
 Saunia e Jean Bingham

74 O La Tatou Itulau

75 Kata o Malumalu

76 O A Mea Tatou te Faia i le Malumalu?
 Saunia e Carolyn Colton

78 Ou Te Alu i Ai i Se Aso
 Saunia e Mary N.
Sa ou saunia e alu i le malumalu.

79 Molimau Faapitoa: E faapei pe afai ou te alu i totonu o le malumalu?
 Saunia e Elder Neil L. Andersen

**IULAI 2015 VOL. 39 NU. 7
O LE LIAHONA 12567 890**

O Le Lomiga Faamaonia Faa-Samoa a le Ekalesia
a lesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson,
Henry B. Eyring, Dieter F. Uchtdorf

O Le Korama a Aposetolo e Toasefululua:

Boyd K. Packer, L. Tom Perry, Russell M. Nelson,
Dallin H. Oaks, M. Russell Ballard, Richard G. Scott,
Robert D. Hales, Jeffrey R. Holland, David A. Bednar,
Quentin L. Cook, D. Todd Christofferson, Neil L. Andersen

Faatonu: Craig A. Cardon

Fautua: Mervyn B. Arnold, Christoffel Golden,
Larry R. Lawrence, James B. Martino, Joseph W. Sitati

Pule Faatonusili: David T. Warner

Faatonusili o le Lagolago mo Aiga ma

Tagata o le Ekalesia: Vincent A. Vaughn

Faatonusili o Mekasini a le Ekalesia: Allan R. Loyborg

Pule o Mea Tau Pisinisi: Garff Cannon

Pule Faatonutonu: R. Val Johnson

Pule Faatonutonu Lagolago: Ryan Carr

Lagolago o Lomiga: Lisa Carolina López

Au Tusitusi ma Faatonutonu: Brittany Beattie,
David Dickson, David A. Edwards, Matthew D. Flitton,
Lori Fuller, Garrett H. Garff, LaRene Porter Gaunt, Mindy
Anne Leavitt, Michael R. Morris, Sally Johnson Odekir,
Joshua J. Perkey, Jan Pinborough, Richard M. Romney,
Paul VanDenBerghe, Marissa Widdison

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamanu: Jeanette Andrews, Fay P. Andrus,
Mandie M. Bentley, C. Kimball Bott, Tom Child, Nate
Gines, Colleen Hincley, Eric P. Johnsen, Susan Lofgren,
Scott M. Mooy, Mark W. Robison, Brad Tearing, K. Nicole
Walkenhorst

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Connie Bowthorpe Bridge, Julie Burdett,
Katie Duncan, Bryan W. Gygi, Denise Kirby, Ginny J.

Nilson, Gayle Tate Rafferty

Tailolomi: Jeff L. Martin

Faatonusili Lolomiga: Craig K. Sedgwick

Faatonusili o le Tufatufaga: Stephen R. Christiansen

Mo le okaina o mekasini, alu i le store.lds.org po o le
Falelusi Tutotonu i Pesega. Telefoni 64127. Totogi o le
Mekasini: \$0.55 (Samoa) i le kopi. Totogi mo le Tausaga
Atoa \$6.60 (Samoa).

Auina atu tusitusiga ma faafesili i luga o le

initoneti i le liahona.lds.org: pe meli mai i le *Liahona*,
Rm. 2420, 50 E. North Temple, Salt Lake City, UT 84150-
0024, USA; po o le i-meli: liahona@ldschurch.org.

O Le *Liahona* (o lona uiga i le Tusi a Mamona o le
"tapasa" po o se "faatonuala") e lomia i le faa-Alepania,
Aminia (Sasae), Pisilama, Palekeria, Kemupotia, Sepuano,
Saina, Kalaotia, Siekisolovakia, Tenimaka, Take, Iglisi,
Esitonina, Fiti, Finelani, Farani, Siamani, Eleni, Hanikeri,
Initu, Iselani, Initonesia, Italia, Iapani, Kiripati, Korea,
Lativia, Litunia, Malakasa, Masela, Monokolia, Nouei,
Polani, Potukale, Romania, Rusia, Samoa, Saina
(ua faafaigofieina), Silovenia, Sipaniolo, Suetena,
Swahili Tagaloka, Tahiti, Tai, Toga, Iukureini, Urutu,
ma Viatename. (E eese lava gagana.)

© 2015 Puletaofia e le Intellectual Reserve, Inc. Ua taofia
aia tatau uma. Lomia i le lunaita Setete o Amerika.

E mafai ona kopi tala ma ata o le *Liahona* mo le toe
faaogaina i lotu po o le aiga ae ia le faia ai ni pisinisi. E
le tatau ona kopi ni tala po o ni ata pe afai o faasa mai i
le laina o loo ta'ua ai le e ona lea faatufugaga. Auina atu
fesili e uiga i le puletaofia i le Intellectual Property Office,
50 East North Temple Street, Salt Lake City, UT 84150,
USA; i-meli: cor-intellectualproperty@ldschurch.org.

For Readers in the United States and Canada:

July 2015 Vol. 39 No. 7. O LE LIAHONA (USPS 311)
Samoa (ISSN 1045-0947) is published monthly by The
Church of Jesus Christ of Latter-day Saints, 50 East North
Temple, Salt Lake City, UT 84150. USA subscription price
is \$10.00 per year; Canada, \$12.00 plus applicable taxes.
Periodicals Postage Paid at Salt Lake City, Utah. Sixty days'
notice required for change of address. Include address
label from a recent issue; old and new address *must* be
included. Send USA and Canadian subscriptions to Salt
Lake Distribution Center at address below. Subscription
help line: 1-800-537-5971. Credit card orders (Visa,
MasterCard, American Express) may be taken by phone.
(Canada Poste Information: Publication Agreement
#40017431)

POSTMASTER: Send all UAA to CFS (see DMM 707.4.12.5).
NONPOSTAL AND MILITARY FACILITIES: Send address
changes to Distribution Services, Church Magazines,
P.O. Box 26368, Salt Lake City, UT 84126-0368, USA.

Manatu Mo Afiafi Faaleaiga

*O leni lomiga o loo aofia ai tusiga ma gaoioiga e mafai ona faaoga mo afiafi faaleaiga.
O manatu nei e lua.*



"O Le Oo Mai o le Tusi a Mamona,"

itulau e 20: E ui i ona vaivaiga faaletagata
lava ia, na avea Iosefa Samita ma se mea-
faigaluega i aao o le Alii a o ia taumafai e
mulimuli i le Faaola. E mafai foi ona tatou
avea ma ni meafaigaluega i aao o le Alii pe
a tatou taumafai e faaleleia ma avea atili
faapei o lesu Keriso. Mafaufau e uiga i le
faatulagaina ma le agaga tatalo o ni sini
faaletagata lava ia ma i le avea ai o se aiga.
E mafai ona e talanoaina ia malosiaga ma
taleni a tagata taitoatasi ma talanoaina
auala e mafai ona e faaogaina ai mea e
te malosi ai e fesoasoani ai i le tasi ma le isi
e ausia sini taitasi. Talanoa e uiga i le auala
e mafai ona e faaogaina ai mea

e te malosi ai e faalatele ai le galuega a
le Alii, e pei ona faia e le Perofeta o Iosefa.

"O Le Malaga a Anna,"

itulau 66: Mafaufau e fesoasoani i lou aiga ia iloa
ma faasaoina tala mai le talafaasolopito
o lou aiga. Atonu e te faia ni fuafuaga
e fai ai se faatalanoaga o se tama po
o se tina matua, faitau api talaaga ma
isi pepa o faamatalaga, po o le saili i le
FamilySearch.org. I se afiafi faaleaiga e
sosoo ai, faasoa atu tala ma talanoaina
pe na faapefea ona avea ou tuua ma
ni toa. Mafaufau e faaopopo ia tala i
le vaega o le "Manatua" i luga o le
FamilySearch.org.

I LAU GAGANA

O loo maua le *Liahona* ma isi anomea o le Ekalesia i le tele o gagana
i le languages.lds.org.

AUTU I LENEI LOMIGA

E ta'u mai e numera le itulau muamua o le tusiga.

Aiga, 26, 64, 66

Alofa mutimutivale, 7, 20

Amiotonu, 26

Anapogi, 70

Faaaliga, 42

Faamagaloga, 7, 51, 60

Faamaoni, 38

Faamoemoe, 14, 46

Faatuatuva, 14, 20, 38, 40,

41, 63, 66, 70

Faatulagaga o le Ekalesia,
10

Faiaoga asiasi, 80

Faiaoga o aiga, 51, 80

Fiafia, 26

Filemu, 26, 40, 48

Galuega, 4

Iesu Keriso, 48

Iosefa Samita, 20

Liua, 39

Lotogatasi, 14

Malo, 34

Malumalu, 56, 75, 76,
78, 79

Manatu lelei, 4

Manuia, 26

Paionia, 4, 14, 66

Perisitua, 52

Soifua Maloloina, 42

Taleni, 63, 72

Tapuaiga, 34

Tatalo, 64, 66, 70

Tofotofoga, 20, 40, 66, 70

Tusi a Mamona, 20

Tusitusiga Paia, 20, 40



**Saunia e Peresitene
Dieter F. Uchtdorf**

Fesoasoani Lua i le
Au Peresitene Sili

UA Lelei

Ao ou mafaufau e uiga i o tatou talaaga o paionia, o se tasi o mea e aupito sili ona faamomoi logo e oo mai i le mafaufau o le viiga “O Mai O Mai, Outou le Au Paia” (*Viiga*, nu. 17). O i latou na faia le malaga umi i le Vanu o Sate Leki e masani ona usuina lenei pese i le taimi o la latou savaliga.

Ou te matua malamalama lelei e le'i lelei mea uma i nei Au Paia. Sa mafatia i latou i ma'i, vevela, vaivai, malulu, fefe, fia aai, tiga, masalosalo, e oo lava i le oti.

Ae e ui lava e i ai mafuaaga uma e alalaga ai, “Ua le lelei mea uma” na latou atiina ae se uiga faaalua e na o lo tatou fiafia lava i ai i le aso. Sa latou vaai i tua atu o o latou faigata i faamanuiaga e faavavau. Sa latou faafetai i o latou tulaga. E ui lava i se faamaoniga i le isi itu, sa latou usuina ma le talitonuga uma o o latou agaga, “Ua lelei!”

O a tatou viiga mo le au paionia e leai se taua pe afai e tatou te le manatunatu ai ia i tatou lava. Ou te ta'ua ni nai o latou uiga e musuia ai au a o ou mafaufau loloto i a latou osigataulaga ma tautinoga.

Agaalofa

O paionia na tausia le tasi ma le isi e aunoa ma talaaga faaagafesootai, tamaoiga, pe faaupufai. E tusa lava pe na faatuai ai lo latou alualu i luma, maua ai faafitauli, po o lona uiga o le taulaga o le tagata lava ia ma le galue malosi, na latou fesoasoani i le tasi ma le isi.

I lo tatou lalolagi e naunau i sini ma manatu faapito, e mafai e faamoemoega a tagata taitoatasi po o pati ona sili le taua nai lo le tausiaina o isi po o le faamalosi o le malo

o le Atua. I le lalolagi i aso nei, o le ausiaina o sini faaupufai e mafai ona foliga mai o se fuataga lea o lo tatou taua.

O le faatulagaina ma le ausiaina o sini e mafai ona avea ma se mea matagofie tele. Ae a faapea ua manuia le ausiaina o sini i le faagaloina, le amanaiaina, po o le faatiga i isi, atonu e taua tele le tau o lena tulaga manuia.

Sa tausia e le au paionia i latou na i ai i lo latou kamupani, ae na latou manatu foi ia i latou na mulimuli mai ia i latou, i le totona lea o mea toto mo le solo o taavale toso na mulimuli mai.

Sa latou iloa le malosi o le aiga ma uo. Ona sa latou faalagolago le tasi i le isi, sa oo ina latou malolosi. Na avea o ni uo ma aiga.

Na auauna atu le au paionia i le avea ai ma se faamanatu lelei o le mafuaaga e tatau ai ona tatou sosola ai mai le faaososoga e vavaeeseina i tatou, ma, nai lo lena, e aapa atu e fesoasoani le tasi i le isi ma maua le agaalofa ma le alofa mo le tasi i le isi.

Galuega

“O mai, o mai, outou le Au Paia.”

O lenei fuaitau na avea ma se vii i le au malaga vaivai. E faigata ona vaai faalemafaufau i le malosi na galulue ai nei agaga maoae. O le savavali ua na o se tasi o mea e sili ona faigofie na latou faia. Sa tatau ona latou toso faatasi e saunia ai meaai, lipea taavale solofanua, tausia manu, auauna atu i e mama'i ma vaivai, saili ma ao mai le vai, ma puipuia i latou lava mai le matautia o le mamafa o le elemene ma le tele o ala faigata o le vao.



Latou te ala ae i luga i taeao taitasi ma faamoemoega ma sini ua faamaninoina ma malamalama ai tagata uma: ina ia auauna atu i le Atua ma o latou uso a tagata, ma ia taunuu i le Vanu o Sate Leki. I aso uma o na faamoemoega ma sini sa manino ia te i latou; sa latou iloa le mea e tatau ona latou faia ma sa taua le alualu i luma i aso taitasi.

I o tatou taimi—ona o le tele o mea tatou te mananao ai e faigofie ona i ai i o tatou lima—o se faaosoosoga le liliu ese pe fiu i soo se taimi e foliga mai ai o loo i ai ni nai patupatu laiti po o le malifa e foliga mai ua tu sao i luga i o tatou luma. I na taimi, e mafai ona musuia ai i tatou e mafaufau i na alii, tamaitai ma tamaiti o e sa le mafai e ma'i, faigata, tiga, e oo lava i le oti ona taofia i latou mai lo latou ala filifilia.

Sa aoaoina e le au paionia o le faia o mea faigata e faalolotoina ma faamalasia ai le tino, mafaufau, ma le agaga; faalauteleina lo latou malamalama i lo latou natura paia; ma faateleina ai lo latou agalelei atu i isi. O lenei uiga na faamalasia ai o latou agaga, ma aveai ma se faamanuiaga ia i latou ina ua leva ona mavae atu la latou savaliga i le salafa o le laufanua valevalenoa ma le mauga.

Manatu lelei

Pe a pepese le au paionia, na latou faaleoina se lesona lona tolu: “Galulue fiafia.”

O se tasi o tulagaese maoae o o tatou taimi, ua faamanuiaina i tatou lava i le tele o mea ae e mafai lava ona tatou matuai le fiafia lava. O mea ofoofogia o le tamaoaiga ma tekinolosi ua lofituina ai i tatou ma ufitiaina i tatou i le saogalemu, faafiafiaga, faamalieina, vave ona faafiafiaina, ma le faigofie. Ae o mea uma ua siomia ai i tatou ua tatou vaaia ai le tele o le le fiafia.

O paionia, na ositaulagaina le tele o mea, na leai ni meatotino ma fiaaai e oo lava i mea e sili ona manaoimia e ola ai. Sa latou malamalama e le oo mai le fiafia ona o le tulaga laki pe faafuaseia. E mautinoa lava e le maua mai i le faataunuuina o o tatou moomooga uma lava. E le maua le fiafia mai le tulaga faaletino. E sau mai i totonu—e tusa lava po o le a se mea o loo tupu i lo tatou siosiomaga.

Na silafia e le au paionia lenei mea, ma i lenei agaga na latou maua le fiafia i tulaga uma ma tofotofoga uma—e oo lava i na tofotofoga e oo atu i lalo ma faalavelavea ai le loloto o o latou agaga.

Tofotofoga

Tatou te toe tepa i tua i nisi taimi i mea na onosaia e paionia ma fiafia ma faapea, “Faafetai tele ou te lei ola i lenei taimi.” Ae ou te mafaufau i na paionia lototetele, pe a mafai ona latou vaai ia i tatou i aso nei, atonu latou te le faaaluaia le popolega lava lea e tasi.

AOAO ATU MAI LENEI SAVALI

Atonu e te manao e amata i le usuina o le pese “O Mai, O Mai, Outou le ‘Au Paia” (*Viiga*, nu. 17) ma i latou o loo e asia. E mafai ona e faasoa atu se aafiaga a oe po o se tasi e te iloa ina ua faaogaina mataupu faavae o le agalelei, galue, po o le faamoemoega. Pe a uunaia ai, e mafai ona molimau atu i faamanuiaga e maua mai le ola ai i nei mataupu faavae ma folafola atu ia i latou o loo e asia e mafai ona latou maua faamanuiaga faapena.

E ui ina ua suia taimi ma tulaga, e lei suia mataupu faavae mo le feagai ai ma tofotofoga ma le manuia o le ola faatasi o se nuu e manatu alofa ma faamanuiaina i lalo o le Atua.

Mai le au paionia e mafai ona tatou aoao e maua le faatuatua ma faalagolago i le Atua. E mafai ona tatou aoaoina le agaalofa mo isi. E mafai ona tatou aoaoina o le galuega ma le galue malosi e faamanuiaina i tatou e le gata i la le tino ae faapea foi le faaleagaga. E mafai ona tatou aoaoina o le fiafia e avanoa i ai i

AUTALAVOU

Tausia o se Faamaumauga

Ua faatusatusa e Peresitene Uchtdorf o tatou aso i taimi o le au paionia. E ui e te le'i sopoiaina laufanua valevalenoa, e sili atu ona e pei o le au paionia nai lo le mea atonu e te mafaufau i ai! E mafai foi ona e faaali atu le agalelei, galue malosi, ma manatu lelei. Ma e pei lava ona tatou iloa na faaalua e le au paionia nei uiga auau mama ona o faamaumauga na latou tausia, e mafai foi e au fanau ona iloa oe e ala i lau api o talaaga.

Faaalu ni nai minute e tusi ai sina mea itiiti e uiga ia te oe lava i lau api o talaaga. E mafai ona e tusia e uiga i mea faaleagaga, e pei o le auala na maua ai lau molimau ma faatoilaloina ai luitau i le fesoasoani a le Tama Faalelagi. E mafai foi ona e fesoasoani i fanau a fanau o fanau a lau fanau (o e atonu e faitau i lau api o talaaga i se aso!) ia iloa pe na faapei aso taitasi o lou olaga. O a ni galuega faatino o loo e faia i le aoga? O a ni foliga o lou potu? O le a lau manatuaga e fiafia i ai e uiga i lou aiga?

A o amata ona e tusitusi sina vaega itiiti i aso uma, o le a le gata o le a mafai ona e tagai manino atu i le auala e fesoasoani ai le Tama Faalelagi ia te oe i lou olaga i aso taitasi, e pei ona la taialaina le au paionia, ae o le a e tuua foi se talatuu mo lau lava fanau i le lumanai.

tatou e tusa lava po o a o tatou tulaga.

O le auala sili e faaalua ai lo tatou agaga faafetai i paionia o le faaalua lea o o tatou lava olaga i le faatuatua i poloaiga a le Atua, agaalofa ma le alofa mo o tatou uso a tagata, ma le galue malosi, faamoemoe, ma le olioli na faaalua e le au paionia i o latou lava olaga.

A o tatou faia faapea, o le a mafai ona tatou aapa atu i le fiasefulu o taimi, uu lima o na paionia mamalu i o tatou lima, ma faaopoopo atu o tatou leo ia i latou a o tatou pepese faatasi ma i latou: "Ua lelei! Ua Lelei!" ■

TAMAITI

Mulimuli i Faataitaiga a Paionia

Ua faasoa mai e Peresitene Uchtdorf ni nai auala na faaalua ai e paionia le alofa mo le Tama Faalelagi. E mafai ona e mulimuli i la latou faataitaiga. O ni nai faataitaiga nei e te amata ai:

AGAALOFA

- Tusi se tamai tusi agalelei po o le faia o se meaai manaia mo se tasi o loo faanoanoa.
- Fesoasoani i se tasi o le vasega i ana meaaoga.

GALUEGA

- Faatu se sini. Fai se mea i aso uma o le masina leni e fesoasoani ai ia te oe ia ausia lau sini.
- Fesoasoani i ou matua e fai le meaai o le afiafi.

MANATU LELEI

- Fai se lisi o mea fiafia se 10 i lou olaga.
- Ataata i tagata uma e te vaai i ai.

Ia suesue ma le agaga tatalo lenei savali ma saili ia iloa mea e faasoa atu. O le a mafai faapefea e le malamalama i le soifuaga ma matafaioi a le Faaola ona faateleina lou faatuatua ia te Ia ma faamanuaina ai i latou o loo e tausia e ala i le faiaoga asiati? Mo nisi faamatalaga, alu i le reliefsociety.lds.org.

O Uiga Paia o Iesu Keriso: E Loto Faamagalo ma Alofa Mutimutivale

O se vaega lenei o se faasologa o Savali a Faiaoga Asiati e faaalua ai uiga paia o le Faaola.

O le malamalama faapea o Iesu Keriso e loto faamagalo ma alofa mutimutivale ia i tatou e mafai ona fesoasoani ia i tatou e faamagalo atu ma tuu atu le alofa mutimutivale i isi. “O Iesu Keriso o lo tatou Faataitaiga,” o le saunoaga lea a Peresitene Thomas S. Monson. “O lona soifuaga o se talatuu o le alofa. O ē mamai na Ia faamaloloina, o ē mafatia na Ia siitiaina, o ē agasala na Ia faaolaina. I le faaiuga, na fasiofia o Ia e tagata leaga. Ae o loo tatagi pea mai le mauga o Kolokota upu nei: ‘Lo’u Tamā e, ia e faamagaloina atu ia te i latou; aua ua latou le iloa le mea ua latou faia’—o le faailoaga silisili lea i la le tino o le agalelei ma le alofa.”¹

Afai tatou te faamagalo atu i isi i a latou agasala, o le a faamagaloina foi i tatou e lo tatou Tama Faalelagi. Ua finagalo Iesu ia i tatou ina “ia mutimuti vale lo outou alofa, pei ona alofa mutimuti vale o lo outou Tama” (Luka 6:36). “O le faamagaloga mo a tatou



agasala e o mai faatasi ma tuutuuga,” o le saunoaga lea a Peresitene Dieter F. Uchtdorf, Fesoasoani Lua i le Au Peresitene Sili. “E tataua ona tatou salamo. . . . Pe sa tatou le faalatalata atu ea i se tasi taimi po o le isi ma le agamalu i le nofoa o le alofa ma aoi atu mo le alofa tunoa? Pe sa tatou le i momoo ea i le malosi atoa o o tatou agaga mo le alofa mutimutivale—ina ia faamagaloina mo mea sese ma agasala sa tatou faia? . . . Ia faatagaina le Togiola a Keriso e suia ma faamalolo lou loto. Ia fealofani. Ia faamagalo e le tasi le isi.”²

Mau Faapoopo

Mataio 6:14–15; Luka 6:36–37; Alema 34:14–16

FAAMATALAGA

1. Thomas S. Monson, “Alofa- o le Ute o le Talalelei,” *Liahona*, Me 2014, 91.
2. Dieter F. Uchtdorf, “O Le E Alofa Atu e Alofaia Mai,” *Liahona*, Me 2012, 70, 75, 77; faamamafa i le uluai kopi.
3. Jeffrey R. Holland, “O Mataupu Tau i le Filemu o le Malo,” *Liahona*, Ian. 1997, 99.



Faatuatua, Aiga, Toomaga

Mai Tusitusiga Paia

“Ia tatou faamagalo atu e pei ona faamagaloina i tatou,” o le tala lea a Elder Jeffrey R. Holland o le Korama a Aposetolo e Toa-sefululua.³ Ua faailoa mai e le tala o le atalii faamaumau oa i itu uma e lua o le faamagalo atu: ua faamagaloina se tasi o atalii ma le isi atalii o loo taumafai e faamagalo atu.

O le atalii laitiiti na ave lona tofi, sa vave ona faaalu, ma ina ua tulai mai se oge, sa ia galue e fafaga puua. Ua faapea mai tusitusiga paia “ona atamai ai lea o ia”, sa ia toe foi atu ma fai atu i lona tama sa le’i agavaa o ia e ave ma ona atalii. Ae na faamagalo o ia e lona tama ma na tape se tamai povi peti mo se taumafataga. O le atalii matua na toe foi mai i le galue ai i le fanua ma sa amata ona ita. Sa ia faamanatu atu i lona tama sa ia auauna atu i le tele o tausaga, sa lei solia se poloaiga, peitai “e te lei aumai lava se tamai ’oti ma a’u, matou te olioli ai ma a’u uo.” Na tali atu lona tama, “Tā e, ta te nonofo pea ma oe, o au mea uma foi, o au ia. Ua tataua foi ona tatou fiafia ma olioli: aua o lou uso lona na oti, a ua toe ola mai; na le iloa foi, a ua maua” (tagai Luka 15:11–32).

Mafaufau i le Mea Lenei

E mafai faapefea e le faamagaloina ona faamanuaina le tagata e faamagalo atu?

TUSIGĀMANATU O LE KONAFESI O APERILA 2015

“O le mea ua fai atu ai A’u o le Alii ua ’Ou fai atu ai; . . . pe i lo’u lava leo po o i le leo o a’u auauna, ua tutusa lava” (MF&F 1:38).

A o e iloiloina le konafesi aoao ia Aperila 2015, e mafai ona e faaogaina itulau nei (ma Tusigāmanatu o le Konafesi i lomiga i le lumanai) e fesoasoani ai ia te oe e suesue ma faaoga aoaoga talu ai nei a perofeta ma aposetolo soifua ma isi taitai o le Ekalesia.

FOLAFOLAGA FAAPEROFETA



O Faamanuiaga e Le Mafaatauina o le Malumalu

“A tatou o i le malumalu, a tatou manatua a tatou feagaiga tatou te osia iina, o le a sili ona tatou mafaia ona faatoilalo [a tatou] faaosoosoga ma onosaia o tatou tofotofoga. O totonu o le malumalu e mafai ona tatou maua ai le filemu.

“O faamanuiaga o le malumalu e le mafaatauina. O se tasi ou te matua faafetai ai lava i aso uma o lo’u olaga, o lea na ma maua ai ma lo’u toalua pele, o Frances a o ma tootutuli i se fatafaitaulaga paia ma osia feagaiga e noatia faatasi ai ma’ua mo le faavavau

atoa. E leai se faamanuiga e sili atu ona taua ia te au, nai lo le filemu ma le mafanafana ua ou maua mai le malamalama ua ou maua, o ia ma a’u o le a toe mafuta faatasi.

“Tau ina ia faamanuia i tatou e lo tatou Tama Faalelagi ia tatou maua le agaga o le tapuai i le malumalu, ia tatou usiusitai i Ana poloaiga, ma ia tatou mulimuli ma le faaeteete i laasaga o lo tatou Alii ma le Faola, o Iesu Keriso.”

Peresitene Thomas S. Monson, “Faamanuiaga o le Malumalu,” *Liahona*, Me 2015, 93.

MATAUPU FAVAE UA FAAMAMAFAINA



O MAATULIMANU O LE SAOLOTOGA O TAPUAIGA

“A o tatou savalia le ala o le saolotoga faaleagaga i nei aso e gata ai, e tatau ona tatou malamalama o le faaogaina ma le faamaoni o lo tatou faitalia, e faalagolago lea i le i ai o lo tatou saolotoga o tapuaiga. . . .

“E fa maatulimanu o le saolotoga o tapuaiga e tatau ia i tatou o le Au Paia o Aso e Gata Ai ona faalagolago i ai ma puipuia.

“Muamua o le saolotoga e talitonu ai. E leai se tasi e tatau ona faitioina, sauaina, pe osofaia e tagata po o malo foi, mo mea ua ia talitonu i ai e uiga i le Atua. . . .

“O le maatulimanu lona lua . . . o le saolotoga e faasoa atu lo tatou faatuatuaga ma talitonuga i isi. . . .

“O le maatulimanu lona tolu . . . o le saolotoga lea e faatuina ai faalapotopotoga faalelotu, se lotu, e tapuai filemu ai faatasi ma isi. . . .

“O le maatulimanu lona fa . . . o le saolotoga lea e ola ai i lo tatou faatuatuaga—faaogaina saoloto o lo tatou faatuatua e le na o le fale ma le falesa ae faapea foi i nofoaga faitele.”

Elder Robert D. Hales o le Korama a Aposetolo e Toasefululua, “Faasaina o le Faitalia, Puipuia o le Saolotoga o Tapuaiga,” *Liahona*, Me 2015, 112.

“O LE AIGA: O SE FOLAFOLAGA I LE LALOLAGI”




“E tolu mataupu faavae o loo aoao mai i le folafolaga o te manatu e matuai manaomia ai lava ni tagata e puipuia ma le mausali. . . .

“. . . la tatou fesoasoani i le fausia o le malo o le Atua i le tulai i luga ma le lototoa ma avea ma tagata e puipuia le faaiipoipoga, tulaga faamataua, ma le aiga. E manaomia i tatou e le Atua ia avea ma autau lotototoa, tumau, ma lē mafaagaetia o le a puipuia Lana fuafuaga ma aoao atu Ana upumoni i augatupulaga o i le lumanai.

Bonnie L. Oscarson, peresitene aoao o Tamaitai Talavou, “O Tagata e Puipuia le Folafolaga mo Aiga,” *Liahona*, Me 2015, 15, 16.


Mo nisi tusiga e faatatau i faaiipoipoga ma aiga mai le sauniga aoao a tamaitai o le konafesi ia Aperila 2015, tagai ia Cheryl A. Esplin, “Faatumu o Tatou Aiga i le Malamalama ma le Upumoni,” 8, ma Carole M. Stephens, “O Le Aiga e Ou Le Atua,” 11.



1. O le faaiipoipoga i le va o se alii ma se tamaitai.



2. O matafaioi a tina ma tama.



3. O le tulaga paia o le aiga.



TALA MAOAE MAI LE KONAFESI

O le a se mea e sili ona pueina lo tatou mafaufau nai lo se tala maoae? O tala nei e tolu mai le anoanoai o tala na faasoaina i le taimi o le konafesi:

- I le faataoto o le lūlū saito, o fea o ituaiga o palapala e te i ai? E faapefea e le iloaina o lena mea ona suia ai lou olaga? —Tagai Dallin H. Oaks, “O Le Faataoto o le Lūlū Saito,” 32.
- O a ni aafiaga faamomoiloto na fesoasoani i se tina talavou se toatasi e toe foi i le talalelei a Iesu Keriso? —Tagai Rosemary M. Wixom, “Toe Fo’i i le Faatuatua,” 93.
- Na faapefea ona faaleleia e se tala ofoofogia a ni auso se toalua o e na noatia i se pa tifato lo tatou malamalamaaga e uiga i le Togiola a Iesu Keriso? —Tagai Jeffrey R. Holland, “Pe a Faatasia le Faamasino Tonu, Alofa ma le Alofa Mutimutivale,” 104.

Ina ia faitau, matamata, pe faalogologo foi i lauga o le konafesi aoao, asiasi ane i le [conference.lds.org](https://www.lds.org/conference).

E PAIA LE FAATULAGAGA O LE EKALLESIA

O tagata fou o le Ekalesia e masani ona faalogo i faaupuga latou te lei faalogo muamua i ai: ki o le perisitua, le vaetofiaina, o le faaeega o lima, o le papatisoga mo e ua maliliu, o le Mutuale, Aualofa, ma isi mea faapena. Ma ua latou faalogo i faaupuga masani e faaaoga i ni auala e le masani ai: tiakono, peteriaka, epikopo, fesoasoani, faamanatuga, vala-auga, faamalologa, molimau, sauniga, ma le tele o isi mea.

Afai e te mauaina oe lava i lena tulaga, aua e te popole. O le tele o lou auai atu i le lotu, suesue i tusitusiga paia ma anomea o lesona, ma fegalegaleai ma tagata o le Ekalesia,

O LE FAAVAE O APOSETOLO MA PEROFETA

“O lenei e le toe tagata ese outou, po o e ua aumau, a ua nuu faatasi ma le au paia, o le aiga foi o le Atua;

“O loo ua atiina ae i luga o le faavae o le au aposetolo, atoa ma le au perofeta, o le maa tulimanu o Iesu Keriso lava lea.”

Efeso 2:19–20

o le lelei foi lena o lou malamalama ai i nei faaupuga. I le taimi nei, aua nei faatuai e fesili atu i tagata o lau uarota po o le paranesi; o le a latou fiala e faamatala mai soo se mea e leai se uiga ia te oe.

E taua faaupuga faapenei aua e atagia mai ai aoaoga faavae o le Ekalesia, aiaiga, faiga, ma faatulagaga, lea e sau mai tusitusiga paia ma faaaliga i perofeta o aso nei. E taitai e le Faola Lana Ekalesia i le taimi nei e ala i le faaali mai o Lona finagalo i le Au Peresitene Sili (le Peresitene o le Ekalesia ma ona fesoasoani e toalua) ma le Korama a Aposetolo e Toasefululua. Ua faatulagaina le Ekalesia i le taimi nei e taua i le ala lava lea e tasi na faatulagaina ai e le Alii a o Ia i ai i le lalolagi (tagai i le Mataupu Faavae o le Faatuatua 1:6). E pei lava o taimi faatusitusiga paia, tatou te maua perofeta, aposetolo, sui o le Fitugafulu,

o faifeautalai o e o atu taitoalua, ma epikopo ma isi taitai i le lotoifale.

O i latou uma o e auauna atu i le Ekalesia o ni volenitia. Ua valaauina i latou (talosagaina e auauna atu i) e ala i musumusuga a o latou taitai. O le a i ai se taimi o le a tuuina atu ai ia te oe se valaauga—o se tiutetauave, o se avanoa e auauna atu ai. A o e taliaina ma le naunautai ma faataunuuna i le mea sili e te mafaia, o le a faamanuiaina e le Alii au taumafaiga e auauna atu i Ana fanau. Tusa lava po o le a lou talaaga, e mafai ona e saofaga atu meaalofa faaleagaga taua. I le aveai ai o se tasi o le Ekalesia, o outou o se vaega o le “tino o Keriso” (tagai i le 1 Korinito 12). O lau saofaga e taua i le faagaioiga o le Ekalesia. ■

Mo nisi faamatalaga, tagai i le Moronae 6; Mataupu Faavae ma Feagaiga 20; ma le “Faatulagaga o le Ekalesia” i le [lds.org/topics](https://www.lds.org/topics).

O taitai i lau uarota e auauna atu i se au peresitene (o se peresitene ma fesoasoani e toalua):



O le epikopo ma ona fesoasoani e toalua e fausia ai le au epikopo ma pulefaamalumu i le uarota.



O le au peresitene o le Aualofa e auauna atu i tamaitai i le uarota ma fesoasoani e faamalolosi o latou aiga.



O le au peresitene o le korama a toaina ma le taitai vaega o faitaulaga sili e auauna atu i alii o le uarota ma fesoasoani e faamalolosi o latou aiga.



E auauna atu le au peresitene o le Peraimeri i fanau, ma o au peresitene o Alii Talavou ma Tamaitai Talavou e auauna atu i le autalavou i tausaga e 12–18.



O le au peresitene o le Aoga Sa e vaaia vasega o le Aoga Sa ma fesoasoani ia faaleleia atili le aoao mai ma le aoao atu o le talalelei i le uarota.

TALA FOU O LE EKALEZIA

Asiasi i le news.lds.org mo se faaopoopoga o tala fou ma mea e tutupu i le Ekalesia.



Galuega Alofa a le AAG: 30 Tausaga o Auaunaga

E le fou le mataupu faavae o le auauna atu i o tatou uso a tagata. I tisipenisione uma, ua tautino atu le Ekalesia e fesoasoani i e matitiva ma lē tagolima.

I le tolusefulu tausaga talu ai, i le aso 27 o Ianuari, 1985, sa faaitaia lēna tautinoga i le taimi o se anapogi faapitoa lea sa foai ai e tagata o le Ekalesia le \$6 miliona amerika ina ia fesoasoani i tagata na aafia i le oge i Itiopia. O lenei mea na faailogaina ai le amataga o se mea o le a avea ma galuega alofa a le AAG. O lēna lava tausaga, o se anapogi ia Novema na maua ai le isi \$5 miliona mo le tausiga o e fia aai. Na matua faatelevaveina e na anapogi e lua le galuega i o tatou taimi.

I le 30 tausaga talu mai na anapogi, ua tuuina atu e le Ekalesia le \$1.2 piliona i se fesoasoani i tagata

o loo mafatia. E aofia ai meaai, fale, sapalai faafomai, lavalava, ma aitema o le toomaga. E le gata i lea, ua ofoina mai e galuega alofa a le AAG se taimi umi o le fesoasoani e ala i taumafaiga e saunia ni nofoa faataavalevale, tui puipui, vai mama, meaai paleni mo aiga, tausiga o mata, ma le tausiga o tina ma pepe faatoa fananau mai. Ua faipaaga le Ekalesia ma isi faalapotopotoga fesoasoani alofa faatuatua ina ia faia le mea sili e uiga i foai uma.

Na masani ona aoao mai Peresitene Thomas S. Monson faapea, i le avea ai ma tagata o le Ekalesia, ua ia i tatou se tiutetauave e fesoasoani ai i e fia aai, leai ni fale, ma sauaina. Ua tulai ae tagata o le Ekalesia i le luitau. E aunoa ma le tele o faalauiloaga po o faafetai aloaia, ua latou foai atu ma le filemu le fia miliona o itula o auaunaga ma le fia selau o miliona tala.

E le gata i le saofaga atu i le tupe mo fesoasoaniga agaalofa i luga o le lisiti o foai, ua foai atu tagata o le ekalesia i le LDS Philanthropies, auauna atu faamisiona, avea ma uo ma tuaoi lelei, ma ofo atu e galulue i fale o le uelefea po o nuu, ma tuuina atu lo latou taimi ma le alofa i le faitau selau o afe ma afe o faalapotopotoga faatuatua ina i le lotoifale.

A o latou faia, ua amata ona latou faataunuuna le mea na aoao mai e le Faaola e uiga i le tausiga o e matitiva ma e le tagolima:

“Aua na ou fia ‘ai ona outou avane ai lea ni mea ou te ‘ai ai; na ou fia inu, ona outou avane ai lea ni vai ou te inu ai, sa fai a’u ma tagata ese, ona outou talia lea o a’u: . . .

“Aua na faia e outou i le tasi o e aupito ititi o ou uso nei . . . , o au lea na outou faia i ai” (Mataio 25:35, 40). ■



Ua Ofoina atu e Malumalu le Taimi mo Aiga

I na ia mafai ona fesoasoani i aiga e auai faatasi i le malumalu, ua i ai nei se taimi patino ua faataatiaese i vaiaso taitasi i potu mo papatisoga o malumalu mo aiga e faatulaga ai sui papatisoga e aunoa ma se faatali umi. Telefoni i la outou malumalu i le lotoifale e iloa ai le taimi ma faia ai ni tuutuuga. ■

Fesoasoani mo Aiga

Ua maua nei lesona mo afiafi faaleaiga e fesoasoani ai i matua e aoao atu a latou fanau e uiga i le taulimaina o ponokalafi.

O lesona, o loo maua i le **overcomingpornography.org/resources**, e aofia ai “My body is from God” [O lo’u tino e mai le Atua], “The Spirit can help me choose good media” [O le Agaga e mafai ona fesoasoani ia te au e filifili ia ala o faasalalauga lelei], “What should I do if I see pornography?” [O le a le mea e tatau ona ou faia pe afai ou te vaai i ponokalafi?]” “The Savior desires to forgive and heal the wounds of pornography” [E finagalo le Faola e faamagalo atu ma faamaloloina manu’a o ponokarafi], ma le “Sexual intimacy is sacred and beautiful” [O le alofa molitino o feusuaiga e paia ma matagofie].

O nei punaoa e tuuina atu ai ni manatu mo talanoaga ma e le manaomia ona aoao atu i soo se faasologa faapitoa. ■

Faaleleia le Faaogaga o le LDS.org

E faaopoopo atu i se talaaga fou lanu paepae ma lisi atu lanumoana, ua amatalia e le LDS.org ni faaleleiga o le faaaogaga i le amataga o lenei tausaga.

Ua suia e se atunuu ma gagana le taimi o le gagana, ma faafaigofie ai mo tagata ona maua anotusi i le lotoifale i le itulau o fesootaiga a lo latou atunuu.

Ua faalauiloa mai nei e itulau o fesootaiga a le atunuu ia lisi atu lava e tasi o le faatautaiga o loo maua i le LDS.org: Tusitusiga Paia, Aoaoga, Punaoa, ma Tala Fou. O lenei mea o le a mafai ai e tagata ona faaoga le anotusi i le lotoifale ma punaoa a le Ekalesia e aunoa ma le tatalaina o le LDS.org, ma filifili i le va o anotusi i le lotoifale ma le anotusi o le LDS.org, pe a saili. ■



Mea Taua o Afiafi Faaleaiga

Ua faamanatu e afiafi faaleaiga i le 2015 ni mea tetele se lua na tutupu i lona talafaasolopito.

O le selau tausaga ua mavae, na uunaia ai e Peresitene Iosefa F. Samita (1838–1918) ma ona fesoasoani tagata o le Ekalesia ina ia faataatia ese se afiafi e tutupu ma aoao faatasi ai. Na latou folofola atu o i latou o e faia o le a molimauina le alofa sili atu i le aiga ma le faateleina o le usiusitai i matua. O le mataupu o afiafi faaleaiga sa le o se mea e fou atoa, ae na fesoasoani lenei faamalosiaga mai le Au Peresitene Sili i le aso 27 o Aperila, 1915, ia faasalalau atili atu ai lenei faataitaiga.

O le limasefulu tausaga ua mavae, na faafouina ai e Peresitene Tavita O. MaKei (1873–1970) se faamamafa i afiafi faaleaiga. Ia Ianuari 1965, sa ia faatagaina ai le uluai tusi lesona o afiafi faaleaiga, ma lesona faalevaiaso e aoaoina i totonu o aiga taitasi. I le 1970 na avea ai po o Aso Gafua ma po e fautuaina mo afiafi faaleaiga.

I le taimi nei, o le mavae ai o le 100 tausaga o lona faatinoga ma le 50 tausaga ina ua uma ona toe faamamafa atu lona taua, o loo tumau pea le taua o afiafi faaleaiga i olaga o tagata o le Ekalesia. ■



Saunia e Elder
Marcus B. Nash
O Le Fitugafulu

Paionia

O SE TAULA MO LE ASŌ

Manatua le au paionia, o a latou tala, ma le lagolagoina, faasaoina, o le auina atu o le mana o le Atua na oo mai o se taunuuga o lo latou faatuatua ma le faamoemoe.



Uunaia i le mana o lona faatuatua i le Atua, o Isaako Bartlett Nash (ata i luga ma le ata vali i le itu taumatau), na tuua lona nuu o Uelese, ae folau atu i le Vasa Atelani ma sopoia laufanua valevalenoa e faatasi ma le Au Paia i le Aai o Sate Leki.

I le 1832, o Weltha Bradford Hatch—o se tuua o lo’u toalua, o Shelley—ma lona toalua, o Ira, sa aumau i le taulaga laitiiti o Farmersville, Niu Ioka, ISA, i tafatafa o le Vaituloto o Seneca. Ina ua o atu ia faifeautalai o Oliva Kaotui ma Parley P. Pratt i le maota o le au Hatch, sa faatau mai e Weltha se Tusi a Mamona ma faitau i ai i le taimi lava lena. I le talitonu i lona moni, sa talosaga atu ai mo le papatisoga.

Ae peitai o lona toalua, na lapatai atu ia te ia ina ia faatali ona o sauaga ua faateteleina ma se pepe ua latalata ona [fanau] mai. Ina ua faatoa mavae le fanau mai [o le pepe], sa papatisoina Weltha—ae sei vagana ua maea ona tipiina se aisa i luga o le vaiatafa lea e faatinoina ai le sauniga!¹

Sa faagaetia Ira i le savali o le talalelei. Sa ia fia iloa atili ma lagona foi le uunaia e faia se saofaga i le fausiaina o le Malumalu o Katelani. O lea sa ia malaga ai ma Weltha i le taavale toso i Katelani, Ohaio, ISA, e feiloai atu i le Perofeta o Iosefa Samita. Ina ua taunu atu, sa tau atu ia i latou o le Perofeta e mafai ona maua faatasi ma se vaega o alii o loo tatuu laau i se togavao lata ane.

I le mavae ai o le latou taunu atu i le togalaau, o se tasi o alii na faatu lana to’i i se laau, ma savali atu ia i laua ma faapea atu, “Uso Hatch, sa ou faatali mo oe mo aso e tolu; o le tupe ua e aumaia o le a faaagaina e fesoasoani e fausia ai le pulelaa i totonu o le malumalu.”

O lenei alii o Iosefa Samita. E tau le tauina atu, sa papatisoina Ira, na toe foi atu o ia ma Weltha i lo laua fale, faapotopoto a laua meatotino, ma faatasi atu i le Au Paia i Katelani.²

O se tasi o o’u tuua, o Isaako Bartlett Nash, na auai i le Ekalesia i Uelese ma na sopoia le Atelani ma laufanua valevalenoa a o lei faatasi atu i le Au Paia i le Aai o Sate Leki. Ina ua mavae lona taunu atu sa ia faalogo i se tasi o toeaina pulefaamalumu o tauleagaina le faaagaina o le tapaa i upu nei: “E i ai Toeaina i lenei faapotopotoga o e ua i ai nei tapaa i o latou gutu, e ui e oo lava i se puaa e le mafai ona lamuina le vao leaga.” O Isaako, faatasi ai ma se lamuga tapaa i lona fofoga, na aumai i fafo ma le filemu ma faapau i le eleele, ma faapea atu i le tapaa, “Ia nofo ai iina seia ou toe sau mo oe.” E lei toe sau lava i ai o ia.³

O le a le mea na uunaia ai Weltha e saili i le papatisoga i se vaiatafa ua to’a nai lo le faatalitali seia oo i le taumafanafana? O le a le mea na faaosofia ai Ira e malaga mai Niu Ioka i Ohaio ma foai atu tupe mo se malumalu e fausia e se ekalesia e le’i auai ai o ia? O le a le mea na mafai ai e Isaako ona lafoai lona nuu moni, folau atu i le Vasa Atelani, sopoia laufanua valevalenoa, ma faaopoopo le lamuina o le tapaa i le lisi o mea sa ia tuu ese?

Sa matauina e Peresitene Gordon B. Hinckley (1910–2008): “O le mana, na faaosofia ai o tatou tuua o le talalelei o le mana o le faatuatua i le Atua. O le mana lava lea e





I le talitonu ai i le moni o le Tusi a Mamona, na fesili mai ai Weltha Bradford Hatch mo le papatisoga i se vai fae na aisa atoa nai lo le faatalitali seia oo i le taumafanafana.

tasi lea na mafai ona malaga ese ai mai Aikupito, le ala i le Sami Ulaula, o le malaga umi i le vao, ma le faatuina o Isaraelu i le Laueleele na Folafolaina.”⁴

O le faatuatua o se mataupu faavae o le faatinoga ma le mana.⁵ E “le o le maua lea o se malamalama atoatoa i mea” (Alema 32:21). Ae, o se “mautinoa” o le Agaga (tagai i le Eperu 11:1, vaefaamatalaga e) e uunaia i tatou e galulue (tagai i le Iakopo 2:17–26; 2 Nifae 25:23; Alema 34:15–17), ia mulimuli i le Faaola, ma ia tausia Ana poloaiga, e oo lava i taimi o le ositaulaga ma tofotofoga uma (tagai i le Eteru 12:4–6).⁶ Pei lava o le oso a’e o le la i le taeao, e maua mai i le faatuatua le faamoemoe—le faamoemoega o mea lelei e oo mai (tagai i le Moronae 7:40–42)—ma aumai ia i tatou le mana o le Alii e fesoasoani ia i tatou.⁷

Afai o le faatuatua o le mana lea na uunaia ai o tatou tuua paionia, o le faamoemoe na maua e ala i lo latou faatuatua na taulaina ai i latou. Na tusia e Moronae:

“O le faatuatua e faataunuu ai mea uma—

“O le mea lea, soo se tasi e talitonu i le Atua e mafai moni lava ona faamoemoe mo se lalolagi sili atu ona lelei, ioe, se nofoaga

lava i le aao taumatau o le Atua, o le faamoemoe lea e sau mai le faatuatua, e fai ma taula i agaga o tagata, lea o le a latou mautinoa ma mausali ai, ma faatumulia ai pea i galuega lelei e le aunoa, ma taitaiina ai e viia le Atua.” (Eteru 12:3–4).

O le faavae o le faatuatua ia Keriso na uunaia ai paionia e galulue faatasi ma le faamoemoe, o le faamoemoega o le mea e sili atu ona lelei e oo mai—e le gata mo i latou lava ae faapena foi mo a latou fanau. Ona o leni faamoemoe, sa latou mautinoa ma le mausali, na taitai atu ai i le faamamaluina o le Atua e ala mai i soo se mativa. Mo i latou o e sa faamaoni pea, o le mana o le Atua na faaalua i ni auala faavavega.

E faapefea ona mafai e na paionia ona aveavea ma se taula mo i tatou i aso nei? Ou te faia atu ni fautuaga se tolu:

Manatua Paionia

Manatua paionia, o a latou tala, ma le lagolagoina, faasaoina, le mana laveai o le Atua na oo mai ona o se taunuuga o lo latou faatuatua ma le faamoemoe. O o tatou tama ma tina paionia e fesoasoani ia i tatou e iloa lo tatou faasinomaga o ni tagata o le

feagaiga ma faamautu mai o lo tatou Atua—lea na tatou osifeagaiga ma o le e “le feliuai” (Mamona 9:19)—o le a faamanuiaina i tatou i taimi o faigata ma tofotofoga, e pei ona sa Ia faia i o tatou tama ma tina paionia.

Na aoao mai Alema faapea o le Atua “Ona o le a ia faataunuuina ana folafolaga uma ia o le a ia faia ia te oe, ona ua ia faataunuuina ana folafolaga ia na ia faia i o tatou tamā.” (Alema 37:17). O le iloina o lenei mea, o le a musuia ai i tatou e paionia e faapena foi ona tatou galulue i le faatuatua ma ia taulaina i le faamoemoe.

O le taula lea tatou te saili atu i lo tatou ola, o le faaleagaga, ma o le lalolagi gaogaosa faaletino: o le faatuatua ola ma malosi ia Keriso ma le faamoemoe lea e taula ai i tatou i Ona ala.

O le tala o le kamupani taavale tosolima a Uili ma Matini ua avea ma se faatusa o le faatuatua ma le faamoemoe o uluai paionia. O se vavega lava le na o le 200 o le tusa ma le 1,000 tagata o le kamupani na maliliu.⁸ O taumafaiga e faatumulia i le faatuatua ma le faamoemoe a le au laveai, faatasi ai ma le fesoasoaniga paia, na faaolaina ai kamupani taavale tosolima.⁹

Ina ua tuua le Vanu o Sate Leki, sa taia le au laveai e afa lava ia muamua o le tau-malulu, e matautia, ma le tetele na siomia ai kamupani o taavaletosolima. I le feagai ai ma le mataita o le natura, na vaivai ai le faatuatua o nisi o le au laveai, na leai se faamoemoe, ma toe foi mai.

I se faatusatusaga, o Reddick Allred sa faaauau pea ona taitaia se nofoaga o le laveai mo le tolu vaiaso i le tau malulu lamatia. Ina ua taumafai se isi tagata laveai e faatauanau Uso Allred e faatasi ma ia i le liliu atu i tua, na musu Reddick:

“Sa ou teena lana fautuaga, ma . . . fautuaina o ia e nofo, aua o le ola o le kamupani na faalagolago lea ia [i] tatou,” na ia tusia i lana api o talaaga. “Ona ia . . . fautuina mai lea e avea au ma peresitene o le nofoaga laveai,

latou te taulai mai lo latou faatuatua ia te au, e tatau ona ou maua ai le afioga a le Alii ina ia iloa le mea e tatau ona matou faia. I lenei mea sa ou faasalavei atu o le [Alii] ua uma ona fai mai ia te [i tatou] le mea e faia.”¹⁰

O lena faatuatua le mafaagaetia i le taimi o tofotofoga e fausia ai le mausali o alii ma tamaitai ma tuuina atu le auala mautinoa, ma mautu a o agi tetele mai afa faataumaoui malolosi. O se tasi o fua o se faatuatua faapena e faapea o i latou o e mauaina o le a i ai i se tulaga e faafaileleina, ma laveai mai, ma faamanuiaina isi. Vaai faalemafaufau i le mafanafana na lagonaina e Reddick Allred ina ua ia vaaia le kamupani taavale tosolima ua oo mai i lona nofoaga. Vaai faalemafaufau i le olioli na lagonaina e le kamupani ina ua latou vaai ia te ia!

Ia Manatua lo Latou Lotogatasi

Ia manatua o le au paionia, i se tulaga lautele, sa tasi i latou. Ua matauina e tagata tusi talafaasolopito o le malaga i sisifo o le au Paia o aso e gata ai sa ese lava mai isi malaga a Amerika i Sisifo.

“Sa avea i latou moni lava o ni nuu i luga o le savaliga, o nuu o le faatuatua, lotogatasi, ma le puleaina e lei iloina muamua lava i se isi mea i luga o auala sopo i sisifo. . . .

“Na oni nai tagata malaga mai o Kalefonia po o Oregon na tuuina atu se manatu i tagata o loo mulimuli mai ia i latou. . . . Ae e le faapena Mamona. O le manatu muamua o le aumalaga paionia o le mautinoa ua lelei nofoaga o tolauapiga, fafie, vai, le vao, ia fua le mamao ma fautuina pou o maila. O i latou ma kamupani na sosoo mai na latou punonou o latou tua e fausia ni alalapa ma eli i lalo aega maualuluga o vanu. Na latou faia foi ni vaa ma tuu ai mo le faaogaina e kamupani o mulimuli mai.”¹¹

O le mafuaaga o lenei eseese ona o tagata o le Ekalesia na o mai e atiina ae Siona. I se faaupuga talafeagai, o Siona o “Ia taitasi le tagata ma manatu [taua] i lona uso



UA MANAOMIA E LE LALOLAGI I LE TAIMI NEI NI PAIONIA

“E mafai ona tatou i se isi itu, ia le lototele ma le tumau mausali o le faamoemoe lea e faamatalaina ai paionia o se augatupulaga na muamua atu? Pe mafai e outou ma au, i se tulaga moni lava, ona avea ma paionia? Ou te iloa e mafai ona avea ai i tatou. Oka, e matuai manaomia lava e le lalolagi ni paionia i le taimi nei!”

Peresitene Thomas S. Monson, “E Manaomia e le Lalolagi ni Paionia i le Taimi Nei,” *Liahona*, Iul. 2013, 5.



“O le tupe na tou aumaia o le a faaaogaina e fesoasoani e fausia ai le pulelaa o le malumalu,” na tau atu e le Perofeta o Iosefa Samita ia Ira Hatch i le faileoiga muamua. I le uunaia e le Perofeta, na papatisoina Ira ma siitia atu ma lona toalua mai Niu Ioka i Katelani, Ohio.

e pei o ia lava, ma faia[le] amiomama ma mea paia i luma [o le Alii]” (MF&F 38:24). Siona—o se nuu o tagata e tasi le loto ma tasi le mafaufau, e nonofo i le amiotonu, ma e leai se mativa ia i latou (tagai i le Mose 7:18)—sa avea ma o le a avea o se taunuuga e “saili ai e tagata taitoatasi le lelei o lē la te tuaoi, ma faia mea uma i le manatu tasi i le mamalu o le Atua” (MF&F 82:19).

O lenei lagona o le nuu ma le tiutetauave o le popolega tutusa e fua mai ai se taumafaiga tuufaatasi e mulimuli i le perofeta a le Atua. O se mafuaaga tupito lea o le faamanuiaina o paionia e pei ona latou i ai, ma o se vaega taua o le talatuu e tufa mai ia i tatou. E musumusu mai i latou faapea o i tatou foi o le a faamanuiaina e ala i le mana o le Alii pe afai lava o le a tatou galulue faatasi ia tasi ma se lagona o le tiutetauave faalenuu ma le felagolagomai i le mulimuli i perofeta a le Alii.

la Tuufaasolo le Agaga o Paionia

Tatou te nafa ma le totoina i a tatou fanau ma fanau a fanau le agaga lava lea e tasi na taitaia tulagaaao o le au paionia. O se lesona faigofie i le ala e faia ai lenei mea e mafai ona

vaايا i le aiga o Muñoz o Otavalo, Ekuatoa. Ia Mati 2013, sa ou feiloai ai ma Uso Juan José Muñoz Otavalo, lona faletua o Laura, ma se tasi o le la fanau tama, o Juan Amado, ina ia aoao e uiga i o latou taimi i le Ekalesia. Sa ou aoaoina o Uso Muñoz o se tasi o uluai tagata liliu mai i Otavalo.

A o laitiiti, na tuuina atu ia Uso Muñoz se kopi o le Tusi a Mamona i le gagana Sipaniolo. Na te lei faitauina, ae sa ia lagonaina se mana maoae ma le agaga pe a uuina. Sa ia natia ai i lona fale, ona sa ia iloa e faaleagaina e ona uso.

Mai lea taimi i lea taimi na te ave le tusi mai lona nofoaga na natia ai, e tau lava ina ia uuina ma lagona ai lona mana. I le onosaia ai o le fili ma faigata, sa ia auai i le Ekalesia ma avea ma se tasi o faifeautalaitai muamua ua tofia mai le nuu o Otavalo. Mulimuli ane, na ia faaiipoipo i se tasi o tamaitai ua maea lana misiona faafaifeautalaitai, ma la tausia faatasi se aiga faamaoni, e totonugalemu i le talalelei. Sa ia auaina atu ma le faamaoni o se taitai i le Ekalesia ma fesoasoani e faaliliu le Tusi a Mamona ma sauniga o le malumalu i lana gagana moni lava o Quichua.



Sa aoaoina i tatou e paionia e pei o Juan José Muñoz o Otavalo ma lona faletua, o Laura, o Otavalo, Ekuatoa, ia tatou tuufaasolo atu se talatuu o paionia e ala i le tatalaina, faaali atu, ma ola i le ala o le talalelei mo isi e mulimuli mai ai.

O Juan Amado, o se faifeautalai ua maea lana misiona, sa tagi a o matou faalogologo atu ia Uso Muñoz o loo faamatala mai lana tala o le faatuatua. Ina ua faaiu le tala a lona tama, na fai mai lenei atalii lelei: “Ou te talisa-paia pea uluai paionia o e na sopoia laufanua valevalenoa faatasi ma a latou taavale tosolima i Amerika i Matu. O lo latou faatuatua ma le tautino ma le faapaiaina na musuia ai au ma na matua ootia ai lo’u olaga atoa. Ae, faatoa ou iloa i le aso, o loo i ai foi iinei paionia i Otavalo, ma o o’u matua! O lenei mea ua tumu ai au i le olioli.”

Ua aoao mai i tatou e Uso ma Tuafafine Muñoz e tatau ona tatou tuufaasolo atu se talatuu o le faatuatua e ala i le *avea* ma se paionia—e ala i le tatalaina, faaali atu, ma ola ai i le ala o le talalelei mo isi e mulimuli ai.

Pe a tatou faatinoina pea lava pea le faatuatua i le Alii ma taulaina o tatou agaga ma le faamoemoe ia te ia, tatou te avea ma “mautinoa ma le mausali ai, ma faatumulia ai pea i galuega lelei e le aunoa, ma taitaiina ai e viia le Atua” (Eteru 12:4). Ona, pei lea o Reddick Allred, o le a tatou auauna atu ia i latou ua leiloloa i le ala o le olaga, ma o i latou—e aofia ai tupulaga o le lumanai—o le a aoao mai ia i tatou le mana ma le filemu o se olaga faapena.

Na matauina e Elder M. Russell Ballard o le Korama a Aposetolo e Toasefululua:

“O le la’uina o ni nai meatotino i totonu o taavale solo-fanua po o taavaletosolima ma le savalia o le 1,300 maila (2,090 km) e le o le auala lea o le a talosagaina ai le toatele o i tatou e faaali atu lo tatou faatuatua ma le lototele. E ese foi ni luitau ua tatou feagai ai i aso nei—ese foi mauga e aea, ese vaitafe e asaina, ese vanu e fai ia “fua mai e pei o le aute” (Isaia 35:1). . . .

“O a tatou tauiviga o loo maua i le ola ai i se lalolagi ua lilofia i le agasala ma le faaleagaga lea e foliga mai o le faaloloto, le faamaoni, ma le matapeapea o loo i ai i soo

se mea. O se tasi o togavao o aso nei o le fenumiai ma savali feteenai.”

E tatau ona tatou le faasamasamanoa e tusa ai ma poloaiga a le Atua, na faaopoopo mai ai Elder Ballard. “Aloese mai faaososoga ma mea leaga o le lalolagi, e manaomia ai le faatuatua ma le lototoa o se paionia moni o aso nei.”¹²

Ia mafai e i tatou taitoatasi ona faapea foi ona tautino e avea ma se paionia ma e mua-mua atu, ma tatala le ala mo isi o e o loo featofai e se lalolagi ua lilofia i le agasala, o le le mautonu, ma le masalosalo. Ia tatou manatua o le au paionia ma a latou tala, ia manatua, sa oo ina latou fausia Siona i se taumafaiga tuufaatasi, ma talia le tiutetauave e totoina se faatuatua faapea i e uma tatou te feiloai—ae maise lava i le tupulaga faia’e—ma e faia lea

e ala i le ofoina atu o la tatou lava “taulaga o le ola” (Roma 12:1) o se olaga e uunaia e le faatuatua i le Alii o Iesu Keriso ma taula i le faamoemoe o mea lelei e o mai ia te ia.

O le avea ma se paionia o lona uiga ia “tatou le faavaivai i le faia o mea lelei” (MF&F 64:33). E le masalomia lava e lei lagonaina e Weltha Hatch se taua faapitua i le papati-soina o ia i se vaitafe aisā. Pe na manatu foi Isaac Nash i le taua tele o le togiina o le tapaa ua lamuina i le eleele. Ma e pei foi o Reddick Allred, na faigofie lava lona faia o le mea na fetalai mai le Alii e tatau ona ia faia.

Mai mea uma o nei mea laiti ma faatauvaa ua oo mai ai se mea e tele! O lea ia tatou manatua o loo i ai ni mea laiti i se taumafaiga tele. A o tatou ola i le talalelei, mulimuli i le perofeta, filifili le faatuatua i le masalosalo, ma faia mea laiti e tupu ae le faatuatua ma fua mai ai le faamoemoe e taulaina ai le agaga, o le a avea i tatou taitoatasi ma se paionia, e saunia le ala mo isi e mulimuli ai. ■

Mai se saunoaga, “Pioneers—Anchors for the Future,” na tuuina atu i Le Aai o Sate Leki i le Sauniga Faaosola o Atalii o Paionia i Iuta i le aso 24 o Iulai, 2013.

FAAMATALAGA

1. Tagai i le *Wandering Home: Stories and Memories of the Hatch Family* (1988), 3.
2. Tagai i le *Wandering Home*, 3.
3. Isaac Bartlett Nash, *The Life-Story of Isaac B.*

4. Gordon B. Hinckley, “The Faith of the Pioneers,” *Ensign*, July 1984, 5.
5. Tagai i le *Lectures on Faith* (1985); Eperu 11:4–40; Iakopo 4:6; Eteru 12:7–22.
6. Tagai foi i le *Lectures on*

7. Tagai Bible Dictionary, “O le Faatuatua”; tagai foi i le *Alema* 57:19–27; 58:10–13; Mamona 9:8–21; Moronae 7:33–37; Mataupu Faavae ma Feagaiga 27:17.
8. Tagai i le Andrew D.

- Olsen, *The Price We Paid: The Extraordinary Story of the Willie and Martin Handcart Pioneers* (2006), 470.
9. Tagai i le Olsen, *The Price We Paid*, 473–74.
10. I le Olsen, *The Price We Paid*, 160.

11. Wallace Stegner, *The Gathering of Zion: The Story of the Mormon Trail* (1964), 11.
12. M. Russell Ballard, “Faatuatua ma le Lototele o Paionia-i Aso La ma Aso Nei,” *Liahona*, Iulai 2013, 20, 21.

○ Le Oo Mai o le

TUSI A MIAMIONA



*Faapei o Iosefa Samita, e le manaomia ona tatou
taitaia se olaga atoatoa ina ia mafai ona avea ai
ma se meafaigaluega mamana i aao o le Atua.*

Iosefa i le fale e malolo, na toe asiasi ifo Moronae ia te ia mo le taimi lona fa. Na aoaina e le agelu ia Iosefa e toe foi atu i lona tama ma ta'u atu ia te ia le faaaliga, lea sa faia e Iosefa. Ona alu lea o ia i le mauga latalata ane (tagai i le Iosefa Samita—Talafaasolopito 1:49–50).

Ina ua mavae le taunuu atu i le mauga, sa faaaoga e Iosefa se taumoa e tatala ai se pusa maa na tanumia lea na taatiatia ai papatusi ma aapa i totonu e aveeseina. A o ia faia, sa velo o ia i tua e se maofa malosi ma aveese mai ia te ia lona malosi. Ina ua ia alaga atu, ma fesili atu pe aisea na le mafai ai ona ia maua mai papatusi, sa tau atu e Moronae ia te ia, “Aua e te lē tausia poloaiga a le Alii.”²

E ui lava i lapataiga manino a le agelu, sa faataga e Iosefa ni manatu e faapea o papatusi, atonu o le mafai ona foia ai faigata tau tupe a lona aiga.³ O lea, na faavaeina ai e Moronae se vaitaimi faataitai e fa-tausaga mo Iosefa e faamatua ai ma saunia lona loto ma le mafaufau e oo atu i lana valaauga ma le faamoemoega o le mama e manaomia mo lea galuega paia.



A o agai atu Iosefa i le fale e malolo mai lana galuega i le faatoaga, na asiasi atu Moronae ia te ia i se taimi lona fa.

Faafitauli i le Faaliliuga

O le tausaga lona fa mulimuli ane na iu ina saunia ai Iosefa. Ae peitai, o faafitauli i le faaliliuina o papatusi, sa matua faateteleina. Sa manaomia e Iosefa sa faatoa faaipolo le galue e saunia [mea uma] mo Ema ma mo ia lava, e oo lava i tagata o lona aiga lautele, o e sa faalagolago malosi i lona saofaga atu. Atonu e sili atu le faalavelaveina, le feagai ai o Iosefa ma le faateteleina o feteenaiga o le alalafaga ma le matapeapea na taufaamatau ai le faailoaina ma le leiloloa o papatusi.

Ina ua faatonuina e ni tagata o Palamaira Iosefa e faaali atu ia i latou papatusi po o le valitaina ma faapipii fulu o manu ia te ia, sa ia iloa e tatau ona ia alu ese.⁴ O lea, i le faaiuga o le 1827, na tuu ai e Iosefa ia papatusi i se paelo pi, tapena ni meatotino, nonoina mai le \$50 mai i lana uo ma le tagata muamua na talitonu o Matini Harisi, ma ave lona toalua o loo maitaga e silia ma le 100 maila (161 km) i saute i Haramoni, Penisilevania, e nonofo faatasi ma matua a Ema. Sa ia faamoemoe o le suiga o le a faamama ai a latou galuega i aso taitasi, ma faasaolotoina ai i latou mai le tele o le faaloloto ma le ita na faatumulia ai Palamaira.

Na lava le faaleleia o tulaga i lona taumalulu lea na mafai ai e Iosefa ona faaliliu ni nai tusiga o le Tusi a Mamona. Ia Aperila, sa siitia atu Matini Harisi o Haramoni e fesoasoani ia Iosefa o se tusiupu, ma na amata le galuega o le faaliliuina i le faatauana. E oo atu i le ogatotono o Iuni—toetiiti lima tausaga talu mai le aso matautia sa taitai atu ai Iosefa i le Mauga o Kumora e aumai papatusi—sa latou gaosia itulau e 116 o le faaliliuga.⁵

I le taimi lea na aioi ai Matini ia Iosefa mo se faatagaga e ave ia tusitusiga i Palamaira ina ia faaali atu i lona faletua o Lusi, e tatou te malamalama lelei ai sa manao i ni faamautinoga o mea na faaalu ai le tele o le taimi ma oa o lona toalua. Peitai, ina ua mavae le fesili atu i le Alii, na faalua ona tau atu ia Iosefa ia aua nei faatagaina Matini e ave ia tusitusiga.⁶

O le popole e faamalie le masalosalo ma le malolosi o manaoga a lona toalua, na toe talosaga atu ai Matini ia Iosefa. I le tiga, na alu ai Iosefa i le taimi lona tolu i le Alii. I le tali mai, na fetalai atu le Alii ia Iosefa e mafai e Matini ona ave ia tusitusiga pe afai e na te faaali atu i na o tagata faapitoe e toalima ma vave ona toe faafoi atu. Ma le musuā, na tuuina atu e Iosefa le tusitusiga ia te ia, ae pe a uma ona sainia e Matini se feagaiga tusitusia e faia e pei ona faatonuina e le Alii.⁷

Sa tu Matini Harisi i le faitotoa o le aiga o Samita, oso i luga o le pa, toso lona pulou i luga o ona mata, ma saofai ai iina.



Na amata ai ii se auauai mai o mea na tutupu lea na aumaia ai Iosefa i le faanoanoa o soo se mea e mafai ona tupu ia te ia. E lei leva ona alu ese atu Matini, ae fanauina loa e Ema se pepe tama. Sa laua faaigoa ma Iosefa lo la tama muamua ia Alavini, o se sao faamafanafana i le uso faapelepele o Iosefa ua maliu, o le na maliu i le lima tausaga na muamua atu. O le tulaga e faanoanoa ai, nai lo le faatumuina o se avanoa, sa faateleina e Alavini laititi ina ua ia maliu i le aso na fanau ai, le aso 15 o Iuni, 1828.

E pei sa le lava le onosaia o lona mea, i le va o le vaivai ona o se faatiga umi ma tiga ma atuatuvalega faalelagona o le oti o lana tama, na oo ai Ema i se tulaga matautia o

pogisa o le po mai le mea na tuu ai o ia e le taavale solo-fanua — e na o le aao fesoasoani o se uso pasese popole (se “tagata ese”) o le sa alofa ia te ia.⁹

Ina ua mavae le taunuu atu o Iosefa ma mulimuli ane faia se taumafataga, sa auina atu se feau ia Matini. E na te faatasi ma le au Samita mo le aiga o le taeao ae na te lei alu ane seia oo i le aoauli. Sa savalivali lemu, ma tu i le pa o le fale, ma oso i luga o le pa, ma toso lona pulou i luga ae o ona mata, ma na o le saofai lava.¹⁰

“Ua leiloa mea uma!”

Mulimuli ane, na alu atu Matini i totonu o le fale.

E aunoa ma le talanoa atu i se upu, sa ia avae lana sipuni e ai ai. Ae a o le’i uina sina meaa, sa ia alaga atu, “Oi, ua maimau lou agaga!”¹¹

I lona mea, na oso ae ai Iosefa ma fai atu: “Matini, ua leiloa ia oe le tusitusiga? [Ua] e solia lau feagaiga, ma tuuina ifo i lalo le tausalaga i luga o lo’u ulu, e faapena foi ma oe?”

Na tali atu Matini ma le faanoanoa, “Toe, ua leiloa ma ou te le iloa poo fea o i ai.”¹² (“Sa faaali atu e Matini ia itulau o le tusitusiga i isi tagata e ese mai le toalima, ma i se togafiti,” Na tau mulimuli ane ia Iosefa, “sa latou aveesea mai ia te ia.”¹³)


Sa ita Iosefa ma alaga atu i le puipui: “Ua leiloa mea uma! Ua leiloa mea [uma]! O le a se mea e tatau ona ou faia? Ua ou agasala—o au lava na faaosoina le toasa o le Atua.” I lona mea o, “mataofiofia ma oi, ma le auega e sili ona oona na faatumulia ai le fale,” o Iosefa o loo faaalua le popolega sili o i latou uma.¹⁴

Na taofia le galuega faaliliu mo se vaitaimi, ma o papatusi ma faamatala upu sa aveesea mai ia Iosefa seia oo i le aso 22 o Setema—o se faamanatu faamomoioto o lona vaitau faanofovaavaaia na muamua atu. Sa puapuagatia foi o ia i lenei aoaiga malosi mai le Alii:

“Faauta foi, ua faafia ona e soli o poloaiga ma tulafono a le Atua, ma e alu pea i faatauanauga a tagata.

“Aua, faauta, sa lē tatau ona sili atu lou fefe i tagata nai lo i le Atua. E ui ina tuu faameanoa e tagata fautuaga a le Atua, ma latou inoino i ana afioga—

“Peitai sa tatau lava ona e faamaoni; ma semanu e faaloaloa atu e ia lona aao ma lagolago ia te oe e faasaga i u fanafana mu uma a le fili; ma semanu e faatasi atu o ia ma oe i taimi uma o faalavelave” (MF&F 3:6–8).



le latalata atu o ia lava i le oti. Mo le lua vaiaso na popole ai Iosefa ia Ema, sa tausua o ia seia toe malosi a o ia galue i lona lava faavauvau ia pepe Alavini. Ina ua iu lava ina faaali mai e Ema faailoga o le soifua maloloina, na liliu atu manatu o Iosefa ia Matini ma le tusitusiga.⁸

Ma le iloaia o lona atuatuvaale, na uunaia ai o ia e Emma e toe foi atu i Palamaira e siaki Matini ma le tusitusiga. Faatasi ai ma se iloa o ona lagona atuatuvaale, na ia aveina ai se taavale solofanua agai i matu. Ma le le mafai ona ai pe moe i le faigamalaga, na taunuu ai Iosefa i le fale a ona matua—o se savaliga atoa e 20-maila (32 km) i le

Vaai faalemafaufau i le faigata o le mauaina o se faaaliga faapena. Faatoa aveese atu mai ia Iosefa lona atalii ulumautua. Toetiiti lava a maliu lona faletua. Ma sa tutuli i lana filifiliga e tuu atu ia Matini le tusi e ala i se naunautaiga faamaoni e fesoasoani ai i se uo o le sa fesoasoani ia te ia i se galuega paia. Ioe, ae peitai sa matuai faavauvau Iosefa, ma faalagolago atu ia Matini Harisi e pei ona ia manatu ai, sa ia misia se mea se tasi e faamoemoe atoatoa i ai le Atua i Ana soo: faalagolago lava i taimi uma i le aao o le Alii ae le o le lima o tagata. I le agavaa o Iosefa mo viiviiga e faavavau, sa ia aoaoina le lesona lenei i se auala loloto ma le maoae lea



I le totonugalemu o le faaliliuina o le Tusi a Mamona, sa talai atu e Iosefa ma Oliva ia lauga, mauaina ma faamaumuina faaaliga, ma na papatisoina.

sa ia le'i toe faia ai se mea sese ma, e lei umi ae toe maua papatusi ma faaliliu upu, sa ia amata i se saosasoa o le saofaga faalelotu o le fiafia lea sa lei vaai e le lalolagi talu mai le galuega patino a Iesu Keriso. Sa amata i le tautotogo o le 1829, i le taimi nei ma Oliva Kaotui i lona autafa, na faaliliuina e Iosefa se itulau e 588 ofoofogia o le Tusi a Mamona i le tele o le, 65 aso faigaluega.¹⁵ O lenei mea moni o se saosasoa faatauasoina pe a faatusatusa i ana taumafaiga

sa i ai muamua. E aoga foi le tusi o le faaliliuga o le lomiga a King James o le Tusi Paia na alu ai le fitu tausaga mo le 47 tagata aoaoina atamamai, o le galulue i gagana ua latou iloaia e faamaea ai.¹⁶

E le gata i lea, i le totonugalemu o lenei faafiafiaga maoae, sa talai atu foi e Iosefa ma Oliva ia lauga, mauaina ma faamaumuina faaaliga, sa auai i le toefuataiga o le Perisitua Arona ma le Perisitua Mekisateko, na papatisoina, auai i tiute o le aiga, ma siitia atu i Feiete, Niu Ioka, ina ia lolomiina ia tusitusiga. Ae o le vavega aupito sili i nei mea uma sa le i maua i le auala na vave ai ona faataunuuna ai mea, ae i le faigata o mea na maua mai i lenei taimi sili ona faigata.

O Se Tusi Tulaga Ese ma le Faigata

E tusa ai ma se aotelega faaleaoaoga lata mai nei, o le mea lea sa gaosia moni e Iosefa i na aso faigaluega e 65 o le faaliliuga: “E le gata o loo i ai le silia ma le afe tausaga o le talafaasolopito [i le Tusi a Mamona] o loo aafia ai n i goa o tagata taitoatasi e lua selau ma le toetiiti selau nofoaga mamao, ae o le faamatalaina o ia lava i le aveai ai ma le galuega o faatonu/tagata tusi talafaasolopito e toatolu—o Nifae, Mamona, ma Moronae. O nei faamatalaga, ua tau mai e i latou lava o o latou tala na faavae i le tele o faamaumuina na i ai muamua. O le taunuuga o se fefiloi lavelave e aofia ai ma ni ituaiga e tele e amata mai i le faamatalaga tuusao i le faaopoopoina o lauga ma tusi i tala faatusitusiga paia ma solo. E manaomia ai le onosai tele e galueaiina ai faamatalaga uma o le faasologa, faataatiaga faafaafanua, gafa, ma punavai o faamaumuina, ae o le Tusi a Mamona e tulaga ese le tutoatasi i nei mea uma. O le faasologa e toetoe lava e taulimaina e aunoa ma ni faafitauli, e ui lava i ni nai fefoifoiai ma le fesootai faaletino o tala; . . . ma na tausia e le au faamatala upu le sao uma o faatulagaga ma sootaga faaleaiga i totonu o tausitatalafaamaumu sa Nifae e lua sefuluono ma tupu o sa lareto e fasefulutasi (e aofia ai le tauva i mea tau gafa). O le lavelave e ono manatu ai se tasi na galue le tusitala mai le siata ma faafanua, e ui lava o le ava o Iosefa Samita . . . na manino le faafitia atoatoa faapea na ia tusia se mea ese muamua lea sa ia taulotoina pe sa faasino i ai a o ia faaliliuina, ma e moni lava sa ia tau mai na amata e Iosefa ni sauniga tau tusitusi e aunoa ma le vaai i le tusitusiga pe lau atu ia te ia le fuaitau mulimuli.”¹⁷

**Sa auai Iosefa ma Oliva
i le toefuataiga o le
Perisitua Arona i le Vanu
o le Susquehanna i le
tautotogo o le 1829.**



E faaopoopo i nei mea le i ai o fausaga o tusiga atama-mai tulaga ese ma e maoae le ogatusa ma faiga faaanamua ma ituaiga o fesootaiga, faatasi ai ma isi mea, e faatatau i le tusi ma lona faaliliuga.¹⁸

I le fetai ai ma lenei (faamautinoaga), e tau lava ona fesili se tasi, e faapefea e se tagata—aemaise lava o le tasi e leai ni aoaoga aloaia—ona ausia se mea faapena? I lo’u mafaufau, pau lava le mea, e le’i fatuina e Iosefa Samita le Tusi a Mamona aua semanu e le mafai ona fatuina. Ae o lenei faamasinoga, e malosi e pei ona foliga mai ai, e le o, mulimuli ane, avea ma faamaoniga taua o le moni o le tusi; e le o avea foi ma faavae o lau molimau. O le mea e na te faia o le faamalosi lona mea na aoao mai e le Agaga ia te au i se taimi e lei mamao atu a o avea ma se faifeautalai faamisiona. I le nofoaga paia o le Nofoga Autu e Aoao Ai Faifeautalai i Provo ma i le mauga lanulauava matagofie o Sikotilani, sa ou oo i se molimau faaleagaga ina ua mavae le molimau faaleagaga o Iosefa Samita na valaauina e le Atua, e avea o ia ma Ana meafai-galuega i nei aso e gata ai, ma na ia aumaia se tusi ua leva ona i ai muamua ae lei fanau mai o ia, o se tusi e moni e le mafaatusalia—le tulaga ese o le vaega taua o se olaga faaleatua o le fiafia.

Ou te tautino atu foi o le olaga o Iosefa Samita o se molimau faatauana o se mea e mafai ona avea ma savali soofaatasi o le tusi lava ia. E pei ona amatalia i le Tusi a Mamona, na tautino mai Nifae, “Ae faauta, o a’u o Nifae, o le a ou faaali atu ia te outou le i ai o le *alofa mutimutivale* agamalu o le Alii i luga o i latou uma o e ua ia filifilia, ona o lo latou faatuatua” (1 Nifae 1:20; faaopoopo le faamamafa). A o tapunia le tusi, ua aioi mai Moronae, “Faauta, ou te apoapoai atu ia te oe e pe a outou faitau nei mea . . .

ia outou manatua le *alofa mutimutivale* tele o le Alii i le fanauga a tagata, mai i le foafoaga o Atamu e oo mai lava i lalo seia oo mai i le taimi o le a outou maua ai nei mea” (Moronae 10:3; faaopoopo le faamamafa).¹⁹

Mai le amataga i le faaiuga, o le molimau o le Tusi a Mamona ma le talafaasolopito e faaali atu o le Atua o loo mataalia ma le naunautai e galulue faatasi ma, faamalolo ma faamanuia i latou o e—e ui lava i a latou agasala ma le atoatoa—ia liliu atu ia te Ia i le salamo moni ma le faatuatua.

Tuu atu Lou Faalagolago i le Atua

E faapei o Iosefa Samita, e le manaomia ona e taitaia se olaga atoatoa ina ia e avea ai ma se meafai-galuega mamana i aao o le Atua. O mea sese, toilalo, ma le le mautonu sa avea ma vaega o le olaga ma le misiona a Iosefa, ma o le a avea foi ma vaega o lou olaga. Ae aua le faanoanoa. Aua nei faaosoosoina oe e faapea “ua leiloa mea uma.” E le o leiloloa mea uma ma o le a le leiloloa lava mo i latou o e vaai atu i le Atua o le alofa mutimutivale ma le ola.

E i ai sou Uso o le e leoleo ia te oe, saunia e laveai mai oe ma faalautele lau auaunaga i aao e sili atu ona malosi nai lo lou lima—o le mea moni, nai lo isi aao uma e mafai ona tuufaatasi i le faaletino. O loo i ai iina na aao e lagoonaina ma faamanuiaina oe, “i taimi uma o faalavelave” (MF&F 3:8), tusa lava pe faapei le tuuatoatasi ma le lotovaivai e te lagonaina. O le mea lea, a o e agai i luma i lou olaga, faalagolago i na aao ma “ia outou faamalolosi, ma outou loto tetele, aua tou te fefefe, aua foi nei matatau . . . aua o Ieova lou Atua lua te o faatasi ma ia; na te le tuuna oe, na te le lafoai ia te oe” (Teuteronomie 31:6).

Na mauaina e Iosefa lenei mea ma na suia ai le lalolagi. E mafai foi ona e faia. ■

FAAMATALAGA

1. I le *Histories, Volume 1: 1832–1844*, vol. 1 o lomiga o Talafaasolopito o *The Joseph Smith Papers*, (2012), 14; tagai foi josephsmithpapers.org.
2. I le *Histories, Vol. 1:1832–44*, 83.
3. Tagai i le Oliva Kaotui, “A Remarkable Vision,” *The Latter-day Saints Millennial Star* 7 (Nov. 1840): 175.
4. Vaai ia Matini Harisi, i le *Tiffany’s Monthly*, Iuni 1859, 170.
5. Tagai i le *Histories, Vol. 1: 1832–44*, 244; see also Gospel Topics, “Book of Mormon Translation,” [lds.org/topics](https://www.lds.org/topics).
6. Tagai i le *Histories, Vol. 1:1832–44*, 245.
7. Tagai i le *Histories, Vol. 1:1832–44*, 245–46.
8. Tagai i le Lucy Mack Smith, *Biographical Sketches of Joseph Smith, the Prophet, and His Progenitors for Many Generations* (1853), 118.
9. Tagai i le Lucy Mack Smith, *Biographical Sketches*, 119–120.
10. Tagai i le Lucy Mack Smith, *Biographical Sketches*, 120.
11. I le Lucy Mack Smith, *Biographical Sketches*, 121.
12. I le Lucy Mack Smith, *Biographical Sketches*, 121.
13. I le *Histories, Vol. 1:1832–44*, 247.
14. I le Lucy Mack Smith, *Biographical Sketches*, 121–122.
15. Tagai i le John W. Welch, “How Long Did It Take Joseph Smith to Translate the Book of Mormon?” *Ensign*, Jan. 1988, 47.
16. Tagai i le “King James I of England,” kingjamesbibleonline.org/King-James.php.
17. Grant Hardy, *Understanding the Book of Mormon: A Reader’s Guide* (2010), 6–7.
18. Tagai i le Terry L. Givens, *By the Hand of Mormon: The American Scripture that Launched a New World Religion* (2002), 156.
19. Tagai i le Grant Hardy, *Understanding the Book of Mormon*, 8.



Seleseleina

O TAUI O LE

Amiotonu

*E leai se mea lelei o le a taofia mai
ia i latou o e savavali sa'o.*

Emoni lava o loo vavao le lalolagi (tagai i le MF&F 45:26). O le tele o o tatou luitau e faaleagaga. O na [luitau] o mataupu tau le lalolagi e le mafai ona foia e i tatou o ni tagata taitoatasi. E ui i lea, o loo i ai ni tau faatino tatou te *mafai* ona ausia o ni tagata taitoatasi, e oo lava i se taimi pe a faaititia le amiotonu i le lalolagi atoa.

O le manatu tonu lava o le “tauia ona o le amiotonu” o se manatu faavae ua i lalo o le osofaiga i le lalolagi i le aso. O le faatalitonuina o tagata e filifili le amiotonu o se luitau ua leva tele. “O le tagata natura o se fili i le Atua” (Mosaea 3:19). Sa i ai lava i taimi uma le “faafeagai o mea uma” (2 Nifae 2:11).

O le eseesega i le taimi nei o le “fale tele ma le ateatea” (1 Nifae 8:31) ua leo tetele atu tagata masalosalo, sili atu ona fefinauui, ma itiiti le faapalepale nai lo se isi lava taimi o lou olaga. Latou te faaalua lo latou faatua-tua itiiti pe a, i le tele o mataupu, e sili atu ona latou popole i le i ai i le itu sese o le talafaasolopito nai lo le itu sese o le Atua. Sa i ai se taimi na malamalama ai le toatele o tagata e faapea o le a faamasinoina i latou e ala i poloaiga a le Atua, e le ona o manatu masani po o filosofia taatele o aso nei. O nisi ua sili atu ona popole e uiga i le tauemuina e isi nai lo le faamasinoina e le Atua.

E le fou le taua i le va o le lelei ma le leaga. Ae i le aso o se pasene maualuga atu o tagata ua faaiuina sese e faapea e leai se amio mama, tulaga faatonuina amiotonu e tatau ona mulimuli i ai tagata uma.

E ui i lea, O Le Ekalesia a Iesu Keriso o le Au Paia o Aso e Gata Ai e lei mauaina lava ni tagata sili atu ona faamaoni. O tagata o le Ekalesia, faatasi ai ma isi o e ua tutusa tulaga faatauaaina lelei, o loo tumau i le amiotonu e tusa lava poo siomia e le amioleaga. Ua tatou iloa, i le auala na tautino mai ai le perofeta o Alema “e lei avea lava le amioleaga ma fiafia” (Alema 41:10) ma o le fuafuaga a le Tama mo Ana fanau o se “fuafuaga tele o le fiafia” (Alema 42:8, 16).



Saunia e Elder
Quentin L. Cook

O Le Korama
a Aposetolo e
Toasefululua



**Afai tatou te le
faaeteete, e mafai
e le lalolagi ona
uunaia i tatou e
taulai atu i mea
e tosoina ese ai
i tatou mai le
tautinoga loloto
faaleagaga.**

O lo'u manao ina ia ofoina atu ni fautuaga e ono fesoasoani ia te outou taitoatasi ma o outou aiga atoa ia sili atu ona malamalama ma ausia tau i o le amiotonu.

O le Tau i o le Faaleagaga

“Pe faapefea ona ou tuu popolega faalelalolagi i se vaaiga lelei a o ou taumafai e ausia le ahualu i huma faaleagaga?”

Tatou te avea o se vaega tele o lenei lalolagi. O vaega faaletino o le ola ai lea aso ma lea aso o se luitau patino. E foliga mai e vaai le lalolagi i mea uma e ala i le tioata o tau faalelalolagi.

O loo faamamafa mai i le faatomuaga o le Mataupu Faavae ma Feagaiga le faafitauli lava lea e lapataia ai i tatou i mea matautia, tuu mai ia i tatou le taitaiga e saunia ma puipua i tatou i le taimi nei ma i le lumanai, ma tuuina mai malamalamaaga taua i lenei mataupu: “Ua latou le sailia le Alii e faatu lana amiotonu, ae ua taitoatasi le tagata ma savali i lona lava ala, ma tusa ai ma le faatusa o lona lava atua, o lona foliga ua tusa ma foliga o le lalolagi, ma o lona uiga o lena o se tupua” (tagai i le MF&F 1:16).

Na aoao mai Peresitene Spencer W. Kimball (1895–1985) o tupua e mafai ona aofia ai ni faailoga, tikeri, fanua, fale, meaafale, ma isi mea

E taulai atu le lalolagi i aso taitasi i mataupu tau i le tamaoaiga faaletino, ae e manaomia lo tatou taulai atu i mataupu faaleagaga.



faitino faaletino. Sa ia fai mai pe a tatou siitia atu i nei sini agavaa i se auala e faaititia ai lo tatou tapuai i le Alii ma e faavaivaia ai a tatou taumafaiga e faatuina Lana amiotonu, ma faatino le galuega o le faaolataga i fanau o le Tama oi le Lagi, ua tatou fatuina ni tupua.¹

O nisi taimi o tioata o le lalolagi e mafua ai ona tatou taulai atu i faafitauli e fai lava si le maoae o le sailia ia mauaina o le oa silisili ae e le aveese ai i tatou mai le tautinoga loloto faaleagaga.

O le tele o tausaga ua mavae, sa tau mai ai ia te au i se faaaliga matagofie lea sa i ai nisi o vaaiga uiga ese. O vaaiga eseese na faaali mai ai i lalo ifo o se fua tele e faitauina, “Pe a afio mai Keriso i le po nei, o ai o le a afio mai ai o Ia?” Afai ou te manatua le faaali sao mai o ata, sa i ai ia vaaiga nei:

- Se tamaitai ma'i, matua i le moega o loo i ai se teine tausimai.
- O se tina fiafia talavou ma se pepe faatoa fanau mai.
- O se aiga o i ai fanau o loo fia aai, ma o loo fetagisi.
- O se aiga mauoa.
- O se aiga matagofie ae faamaualalo ma fanau e toatele o loo pepese fiafia faatasi.

Ua tatou iloa pe a toe afio mai le Faaola, tatou te le iloa le aso po o le itula. Ua tatou iloa foi i le avea ai ma Kerisiano, tatou te tausi i e matitiva ma e le tagolima ma le fafine ua maliu lana tane ma le tamaititi matuaoti. E ui i lea, semanu e sao le faitauina o le tagavai, “Afai e afio mai Keriso i le po nei, o ai ua saunia e faafetaiai ia te Ia?”

O lo'u manatu lona lua na ta'u mai e vaaiga ia i matou mea uma e uiga i le tulaga faaletino o tagata ae e leai se mea e uiga i lo latou tulaga faaleagaga ma le tautinoga ia Keriso.

O le vaega amata mo le iloiloina o o tatou olaga ma le tautinoga i le Faaola ma Lana talalelei o le papatisoga. Sei vagana ai tagata fou liliu mai ma tamaiti laiti tele, o la tatou papatisoga na faia i le tele o tausaga ua tuanai.



E tatau ona tatou taulai atu i o tatou olaga ma faateleina lo tatou faamamafa i mea faaleagaga.

Ma na saunoa ma le mana le perofeta sili o Alema ia i tatou ina ua ia faapea mai: “Ou uso e, afai ua oo ia te outou se liuga o le loto, ma afai ua outou lagona le fia pepese i le pese o le alofa togiola, ou te fia fesili atu, e mafai ea ona outou lagonaina nei? (Alema 5:26).

Ona faaauau lea e Alema lana savali maoae, lea e taua i o tatou aso. Ua ia fesiligia ma le manatu i le Au Paia, pe latou te feoti ea, pe afai ua latou saunia e fetaii ma le Atua. Ona faamamafa mai lea e Alema uiga taua se fa tatou te manaomia ina ia mafai ona le pona ai i luma o le Atua:

Muamua, “ua lava lo [tatou] lotomauualalalo?” I se tulaga, o se toe foi lea i le tulaga manaomia mo le papatisoga—faalotomauualaloina i tatou lava ma maua le loto momomo ma le agaga salamo.

Lona lua, “ua tafi ese ea le faamaualuga mai ia te [i tatou]?” Ua lapatai mai Alema e faasaga i le soliina o le Paia e Toatasi i lalo o o tatou vae ma le faafefeteina i le faamaualuga—ma tuu o tatou loto i luga o mea le aoga o le lalolagi ma manatu ua sili i tatou i lo isi.

Lona tolu, pe ua tatou “tafiese mai le mataua?” Mo i latou o e ua tele faamanuiga ae le lagonaina le agaga faafetai ona ua latou uai atu i mea o loo maua e isi, e mafai ona matautia le losilosivale. O le “Ituaiga olaga o le losilosivale”² ua faateleina a o suitulaga le lauiloa ma le mauoa i le faatuatua ma le aiga i le avea ai ma faamoemoega autu mo le toatele o le lalolagi.

Lona fa, mata o tatou tauemu pe sauaina o tatou uso ma tuafafine? I le lalolagi i le aso atonu tatou te taua lenei mea o le sauaga (tagai i le Alema 5:27–30, 53–54).

Mata e sili atu ona talafeagai i faafitauli o o tatou aso lenei savali e uiga i le lotomauualalo, faamaualuga, losilosivale, ma sauaga? O le finauga tele i le tele o le salafa o le lalolagi e

faatatau i mataupu tau le tamaoiga o aso taitasi. Ae ua itiiti le talanoaga e uiga i le toe foi atu i mataupu faavae faa-Keriso e taulai atu i le sauniuni e fetaii ma le Atua ma i luga o le tulaga o o tatou agaga. E tatau ona taulai atu o tatou olaga ma faateleina lo tatou faamamafa i mea faaleagaga.

O le Tau i o Aiga Amiotonu

“Faamata e tatau ona tatou tausia o tatou aiga i eria ia e toalaiti ai tagata o le Ekalesia ma ua siomia i tatou i le tele o le leaga, finauga, ma le tetee i le amiotonu?”

O maua ma lo’u toalua, o Maria, na i ai nei popolega a o maua amata ona tausia la maua fanau i le Eria o San Francisco Bay i Kalefonia, ISA, i le faaiuga o le 1960. Sa matua toalaiti le faitau aofai o le Au Paia o Aso e Gata Ai. Ae a o amiolelei le toatele o tagata, sa amata ona avea le Eria o Bay ma se maneta mo le faaaogaina o fualau faasaina ma uiga leaga uma ma amioga agasala.

O le suiga i le sosaiete na matuai iloagofie lava lea na talosaga ai se peresitene popole o le siteki i taitai o le Ekalesia pe tatau ona ia uunaia tagata o le Ekalesia ina ia nonofo pea i le Eria o Bay. O Elder Harold B Lee (1899–1973), lea sa sinia i le Korama a Aposetolo e Toasefululua i lena taimi, sa tofia e tautalagia le mataupu. Sa ia faamatala mai sa lei musuia e le Alii le fausiaina o se malumalu i lo matou eria, ina ia tuua ai e tagata le eria. O lana fautuaga ia i matou sa faigofie ae loloto:

1. Fausia Siona i o matou loto ma aiga.
2. Ia avea o se faaitaiga ia i latou o loo tatou nonofo faatasi.
3. Taulai atu i sauniga o le malumalu ma mataupu faavae o loo aoao mai iina.

Sa matou faapelepele i le fautuaga a Elder Lee ma taumafai loa e mulimuli i ai i lo matou aiga.

I le fausiaina o Siona i o tatou loto ma aiga, e tatau ona tatou faamamafa atu le tausia o tulaga faalelotu i le aiga e ala i tatalo faaleaiga i aso taitasi ma le suesueina o tusitusiga paia ma e ala i le faia o afiafi faaleaiga i vaiaso taitasi. I leni tusiga e mafai ona tatou aoao atu ma aoaoina a tatou fanau. Tatou te faia leni mea i le alofa ma le agalelei, aloese mai le tele o le faitioina o a tatou fanau ma o tatou taitoalua.

E tusa lava po o fea o tatou nonofo ai ma e tusa lava pe afai o tatou faia mea uma i le sao, o nisi o fanau e faia ni filifiliga le lelei e taitai atu i ala faasaina. O lea la, e taua le fesoasoani i o tatou tagata talavou e iloa muamua mea o le a latou tautatala ai po o mea latou te faia pea fautuaina e isi ni uiga le talafeagai ma le le mama.

Sa auai la maua fanau i aoga ia e na o le toalua pe toa-tolu ni fanau o le AAG [e auai ai]. I le amataga o tausaga faaleaoaoga taitasi, ma a o lei amataina gaoioiga a le aoga, matou te talanoaina i le afiafi faaleaiga tali talafeagai pe afai

latou te maua i latou lava i tulaga fetuutuunai. Sa ma fesili atu ia te i latou po o le a le latou tala e fai atu i uo e ono tau atu ia i latou e, “Aua le faavalevalea, e faia e tagata uma,” “E le iloa e ou matua”, po o le “E le afaina le na o le tasi lava.”

Sa matou talanoa e uiga i la matou tali atu i le Alii.

Sa ma faailoa atu tatou te mulimuli i faataitaiga a Keriso pe a tatou ofu i ofu talafeagai, faaoga gagana mama ma le talafeagai, ma aloese mai ponokalafi, lea e manaomia nei ona aoaoina e tamaiti o le vaitausaga o le Peraimeri ina ia mafai ona latou maua se olaga mama.

Na matou talanoa e uiga ia Iosefa o Aikupito, o le na sola ese ina ua fetai ai ma taulaiga le talafeagai mai le toalua o Potifara (tagai i le Kenese 39:7–12).

O ma fanau taitoatasi e le itiiti ifo ma le tasi se mea na tupu lea na taua ai leni sauniuniga, ae o le tele lava o taimi sa puipuia i latou e a latou uo ona sa latou iloa o latou tulaga faatonuina ma talitonuga.

Ina ua valaau mai lo ma afafine, o Kathryn, i lona tina i le mavae ai o le alu ese atu i le kolisi, e tau atu e Maria ia te ia

*E mafai ona
tatou tausia ni
fanau amiotonu
e toeitiiti lava i
soo se vaega o le
lalolagi pe afai
latou te maua
ai se faavae
mausali ia
Iesu Keriso
ma Lana
talalelei.*



mea na te fiafia i ai e uiga i le Faaola. E faaoga soo e Maria Ana faataitaiga ma uiga tauleleia e fesoasoani ai i le faafitauli na valaau mai ai Kathryn e talanoaina.

Ou te talitonu e mafai ona tatou tausia ni fanau amiotonu e toetoe lava o soo se vaega o le lalolagi pe afai latou te maua se faavae mausali ia Iesu Keriso ma Lana talalelei. Na faamatala e Nifae le aoaoina o lona aiga ma le nuu faapea, “Ma ua matou tautalatala e uiga ia Keriso, ua matou olioli ia Keriso, ua matou talai atu Keriso, ua matou vavalu e uiga ia Keriso, ma ua matou tusitusi foi e tusa ma a matou valoaga, ina ia mafai ona iloa e a matou fanau po o le a le puna e mafai ona latou tepa taulai i ai mo se faamagaloga o a latou agasalā” (2 Nifae 25:26).

Afai tatou te faia lenei mea, pe a faia e a tatou fanau ni filifiliga le lelei, o le a latou iloa o mea uma e le o leilolua ma e mafai ona latou maua lo latou auala i le aiga. Ou te manao e faamautinoa atu ia te oe e faapea o oe ma lou aiga o le a faamanuiaina a o e taumafai e faamalosi tagata taitasi o lou aiga e ala i le faatuatua i le Alii o Iesu Keriso.

Afai tatou te mulimuli i fautuaga a Elder Lee e avea ma se malamalama ia i latou o tatou nonofo faatasi, e le mafai ona tatou nanaina o tatou tulaga faatonuina. O a tatou amio e tatau ona atagia ai o tatou tulaga faatauaina ma talitonuga. Pe a talafeagai ai, e tatau ona tatou auai i gaioiga faitele.

O le ola agavaa mo se pepa faataga o le malumalu, mauaina o sauniga o le malumalu, ma le faamaoni i a tatou feagaiga tatou te maua ai le taulai atu ma le vaaiga mamao e tumau ai i le ala o le feagaiga. Pe a ola agavaa o tatou talavou e faataunuu papatisoga mo e ua maliliu, o le a faatulaga lelei o latou olaga.

E tatau ona taulai atu lo tatou malosi i le faamalosi o tatou aiga e ala i le talanoa, olioli, talai atu, ma vavalu atu ia Keriso ina ia mafai ona tatou olioli i le tau i aiga amiotonu ma avea ma aiga e faavavau.

Mo i latou e le'i faia ni toalua ae o loo ola i ni olaga amiotonu, o la tatou aoaoga faavae e mautinoa: “O tagata faamaoni o le ekalesia o o latou tulaga e le faatagaina ai i latou e maua faamanuiaga o le faaipoipoga e faavavau ma le tulaga faamātua i lenei

O le alofa o le elemene autu i le fiafia i lenei lalolagi.



olaga, o le a mauaina faamanuiaga folafolaina uma i le faavavau, pe afai latou te tausia feagaiga sa latou osia ma le Atua.”³

O Le Tau i le Fiafia

“O a ni tulaga lelei e tatau ona ou tuuina atu i la’u fanau ina ia fiafia ma faamanuiaina i le olaga?”

Ua fatuina e Lusifelo se taufaasese po o le faatosina o le fiafia e le ogatasi ma le amiotonu ma o le a taitai sese ai i tatou pe afai tatou te le mataala. O le tele o o tatou faafitauli i le aso e tutupu ona ua saili e le lalolagi faaletino se faauigaga le sao o le fiafia. Ua tatou iloa mai le Tusi a Mamona na i ai lenei faafitauli i tupulaga uma. Ua tatou iloa foi faamanuiaga e oo mai i le ola ai i poloaiga.

Ua taua e le Tupu o Peniamina, “Ou te manao ia outou manatunatu i le tulaga manuia ma le fiafia o i latou o e e tautasi i poloaiga a le Atua. Aua faauta, e faamanuiaina i latou i mea uma, i mea uma faaletino ma faaleagaga; ma afai latou te tutumau i le faamaoni e oo i le iuga, e talia i latou i le lagi, ina ia mafai ona latou mau faatasi ma le Atua i se tulaga o le fiafia e le gata. E, ia manatua, ia manatua lava ua moni nei mea; ona ua fetalai mai ai le Alii le Atua” (Mosaea 2:41).

I le tele o tausaga ua ou mulimuli i se galuega faaletino o le sailiiliga lea na amata i le 1930. I le amataga, o le suesuega e aofia ai alii e 268 i se tasi o iunivesite sili ona lelei o e na suesueina e le aunoa i o latou olaga atoa. Mulimuli ane, na avea tamaitai ma vaega o le suesuega. O le suesuega na aofia ai pe tusa ma le 70 tausaga. O le sini o le uluai suesuega o le sailia lea o le tele o mea e mafai ona maua e uiga i le faamanuiaina ma le fiafia.

Na faaali mai i le suesuega o togi ulufale mo le kolisi ma le togi averesi e le i muai iloa uma ai le

faamanuiaina po o le fiafia mulimuli ane i le olaga. Ae o se tasi o eria lea sa i ai se faamaopoopoga maualuga o le fiafia faaleaiga o le olaga faatamaitiiti. O tagata matutua fiafia ma faamanuiaina e masani ona lipoti mai sa faaleo atu e o latou tina le alofa ma le fiafia ma sa lei faaaogaina ni aoaiga ogaoga. O o latou matua uma e lua sa faaali atu i le faaletino le fealofani ma le tasi ma na avanoa ma fiafia ia latou fanau, lea na latou maua ai ni sootaga o fesootaiga mafanafana ma le faalelagona. Na fatuina e matua se siosiomaga o le aiga mautu ma sa talitonu na faaalologia le filifiliga saoloto a a latou fanau.

O se tusi faaii i le suesuega na lolomi i le lipoti o le 2012: “O le fuataga tele o le manuia i le olaga atoa e muai iloa le itiiti o le ola faalagolago e ala i le manuia vave i maea tautupe ma agafesootai nai lo se olaga faatamaitiiti alofagia ma alofaina.” O se olaga faatamaitiiti mafanafana e uunaia le tele o mea e ausia nai lo le atamai, vasega masani, po o se tagata malosi. Na maua foi e suesuega “o le mea e sao ona faia i le olaga faatamaitiiti e sili atu ona vave ona iloa ai le lumanai nai lo le mea e sese ona fai.”⁴

O le suesuega atoa ua faailoa mai ai e tusa lava pe o i ai ni luitau iloga ma sese tele nisi o mea, e toatele fanau e malolosi, ma e mafai e le faatuatua ona fausia sootaga alofa ma matua, aemaise le tina, ona



O le manuia moni i lenei lalolagi e oo mai le paleni o le tausiana o o tatou aiga a o alofa foi ma auauna atu i le Faaola.

i ai taunuuga o le fiafia tumau, i le olaga atoa. O le mea na malie ia te au, ae e lei maofa ai, o le suesuega na fetau lelei ma tusitusiga paia ma mea e aoao e le Ekalesia e uiga i le aiga. O loo faamamafaina mai e le Ekalesia afiafi faaleaiga, tatalo faaleaiga, faaali atu o le alofa, o faatasiga faaleaiga, ma tu ma aga faaleaiga, o ituaiga ia o gaoioiga na tauina mai i le suesuega e maua ai tagata matutua fiafia ma faamanuiaina.

Sa amata e Nifae le Tusi a Mamona i le faaalii o le agaga faafetai mo “matua lelei” (1 Nifae 1:1), ae o le lesona moni lava tatou te iloiloina taitoatasi le ituaiga o matua o le a avea ai i tatou ina ia mafai e a tatou fanau ona lipoti fiafia ua latou fananau mai foi i ni matua lelei.

O le mea e aupito sili ona taua e mafai ona e faia ina ia mautinoa e iloa e lau fanau ma i latou e te faa-faileleina e te alofa ia i latou. O le alofa o le elemene autu i le fiafia.

O le Taii o le Manuia i le Lauleele

“E le’o ausia e lo matou aiga le manuia faaletino maoae. Pe o lena mea ona e le o lava lo matou amiotonu?”

O tusitusiga paia e manino o le ola ai i poloaiga e faataga ai i tatou e faamanuiaina i le laueleele. Ae sei ou faamautinoa atu ia te oe o le faamanuiaina i le laueleele e le o faauigaina e ala i le tele o lau teugatupe i le faletupe. E i ai se uiga tele atu nai lo lena.

I le talanoa atu i lona atalii o Helamana, na aoao mai le perofeta o Alema, “O le tulaga e oo i ai lau tausiga o poloaiga a le Atua o le a e manuia i le laueleele; ma e tatau foi ona e iloa, e faapea o le tulaga e oo i ai lau le tausiga o poloaiga a le Atua, o le a vavae ese oe mai ona luma” (Alema 36:30).

O lea la, o le mauaina o le Agaga i o tatou olaga o le elemene autu i le faamanuiaina i le laueleele. Afai tatou te tausiga poloaiga, tatou te maua foi folafolaga patino faapitoa (tagai i le Efeso 6:1–3). Mataupu Faavae ma Feagaiga vaega e 89, mo se faataitaiga, o folafolaga, e ala i le ola ai i le Upu o le Poto, o le a tatou olioli i faamanuiaga o le soifua maloloina ma oa sili o le malamalama.



*O le tauī aupito taua
o le amiotonu o le “filemu
i lenei lalolagi.”, ma le
ola e faavavau i le lalolagi
a sau”*

Faasea o se tasi o elemene o le Upu o le Poto, aloese mai le ava malosi, o se aoaoga. Sa maua e le suesueina faaumiumi na ou ta’ua muamua o le sauaina i le ava malosi e aafia ai le toatasi o aiga Amerika mai i le tolu, e aofia ai le kuata o tagata e tuuina atu i falemai aoao, ma o se mafuaaga atu o oti, o le tatalaina o faaipopoga, soifua le lelei, ma le faaitiitia o mea e ausia.

O se suesuega mo se taimi umi o tagata toaaga o le Ekalesia i Kalefonia na maua ai o tamaitai e ola i le averesi 5.6 tausaga ma o alii o le 9.8 tausaga e sili atu ai nai lo le faatusalia i tamaitai ma alii o le I.S. Na faailoa mai e fomai na faatautaia le suesuega e le itiiti ifo ma se tasi le mafuaaga, o le usitaia o le Upu o le Poto. O le ola ai i le Upu o le Poto e mafai ai ona tatou manuia i le laueleele.⁵

I se ma talanoaga ma Peresitene Gordon B. Hinckley (1910–2008) i se vaalele i le faapaiaga o se malumalu, sa ia fiafia ma lipoti mai faapea ua i ai i le Ekalesia tupe o le a faateleina ai le aofai o malumalu aua sa faamanuiaina le Au Paia o Aso e Gata Ai i le laueleele. I le avefa ai ma tagata totogi sefuluai faamaoni, ua latou tuuina atu punaoa e fausia ai malumalu.

O le faamanuiaina ma le tamaoaga e le tutusa lava. O se faauigaga sili atu o le faamanuiaina i le laueleele o le mauaina lea o mea ia lava mo o tatou manaoga a o maua le anoanoai o faamanuiaga o le Agaga i o tatou olaga. Pe a tatou tausua o tatou aiga ma le alofa ma auauna atu i le Faaola, o le a tatou olioli i le tauī o le mauaina o le Agaga ma le manuia i le laueleele.

O Le Tauī o le Filemu

Na folafola mai le atoatoa o le tauī o le amiotonu ua faatulaga manino mai i le Mataupu Faavae ma Feagaiga

59:23: “Ae ia iloa o [le] e faia galuega o le amiotonu o le a maua [lona] tauī, o le filemu lea i le lalolagi lenei, ma le ola faavavau i le lalolagi a sau.”

E silia ma le 35 tausaga talu ai, na aoao mai ai Peresitene Kimball o le faatupulaia atu o le a tupu i le Ekalesia ona o le toatele “o tamaitai lelei . . . o le a tosina mai i le Ekalesia i ni vaega toatele.” Na ia folafola mai, “O le a tupu lenei mea i se maualuga e faapea ona atagia mai ai i tamaitai o le Ekalesia le amiotonu ma le tulaga lelei i o latou olaga . . . oni tamaitai iloga ma le tulaga ese—ini tulaga fiafia—mai tamaitai o le lalolagi.”⁶

O lenei mea na tupu moni lava, ma o le a faaauau pea ona faia faapea i le lumanai.

O le Alii le Atua e moni lava o se la ma se talita, ma o le a tuuina mai le alofa tunoa ma le mamalu. E leai se mea lelei o le a taofia mai ia i latou e savavali sa’o (tagai i le Salamo: 84:11). O la’u tatalo ina ia mafai ona outou selesese tauī o le amiotonu a o outou mulimuli ma le faamaoni i lo tatou Alii ma le Faaola o Iesu Keriso. ■

Mai se saunoaga, “The Rewards of Righteousness,” na tuuina atu i le Konafesi a Tamaitai o le BYU i le aso 2 o Me, 2014.

FAAMATALAGA

1. Tagai Spencer W. Kimball, “O Atua Sese o loo Tatou Tapuai i Ai,” *Liahona*, Aokuso 1977, 2–4.
2. Tagai i le Lane Anderson, *Deseret News*, “The Instagram Effect: How the Psychology of Envy Drives Consumerism,” Ape. 15, 2014, C7.
3. *Tusitaulima 2: Taitaiina o le Ekalesia* (2010), 1.3.3. Na toe faamaunioa mai e Peresitene Boyd K. Packer, Peresitene o le Korama a Aposetolo e Toasefululua, lenei mea i lana saunoaga i le konafesi aoao ia Aperila 2014, “O Le Molimau,” *Liahona*, Me 2014, 94–97.
4. George E. Vaillant, *Triumphs of Experience: The Men of the Harvard Grant Study* (2012), 108–9.
5. Tagai James E. Enstrom and Lester Breslow, “Lifestyle and Reduced Mortality among Active California Mormons, 1980–2004,” *Preventive Medicine*, vol. 46 (2008), 135.
6. Tagai Spencer W. Kimball, “Le Matafaioi a Tamaitai Amiotonu,” *Ensign*, Nov. 1979, 103–4; tagai foi i le *Aoaoga a Peresitene o le Ekalesia: Spencer W. Kimball* (2006), 223.

A man and a woman are walking away from the camera on a railway track. They are holding hands and looking towards the horizon where the sun is setting. The sky is filled with golden light and clouds. The tracks lead straight ahead into the distance.

*O mataupu faalelotu ma faalemalo
e femalagaa'i i auala eseese ae
e agai i le itu e tasi. E sili atu
ona faamanuiaina ma sili atu
ona aoga i laua pe a la pui'puia
ma uunaia le tasi ma le isi.*



Mataupu Faalelotu & Faalemalo

O mataupu faalelotu ma faalemalo e pei o se ulugalii e i ai nisi o taimi e faigata ai ona nonofo faatasi ae la te iloaina e le mafai lava ona la nonofo eseese. E manaomia uma e mataupu faalelotu ma faalemalo lo la tutoatasi ina ia olaola, ae ua faaalua mai e le talafaasolopito o le tatalaina maeaea o se faaipogoga e le maloloina mo [itu] uma e lua. E la te femalagaa'i i auala eseese ae e agai i le itu e tasi. E sili atu ona faamanuiaina ma sili atu ona aoga i laua pe a la puipuia ma uunaia le tasi ma le isi.

O malo e i ai se matafaioi taua i le puipuia ma le faatumauiina o le saolotoga o mataupu faalelotu ma i le atiina ae o le matafaioi a ekalesia i le lalolagi. O le mea e lelei ai, o le tele lava o malo i le lalolagi i aso nei ua iloa ni nai tikeri o le saolotoga o mataupu faalelotu ma faamautinoa atu i o latou tagatanuu le aia tatau e tapuai ai ma faatino ai la latou tapuaiga e tusa ai ma le taitaiga o o latou lava lotofuatiaifo. E lei i ai lava i taimi uma le tulaga lena.

Ua vaaia e le tele o augatupulaga le aveesea o le saolotoga lea e iu ai pe a faamalosia e le malo se lotu faaleatanuu. O isi ua aafia i le faatoilaloina o aia tatau lea e sau faatasi ma le taofia faalemalo o mataupu faalelotu uma. Matou te faafetai ona o le tuputupu ae tele o faavae o atunuu i le lalolagi i aso nei ua vaaia faalemafaufau se sosaiete lea e i ai talitonuga ma faatinoga faalelotu, e ui e ese mai le faalemalo, e tatau ona puipuia ma saogalemu mai i sauaga.¹

O le malo ua musuia mai le lagi ua faamatalaina i le Tusi a Mamona na mafai ona maua lenei saolotoga o talitonuga ma fatinoga faalelotu i ona tagata:

“O lenei afai ua manao se tagata e auauna i le Atua, o lana aia lea; pe, afai ua talitonu o ia i le Atua o lana lava aia lea e auauna atu ai ia te ia; ae afai e le talitonu o ia ia te ia sa leai se tulafono e faasala ai o ia. . . .

“Ona sa i ai se tulafono ia faamasinoina tagata e tusa ma a latou solitulafono. E ui i lea, sa leai se tulafono e faasaga i talitonuga o se tagata” (Alema 30:9, 11).

I le avea ai ma tagata o le faatuatua e tatau ona tatou faafetai mo puipuiga faalemalo lea e faatagaina i tatou e opo ma faatino lo tatou talitonuga faalelotu a o tatou mananao ai.

O le Matafai o Tausa o Mataupu Faalelotu

Atonu e itiiti le manino i nisi e faapea o mataupu faalelotu ma le ola mama e i ai se matafai o tausā i le faatumauina ma le siitiaina o le lelei ma le mataalia faalemalo. Pau lava le tali moni i le tele o faafitauli ogaoga e faasaga i lo tatou lalolagi i aso nei o le faaleagaga, e le o le faapolokiki po o le tamaoaiga. Faailoga lanu, sauaga, ma le ita i solitulafono, mo se faataitaiga, o faafitauli faaleagaga, ma na o le pau lava le fofu moni o le faaleagaga. Na aoao mai Elder Dallin H. Oaks o le Korama a Aposetolo e Toasefululua:

“O le tele o le agai i luma o amioga lelei e aupito sili ona tausā i le sosaiete i Sisifo ua faaosofia e mataupu faavae faalelotu ma faatosinaina e faaoga aloaia ona o talaiga i le pulelaa. O faataitaiga e aofia ai le faatamaiaina o le fefaa-tauaiga o pologa i Egelani ma le Folafofoga o le Saolotoga i [le Iunaite Setete]. E moni foi lena mea i le finauina o Aia Tatau o tagata o le Malo i le afa seneturi ua mavae.”²



O LE UUNAIGA TAUA O TALITONUGA FAALELOTU

“E le o tuufaatasia lo tatou sosaiete e nao ona tulafono ma ona tulaga faamalosi, ae o le mea aupito sili ona tausā ia i latou o e ofoina e usiusitai i le manatu e le faamalosi ona o lo

latou tulaga masani o le amiotonu ma amioga sa’o. O le talitonuga faalelotu i le mea sa’o ma le mea sese o se aafiaga tausā e maua ai na ofo fua atu o le usiusitai e se aofaiga toatele o o tatou tagatanuu.”

Elder Dallin H. Oaks o le Korama a Aposetolo e Toasefululua, “Strengthening the Free Exercise of Religion,” saunoaga na fofogaina i Le Becket Fund for Religious Liberty Canterbury Medal Dinner, Aai o Niu Ioka, 16 Me, 2013, 1; o loo maua i le mormonnewsroom.org.

E faalagolago sosaiete i vaega tetele i luga o mataupu faalelotu ma ekalesia e atiina ae faatulagaga lelei. E le mafai lava e le malo ona fausia ia lava falepuipui e nonofo ai tagata solitulafono ua fua mai i se sosaiete e le lava tulaga faatonuina, o amioga, ma le faatuatua. O nei uiga e sili atu ona uunaia i le usiusitai i mataupu faalelotu nai lo tulafono faalemalo po o malosiaiga faaleoleo. E le mafai e le malo ona pulea ia uiga faaalua, manaoga, ma faamoemoega e puna mai le loto o le tagata. Ae peitai o fatu ia e tutupu ae i totonu o le amio e tatau ona pulea e le malo.

O le tusitalafaasolopito ma le tamalii o Farani o Alexis de Tocqueville na tusia, “E mafai ona pulea faaletaitai saua e aunoa ma le faatuatua, ae e le mafai e le saolotoga.”³ Ma e oo lava i le pulega faaletaitai saua e le mafai ona faavavau le puleaina e aunoa ma le faatuatua. Aua e pei ona matauina e Boris Yeltsin, o le uluai peresitene o le Malo o Rusia, “E mafai ona e fausia se nofoalii i ni pelu, ae e faigata ona [e] nofo ai i luga.”⁴

I le Lauga i luga o le Mauga, na faatusatusa ai e Iesu le tulafono ua tusia i le tusi ma le tulafono ua tusia i le loto.

“Ua outou faalogo, na fai mai i e anamua, Aua e te fasioti tagata; ai se fasioti tagata e nofo sala o ia i le faamasinoga:

“A o a’u, ou te fai atu ia te outou, ai se ita fua i lona uso, e nofo sala o ia i le faamasinoga” (Mataio 5:21–22).

E ui o malo e faamalosi le tulafono ua tusia i luga o tusi, e aoaoina ma uunaia e mataupu faalelotu le usitaia o le tulafono ua tusia i le loto. O i latou e usiusitai i le mulimuli e seasea lava solia le [tulafono] muamua. A o tatou faitau i le Mataupu Faavae ma Feagaiga, “O ia o le e tausā tulafono a le Atua e leai se mea e manaomia ai e ia ona soli o tulafono o le laueleele” (58:21).

Ae pe a le amanaiaina mataupu o le loto, o tulafono aloaia ua faavaeina ma tulafono faalemalo o le a iu lava ina le toe mataalia le faagaoioia. O le faaaloalo i le sosaiete e ausia pe a faia e le toatele o tagata mea mama ona ua latou talitonu e tatau ona latou [faia], e le ona ua poloaiina ai i latou e le tulafono po o le malosiaiga o leoleo.

E vaavaaia e le malo amio a ona tagatanuu. E na te taumafai ia latou amioa’i i se auala lelei ma mama. O mataupu faalelotu, e taumafai i le isi itu, ia latou *mananao* ia amioa’i i se auala lelei ma mama. Na aoao mai e Peresitene



Ua uunaia i tatou e suesue ma le faaeteete ia mataupu ma sui tauva, ma ia palota mo tagata o e tatou te talitonu o le a faatinoina ma le amiosa'o.

lo le isi. O ona sui e tatau ona saoloto e talitonu ma faatino e tusa ai ma le taitaiga a o latou lava mafaufau. E ala i lea faailoga e tasi, e le tatau foi i lotu lelei ona faamaonia pe tetee i soo se vaega faapolokiki po o sui auai. Ma o ona tagata talitonu e tatau ona saoloto ma faamalosiaina foi e auai i le faagasologa faaupufai ma lagolago po o le fea o pati po o tagata latou te manatu e sili ona lelei.

Fai ia Lagona Lou Leo

A o le Ekalesia, i le avea ai ma faalapopotoga, ua faafia ona faamautu mai lona tutoatasi faapolokiki, e fautuaina le Au Paia ina ia auai i le faagasologa faaupufai ma faapoopo atu o latou leo i talanoaga lautele. O se vaega o la tatou tapuaiga le avea ai ma tagatanuu lelei po o fea lava tatou te nonofo ai.

Tusitaulima 2: Taitaiina o le Ekalesia e faapea, “E tusa ai ma tulafono a o latou malo, e fautuaina tagata o le ekalesia ina ia lesitala e palota, ia suesue maeaea i mataupu ma sui tauva, ma ia palota mo tagata ua latou talitonu o le a galulue ma le amiosa'o ma le faautautaga potu. Ua i ai i le Au Paia o Aso e Gata Ai se matafaioi faapitoe e saili, palota, ma lagolagoina taitai o e faamaoni, lelei ma faautauta (tagai i le MF&F 98:10).”⁷

O le a i ai se aso o le a toe afio mai ai le Faaoia. O Lana aia tatau e pule ai ma nofotupu i le avea ai ma Tupu o tupu *ma* lo tatou Faitaulaga Sili silisili. Ona tuufaatasia lea o le puleaga aoao faalemalo ma le mana o le perisitua e avea ma [pulega] e tasi.

Seia oo i lona aso tele, e tatau i mataupu faalelotu ma faalemalo ona savavali faatasi i lalo o le ala o le talafaasolopito o tagata—e taitoatasi ma faaaloalo i le tutoatasi o le tasi, ma talisapaia le saofaga taua o le tasi ma le isi. ■

FAAMATALAGA

1. Tagai W. Cole Durham Jr., Silvio Ferrari, Cristiana Cianitto, Donlu Thayer, eds., *Law, Religion, Constitution: Freedom of Religion, Equal Treatment, and the Law* (2013), 3–5.
2. Dallin H. Oaks, “Strengthening the Free Exercise of Religion,” saunoaga na fofogaina i Le Becket Fund for Religious Liberty Canterbury Medal Dinner, Aai o Niu Ioka, Me 16, 2013, 1; o loo maua i le mormonnewsroom.org.
3. Alexis de Tocqueville, *Democracy in America*, 2 vol. (1835–40), 1:306.
4. Boris Yeltsin, i le Donald Murray, *A Democracy of Despots* (1995), 8.
5. Ezra Taft Benson, “Faanuina i la le Atua,” *Ensign*, Fep. 1985, 6.
6. Edmund Burke, *A Letter from Mr. Burke, to a Member of the National Assembly; in Answer to Some Objections to His Book on French Affairs*, lom. 2 (1791), 69.
7. *Tusitaulima 2: Taitaiina o le Ekalesia* (2010), 21.1.29.

Ezra Taft Benson (1899–1994), o se sui kapeneta i lalo o le Peresitene o le I.S o Dwight D. Eisenhower, lenei tulaga ese e aupito sili ona taua:

“E galue le Alii mai totonu agai i fafo. O le lalolagi e galue mai i fafo agai i totonu. E mafai e le lalolagi ona aveesea tagata mai faatafunaga. O Keriso e aveesea lagona le taua mai totonu o tagata, ona latou aveeseina lea o i latou lava mai faatafunaga. Atonu e mafai e le lalolagi ona faaliliuina tagata e ala i le suia o lo latou siosiomaga. E suia e Keriso tagata, ona suia ai lea e i latou lo latou siosiomaga. Atonu e mafai e le lalolagi ona suia amioga a tagata, ae e mafai e Keriso ona suia le natura o le tagata.”⁵

I le aluga o taimi o malo saoloto uma e tatau ona iu ina faalagolago atu i le agalelei o le lotofuataiafo ma le lagolago o o latou tagatanuu. I le avea ai o se tamalii taualoa ma faafilosofia faalemalo, na faapea mai Edmund Burke, “Ua faauuina i le faavae e faavavau o mea, o tagata o loo i ai mafaufau e le lava le puleaina e le mafai ona faasao-lotoina. O o latou tuinanauga ua mamanuina ai o latou maea uamea.”⁶

Mo lona mafaufau, o malo lelei e puipuia mataupu faalelotu ma uunaia le saolotoga o tapuaiga faalelotu. Ma o mataupu faalelotu lelei e uunaia ia tagatanuu lelei ma faalogo atu i tulafono o le laueleele.

E le manaomia e malo lelei ona faia le faaituau. E le tatau ona sili atu lona uunaia pe fiafia i le tasi lotu i

OU TE LE FAIMAMAGO LAVA

Ao avea ai ma se tausaga muamua i le kolisi, sa masani ona ou le fiafia i tamaiti o la’u vasega. O lona mea ona o le toatele o i latou e faimamago i le taimi o suega. O nisi e nana a latou tusitusiga i totonu o le vasega. O nisi e tesi atu tali i isi. O nisi e kopi mai tali mai i uo i le vasega.

O i latou sa faimamago sa mauauluga atu togi i taimi uma nai lo au. E ui i lea, sa le’i faaosoosoina au e auai atu ia i latou. Ou te tuu pea i lo’u mafaufau ma le loto, e sili atu le maua o se togi maualalo e tusa ai ma au taumafaiga nai lo le maua o se togi maualuga i se tulaga le faamaoni.

Afai ou te faimamago, ou te le o faia se faataitaiga mo i latou. Ou te le o ola i se auala e mafai ai ona ou faasoa atu le talalelei a Iesu Keriso ia i latou. Ou te le o faaali atu ia i latou e moni le Ekalesia.

I se tasi aoauli sa ou alu i le ofisa o le kesia a le kolisi e fesili i ai e uiga i lau paleni o le pili o loo totoe. Sa manaomia ona ou totogiina uma lau pili a o lei mafai ona ou sue i le suega faaii i le vaiaso e sosoo ai. A o ou savali, sa ou popole e uiga i le mea o le a ou maua ai le tupe na ou manaomia. Mo se tamaitiiti aoga e faalagolago ia te au lava ia, sa utiuti mea tau tupe.

Ina ua ou taunuu i le ofisa, sa ou fesili atu i le kesia pe fia le mea o loo manaomia ona ou totogiina.

“E te le toe totogia se mea seia oo ina e faauu,” o lana tala lea.

I le faateia, sa ou fesili i ai pe o ia mautinoa po o sana tala taufaalili.

“Ioe, ou te mautinoa, ma e moni lava au,” o lana tala lea. “O le faufautua fesoasoani na faagaioia se talosaga mo oe e maua ai se

sikolasipi mai se senate. Ua avea nei oe ma se sikola.”

O le faalogo atu i na upu na ou matuai fiafia ai lava. Sa ou faafetai atu ia te ia ma tamoe atu i le ofisa o le faufautua fesoasoani e faafetai i le tagata na faia lea mea.

“E te le tau faafetai mai ia te au,” o le tala lea a le faufautua ina ua uma ona ou fai atu i ai i lou faafetai tele ma le fiafia. “Sa na o au o se mea faigaluega.”

Ina ua ou alu ese, na ou manatua le mau ou te fiafia lava i ai e faasoa atu: “Ma amuia lava o ia o le e maua o faamaoni i lou igoa i le aso gataaga, ona o le a sii ae o ia i luga e mau i le malo ua saunia mo ia mai le faavaega o le lalolagi. Faauta foi, o au lava [Iesu Keriso] o le ua tautala atu” (Eteru 4:19).

E ala i le faia o le mea sao, sa ou faaalua lou faamaoni i le tausaiaina o poloaiga a lo tatou Tama Faalelagi—e oo lava i se tulaga lea sa masani ai i le le faamaoni. Ou te iloa e ala i le tu mausali i lo’u faatuatua, Na te le tuua lava au.

Ua ou fiafia ua mafai nei ona ou sutesue e aunoa ma ni tupe totogi e popole i ai. Ua uunaia foi au e faaauau pea ona faia le mea sao, e le ona o tau ma faamanuiaga e mafai ona ou mauaina ae ona ou te alofa i le Tama Faalelagi ma Lona Alo, o Iesu Keriso, o le na faia se faataitaiga mo au. ■

Joanna Mae Rangga, Saute Leyte, Filipaina

Na maua e tamaiti o la’u vasega o e faimamago i taimi uma se togi maualuga atu nai lo au. E ui i lea, sa le’i faaosoosoina au e auai atu ia i latou.





Sa ou matuai manao lava e ofuina le ofu faaiipoipo a lo'u tina ina ua oo mai le aso o la'u faaiipoipo.

O LE OFU FAAIPOIPO A LO'U TINA

Sa ou teineitiiti ina ua ou vaai muamua i le ofu faaiipoipo a lo'u tina. Sa afifi ma le faaeteete i totonu o se atigipusa, ma ou te manatua le tatalaina ma le agalofa e lou tina ina ia mafai ona ou vaai i ai. O se mea matagofie tele! Sa ou manao tele e ofuina lena ofu pe a oo mai le aso o la'u faaiipoipo.

Na toe tuu ma le faaeteete e lo'u tina [le ofu] ma folafola mai e nonoina mai ia te au i le lumanai. Sa ia fai mai o le ofu o se meaalofa faapitoa mai i lo'u tama. Sa ia foliga ua faamemelo i le alofa ma aulelei i ata o lana faaiipoipo. O o'u matua, e le o ni tagata o le Ekalesia, ae o ni tagata lelei.

Sa ou aoao e uiga i le Ekalesia ina ua ou feiloai atu i le alii o le a avea ma o'u toalua. O lena feiloaiga sa ese lava aua, e ui ina sa le'i toaga i le Lotu, o la ma feiloaiga na tatai atu i le tala o le Uluai Faaaliga. Sa ou iloina le ofoofogia o le tala, ae sa ou le saunia e taliaina.

Ina ua uma ona ma tafafao faamasani mo le 16 masina, na oo mai

le moni o au miti ina ua ou ofuina le ofu faaiipoipo a lou tina faatasi ai ma lona siusiu umi ma savali atu i le ala savali e agai atu i la'u uo. Sa ou faamemelo tele i le alofa. Fai mai le toatele o tagata sa ou pei o lou tina ina ua faaiipoipo.

Na mavae tausaga, ma na ma maua ni atalii se toalua. Ina ua taumafai lou toalua e toe foi i le lotu, sa ou taofia ana taumafaiga. E ui ina sa ou le toaga i le lotu o lou talavou, sa faigata lou taliaina o se isi ekalesia.

Na iu lava ina suia lena mea i le mavae ai o le 19 tausaga o le faaiipoipoina. Na toe foi atu lou toalua i le lotu, ma i le mavae ai o ni nai vaiaso na amata ona ou auai atu faatasi ma ia. Sa vave ona tuputupu ae la'u molimau, ma sa ou papatiso ma faamauina. E lei umi i le mavae ai [o lou papatisoga] o lo'u naunautaiga sili o le saunia o au lava ia ina ia faamauina i lo'u toalua i le malumalu.

Ina ua oo mai le aso fiafia o lo maua faamauga, sa ou toe ofuina le ofu paepae o lo'u tina. O se uo mai le

ekalesia sa fetuunaia ina ia mafai ona talafeagai e ofuina i le malumalu. Ou te ofuina lava iina talu mai lena taimi.

E oo atu i le taimi na malii ai lo'u tama ma sa latalata ona malii lou tina, sa le'i saunia o ia e taliaina le Ekalesia toefuataiina. Ae sa ou tau atu ia te ia le tele o mea matagofie e uiga i le Toefuataiga. Sa ou fai atu foi ia te ia a ia laasia le veli, o le a ia faalogo i le savali o le talalelei moni. Sa ou folafola atu ia te ia, o le a ou ofuina mo ia lo ma ofu ina ia mafai ona fai ma sui e maua sauniga o le malumalu ma faamauina i lo'u tama. Ma sa ou faia.

O lou ofu ua tuai nei, ma ou te iloa o le a i ai se aso o le a le toe mafai ona ou ofuina. Seia oo ina oo mai lena aso, o le a faaauau pea ona ou ofuina ma le alofa—mo lo'u toalua, mo lo'u tina ma lo'u tama, mo tagata o le aiga na ou auauna atu e fai ma sui i le malumalu, mo le talalelei moni, mo au sauniga paia, ma mo lo'u Tama Faalelagi ma Lona Alo, o Iesu Keriso. ■

Angélica Flores Algaba, Querétaro, Meksiko

NA FETALAI MAI E LE ALII LE FILEMU IA TE AU

Sa ma'i le ma tama teine o Carlie mo ni nai aso, ma sa ou manatu e pau lava le mea sa fulu o ia. Ae a o faagasolo ina tigaina o ia, na amata ona ou mafaufau atonu e sili atu ona ogaoga.

Sa faamaonia ma faateleina lou fefe i ana taimi faatulagaina ma le fomai—sa maua Carlie i le ituaiga 1 o le ma'i suka. Ua o'o atu o ia i se koma o le mai suka ma na manaomia ona avatu faatopetope i le falemai. Sa ou tatalo i lo'u loto o le a ou to'a ma o le a mafai ona fesoasoani fomai ia te ia.

Ina ua ma taunuu i le potu mo faalavelave faafuasei, sa vave ona galulue fomai ma tausi mai e taumafai e laveai o ia. Sa ou aioi atu i lou Tama Faalelagi mo le faamafanafanaga ma le filemu.

I se taimi filemu, na tuuina atu e lou toalua ma lona tama ia Carlie se faamanuiaga faaleperisitua. I lana faamanuiaga, na faamautinoa atu e lou toalua ia te ia o le finagalo o lona Tama Faalelagi ia ola o ia. Sa amata ona ou lagonaina le filemu.

Ina ua mavae ni nai itula i le mata-mata atu i fomai a o tui, suesue, ma siaki Carlie mo le faaleleia atili, sa ou lagona le vaivai. Na itiiti ifo le pisi o lona potu i le 1:00 i le vaveao. Sa ou le iloa le mea e faamoemoeina, sa le mafai ona ou moe, ma na ou lagona le tuuatoatasi.

Sa ou toso mai i fafo se kopi o le Tusi a Mamona na aumai e lou uso i le falemai ma tatalo ina ia auina mai e tusitusiga paia ia te au le faamautinoaga na ou manaomia. Na matala le tusi i le Alema 36:3. A o ou faitauina, sa ou lagonaina sa fetalai mai le Alii ia te au: "Ua ou iloa o ai lava e tuu atu lo latou faalagolago i le Atua e lagolagoina i o latou tofotofoga, ma o latou faalavelave, ma o latou puapuaga, ma o le a sii ae i latou i luga i le aso gataaga."

Mo le taimi lona lua i lona po, sa ou lagonaina le filemu. Sa ou iloa sa silafia i matou e le Tama Faalelagi. Sa manao o Ia ia ou iloa o loo i ai o Ia iina ma e manaomia ia ou maua le faatuatua ia te Ia.

Pe a ou mafaufau i mea na tutupu o le aso, sa ou mafaufau i le auala na faamanuiaina ai i matou e le Alii. Sa ou lagonaina se naunautai e ave Carlie i le fomai. Sa taunuu atu i le falemai ma le saogalemu. Sa taunuu vave e na umia le perisitua e tuuina atu se faamanuiaga.

Talu mai lona aso sa fai ma mea masani le siakiina o le suka ma tausiale i ai o meaa mama. Ua matou aoaoina le auala e mafai ai ona aafia le tino i le puleaina o le suka. O loo faaauu pea le avea o le faama'i a Carlie ma luitau, ae ua matou aoao e faalagolago i lo tatou Tama Faalelagi i aso uma.


O le aso lona i le falemai o se aso ou te le manao e toe oo i ai, ae o se aso o le a faavavau pea ona ou faafetai i ai. O se aso o le aoaoga, o le faaogaina o le faatuatua, o le lagonaina o le loto faafetai. Sa ou aoaoina e nofouta le Tama Faalelagi i Ana fanau taitoatasi ma o le a Ia lagolagoina moni lava i tatou i o tatou tofotofoga. ■

Trisha Tomkinson Riggs, Arizona, ISA

Ina ua matou taunuu i le potu mo faalavelave faafuasei, na faavave ona galulue alii ma tamaitai fomai i le taumafaiga e faaola Carlie.



Etoaiva tagata matutua ma fanau e toavalu o le a faasoaina la matou meaai faatauavaa o ni tamai fasi moa e valu, o se ipu araisa, ma se ipu makaroni.



E VALU TAMA'I FASI MOA

Faatasi ai ma lo'u toalua ua le faigaluega, ma le sailia o tupe mo o matou manaoga uma mo se aiga ma se fanau e toalima ua matutua o se luitau. O le aso a o lumanai le faasalalauga o le konafesi aoao ia Oketopa 2013, sa matou siakiina ai a matou sapolai o meaai ma filifili loa o le a matou saunia se taumafataga faigofie o le aoauli o moa falai ma le araisa i le taimi o le malologa i le va o sauniga o le konafesi.

Na oo mai le Aso Sa, ma sa matou sauni uma. O le isi vaega o lo matou aiga lautele, e aofia ai o'u matua ma o'u uso ma o latou aiga na feiloai i le nofoaga autu mo le afa itula a o lei amataina le faasalalauga.

E maoae le olioli ma se faamanuiaga i le faalogo atu i perofeta, tagatavaai, ma talifaaaliga o faasoa mai savali faapitoa mo lo tatou augatupulaga. A o ou faalogo i fautuaga ma fiafia i le agaga matagofie o le filemu ma le alofa sa ou lagonaina mai lo'u

Tama Faalelagi, sa ou maua le faamautinoaga o le a lelei mea uma, o le a taulimaina manaoga faaleagaga ma faaletino a lou aiga, ma afai ae faauau pea ona faaagaina le faatuatua ma ia tuu atu i lo'u Faaola e taitaiina [lou olaga], o le a tuusaolotoina i matou mai i maea o le mativa ma isi faigata.

O le fiafia ai i le agaga matagofie o lena Aso Sapatu, na galo ai ia te au le meaai o le aoauli. Faatoa ou iloa lava ina ua oo mai le taimi o malologa i va o sauniga e toa 17 i matou. E toaiva tagata matutua ma fanau e toavalu o le a faasoaina la matou meaai faatauavaa o ni tamai fasi moa e valu ma se ipu araisa, faatasi ai ma se ipu makaroni na aumai e se tasi o ou uso.

Na faia e Henry e valu tausaga le matua le tatalo faafetai ma se faamanuiaga mo a matou meaai, ma talosagaina ia tagata uma o le a taumamafaina ia maoona. Ona ou tofitofi lea o fasi moa taitasi i ni vaega laiti ma

tuuina atu i le fanau a o tuuina e lou uso le makaroni ma le araisa i luga o a latou ipu. Na le mafai ona ou taofia ou loimata mai le maligi a o ou iloina na matou lava i vaega laiti tai tasi mo tagata uma ma le vaega faasili e tasi i le maea ai ona tofitofi uma fasi [moa] ma le makaroni ma le araisa na vaevaeina ia i matou. Ona matou aai uma ai lea—ma sa maoona.

Sa ou fai atu i o'u matua ma lo'u toalua, lea ua ou iloa ma le mautinoa sa tofitofi moni lava e le Faaola areto e lima ma i'a e lua ma fafagaina ai se motu o tagata e "limagaafe o tane, a e lei faitaulia fafine ma tama iti" (tagai i le Mataio 14:14–21). O nisi o le au faitio ma e le talitonu na faapea mai o le vavega o se atalilo, ua faatele, pe e le mafai ona tupu. Ae ia te au ma lo'u aiga, e moni le tala e pei ona tusia.

Sa faafogaina e le Tama faalelagi le tatalo a se tamaititi faamaoni o le na tuuina atu le faafetai ma talosagaina le faamanuiaga o e uma e taumamafa ai o le a maoona ma maua le tausiga tatau.

A o matou toe foi atu i le fale faafiafia mo le konafesi aoao, sa ou lagonaina le malosi o le agaga. Sa ou lagona le pei ua ou i ai i le motu o tagata na fafagaina e Iesu, ua naunau e nofo ma aoao mai ia te Ia o le e folafola mai e faapea afai tatou te gauai atu ma faalogo, o le a tatou le toe fia aai pe fia feinu (tagai i le Ioane 6:35).

Faatasi ai ma le ma fanau sa matou nonofo filemu i a matou nofoa i totonu o le falesa ma sauni atu e faalogo i auauna filifilia a le Tama Faalelagi. O se vaega o le a matou manatua pea. ■

Abigail Almeria, Cebu, Filipaina

FAATUMULIA I LE
OLA & MALOSI



Saunia e Randal A. Wright

Vaai faalemafaufau mo sina taimi, ua oo mai se uo ia te oe e saili se fautuaga i auala e maua ai faaaliga faaletagata lava ia. Pe ana mafai ona e fautuaina atu na o se manatu se tasi, o le a lena [manatu]?

I le avea ai o se Pulega Aoao fou, na lagona e Elder Marion G. Romney (1897–1988) le le agavaa i le faataunuuina o lona valaauga taua, o lea sa ia saili ai se fautuaga mai lana uo o Harold B. Lee (1899–1973) o le Korama a

Aposetolo e Toasefululua. O le fautuaga na ofoina atu i lena aso na faateia ma uunaia ai Elder Romney. Sa saunoa Elder Lee:

“Afai o le a faamanuiaina oe o se Pulega Aoao, o le a manaomia ona e musuia. O le a manaomia ona e mauaina faaaliga. O le a ou tuu atu ia te oe se fautuaga se tasi:

Alu vave e moe ma ala vave i luga.

Afai e te faia, o le a maloloina lou tino ma le mafauafau ma i na itula filemu o le taeao po, o le a e maua ai vaaiga o musumusuga ma malamalamaaga nai lo se isi lava taimi o le aso.”

I le tele o tausaga mulimuli ane, i le mafauafau i lena aafiaga, na saunoa Peresitene Romney i lena taimi: “Talu mai lena aso, ua ou mulimuli i lena fautuaga ma ou te iloa e aoga. Soo se taimi lava ou te maua ai i se faafitauli ogaoga, po o nisi o tofiga o se natura fatufatuai lea ou te faamoemoe e maua ai le uunaiga a le Agaga, ou te maua pea fesoasoani sili i le vaveao nai lo se isi lava taimi o le aso.”¹

Ina ua ou faitau muamua i lenei tala, sa ou maofa foi i le fautuaga na tuuina atu e Elder Lee. Ou te le fesootaia lava

se faasologa i vaveao i aso taitasi ma se faaaliga. Ae ui i lea, ua ou iloa nei o loo i ai se faamaopoopoga tuusao. Ua ou iloa foi o faatinoga e masani ona fesootai ma le mauaina o faaaliga e pei o le tatalo, suesue i tusitusiga paia, anapogi, auai i le malumalu, ma le auauna atu ua matua faateleina pe a vave ona ou moe ma ala vave i luga.

Faataitaiga mai Tusitusiga Paia

O alii ma tamaitai musuia o vaitausaga uma ua mulimuli i lenei fautuaga paia e uiga i le moe. “Ua *alu usu Aperaaamo i le taeao* i le mea sa tu ai o ia i luma o Ieova” (Kenese 19:27; faaopopo le faamamafa). “Ua *tulai foi Mose i le taeao lava*, ua alu ae i le mauga o Sinai, *faapei ona fetalai mai ai o Ieova ia te ia*, ua ave foi i lona lima o papa maa e lua” (Esoto 34:4; faaopopo le faamamafa). “Ona *tulai lea o Iosua i le taeao lava*, ua avae foi e faitaulaga le atolaau a Ieova” (Iosua 6:12; faaopopo le faamamafa).

Na faapefea ona amata e le Alii Ona aso i le taimi o Lana auaunaga faaletino? Na tusia e Mareko, “O le taeao ua *ala po o ia*, ona ulufafo lea o ia ma maliu atu i le mea tuufua, ma tatalo ai” (Mareko 1:35). O Maria, o se soo tuuto, na mulimuli i Ana faataitaiga ma i le faia o lena mea na aoaoina ai i tatou i se lesona mamana: “O le uluai aso o le vaisapati *i le taeao, a o pouliuli lava, ua alu ane ai Maria le Makatala*, i le tuugamau” (Ioane 20:1). I le taeao po, sa avea o ia ma tagata muamua e vaai i le Alii toetu.

**O le a se
faatinoga e tasi,
pe afai ae faia pea ma
faatasi ai ma le amio pulea,
o le a fesoasoani ia te oe
ina ia maua le soifua
manuia, le malosi, ma
le uunaiga?**

• • • • •



Faamanuiaga o le Ala Po

E faaaoga foi e taitai maoae i o tatou aso ia itula o le taeo po e maua ai faaaliga. O nisi taimi ua mavae, sa ou faalogo ai i se tasi o le Korama Muamua a Fitugafulu o ta'ua i se saunoaga i le konafesi faalesiteki e faapea o ia o se tagata alapo. Ina ua maea le sauniga, sa ou talanoa atu ia te ia mo sina taimi e uiga i lana faiga o le taeo po, ona fesili atu lea pe toafia Au Peresitene Sili ma Korama a le Toasefululua e tausia se faatulagaga talitutusa. Sa ia tali mai, “Latou te faia uma!” Sa avea o se taimi mamana, ma na molimau mai le Agaga ia te au o le vave ona moe ma le vave ona ala e mafai ona fesootai moni i le mauaina o faaaliga.

Ua tautino nisi faamanuiaga faaopoopo ia i latou o e mulimuli i fautuaga a le Alii e uiga i le moe. Mafaufau i nei folafolaga ofoofogia: “Tuu le moe umi atu nai lo le mea e tatau ai; vave momoe ina ia outou *le vaivai*; alapo a’e, ina ia *olaola* o outou tino ma o outou mafaufau” (MF&F 88:124; faaopoopo le faamamafa). O le *Faaolaola* o lona uiga “ia faatumulia i le ola ma le malosi.”

Na fautua mai le aoao anamua o Aristotle i isi faamanuiaga ia i latou o e tausia se faasologa o [mea fai] i le taeo po: “E lelei ona ala i luga a o lei oo i le taeo, aua o sea aga masani e saofaga i le soifua maloloina, tamaoiga ma le poto.”² O le uluai tamalii o Benjamin Franklin na mulimuli ane tuu lena manatu i lona manatu lauiloa: “O le vave ona moe ma le vave ona ala, e maua ai e se tagata le malosi, tamaoiga, ma le atamai.”³ O le tele lava o tagata e tuu le soifua maloloina, tamaoiga, ma le poto i le pito i luga o mea e sili ona manaomia i le olaga.

Soifua Maloloina

O le averesi o le matutua o se ofisa pule sili i Amerika o le 55 tausaga le matua.⁴ Pe faateia ai oe i le iloa o se Pule Sili o se faalapopotoga faavaomalo o se tamalaoa e 97 tausaga le matua? Ae faapefea pe afai e te aoaoina foi o loo ia faimalaga i le lalolagi e tuuina atu lauga, aoaoga mo taitai, fonotaga ma taitai o le malo, ma o loo

faatatalanoaina e faalapopotoga tau faasalalauga tetele i lenei matua tele? Ae faapefea pe afai o ona Sui Peresitene e toalua e matua malolosi lava o le 79 ma le 87-tausaga le matutua? Ma o le tulaga tonu lena i le faaiuga o le taitaiga a Peresitene Gordon B. Hinckley (1910–2008) o le Peresitene o le Ekalesia. E foliga mai o se faasologa o le taeo po, a o le'i avea ai e na o le tagata o loo saofaga atu, o se tasi o mea moni e taitai atu i le loa o soifua o taitai o le Ekalesia.

Na fautua mai le Peresitene muamua o le Iunivesite o Polika Iaga o Ernest L. Wilkinson o le tausiana o se faasologa o le taeo o se fesootaiga ma manuia tau le soifua maloloina. E faatatau ia Peresitene David O. McKay (1873–1970), Peresitene o le Ekalesia i lea taimi, sa ia faapea mai: “O se tasi o mafuaaga maoae, ou te mautinoa, i le mafuaaga ua soifua ai Peresitene McKay i le matua o se lelei, matua, ma le malosi ua avea lea ma mea moni e faapea ao avea o se alii talavou sa ia atiina ae uiga masani o le vave ona moe, usupo, e masani lava a o lei oso le la, pe a manino lona mafaufau ma malosi lona tino e faia galuega o le aso.”⁵

Na faia foi ni sootaga i le va o le tausia o se faasologa o le vave amata ma soifua maloloina faalemafaufau ma faalelagona. Ua saunoa mai Elder Russell M. Nelson o le Korama a Aposetolo e Toasefululua, “Ia i latou ua oo i ai le lagona toilalo ma le vaivai, tagai i le tafa mai o ata i le taeo mo so outou sulufaiga.”⁶

Poto

O le fesootaiga o mamana o le moe ma le poto e le na o se manatu. O se suesuega na faia e le au suesue i le setete o le Iunivesite o Polika Iaga: “O tamaiti aoga e masani i le tuai ona momoe ma e momoe umi i le aso e sosoo ai e maualalo togi averesi (GPAs) nai lo tamaiti aoga e i ai le mausa o le vave ona momoe ma vave ona feala. O le umi ona momoe o tamaiti i le taeo, o le maualalo foi lea o latou togi. Mai i mea moni uma ua suesueina, o taimi e feala ai i aso o le vaiaso ma le faaiuga o le vaiaso na i ai



le sootaga malosi atu i togi [GPAs] a tamaiti aoga. O itula taitasi i luga o le averesi e moe umi ai tamaiti aoga i aso o le vaiaso na fesootai ma se pau o le 0.13 i le togi [GPA] (0.0–4.0 fua).⁷

E lei leva atu sa ou iloiloaina ai tamaiti aoga o le kolisi a le Au Paia o Aso e Gata Ai e uiga i o latou mamananu o le moe. O le averesi o nei tamaiti aoga e feala mai i le 7:30 i le taeao i aso o le aoga ma le 9:15 i le taeao i le faaiuga o vaiaso. O o latou taimi e momoe ai o le vaeluapo i po o le aoga ma le 1:00 i le taeao i le faaiuga o vaiaso. O nei tamaiti aoga o loo agai tonu e faasagatau ma fesootaiga tau le suesuega i le faasologa o le vave ona amata ma le mauaina o le malamalama. Atonu o le iloaina o se togi [GPA] maualuga atu o le taunuuga o se faasologa o le vave ona amata ua faigofie tele ona talitonu i ai. Pe ua tatou aveva ea e faapei o le fanauga a Isaraelu, o e sa mumusu e mulimuli i le tali a le Alii mo gatafeai “ona o lona faigofie tele?” (1 Nifae 17:41; tagai foi i le Helamana 8:14–15).

Mafaufau i le fautuaga a Peresitene Boyd K. Packer, Peresitene o le Korama a Aposetolo e Toasefululua, na tuuina mai e faatatau i le mauaina o le potu: “Ou te fautua atu i a tatou fanau e fai a latou suesuega taua i itula o le taeao po o le taeao a o fou ma mataalia i latou, nai lo le falo ma le vaivai faaletino ma le le lavā faalemafaufau i le po. Sa ou aoaoina le mana o le manatu, ‘Vave ona moe, vave ona ala.’”⁸ Atonu o se tasi lea o mafuaaga e mulimuli ai faifeautalai faamisiona i le faasologa o le vave-ona-moe ma le vave-ona ala.

Isi Faamanuiaga

A o tusitusi faatasi ma lona faletua, o Barbara, o Elder Joe J. Christensen, o se uso malolo faamamaluina o le Fitu-gafulu, na fautuaina atu ni faamanuiaga e sili atu ia i latou o e mulimuli i le fautuaga a le Alii e uiga i le moe: “E tataua ona i ai se mafuaaga e sili ona lelei mo le poloaiga e vave ona moe ma vave ona ala i luga [tagai MF&F 88:124]. . . . O le lalolagi o se nofoaga e sili atu ona matagofie i le taeao po. E sili atu ona toafilemu le olaga. E mafai ona tele atu

isi mea e mafai ona ausia i se aofaiga puupuu o le taimi.”⁹ I le taimi o se saunoaga i se faeasaite i le Iunivesite o Polika Iaga, na saunoa faaopoopo mai ai Elder Christensen: “O nisi o outou e le o maua le malolo e tou te manaomia. O nisi ua masani i le tuai ona moe ma le moe umi atu nai le mea e manaomia e le tino, lea e misia ai nisi o uunaiga faaletagata lava ia e mafai ona e mauaina.”¹⁰

Na faaopoopo mai e Peresitene Hinckley le folafolaga i le ususitai: “Afai e te alu e moe i le 10:00 ma ala a’e i luga i le 6:00 i le taeao, o le a lelei mea uma mo oe.”¹¹

O le mulimuli i le fautuaga a le Alii e uiga i le moe e ono foliga mai o se mea itiiti, peitai “e mafai e le Alii ona faataunuua mea tetele i ala faatauvaa” (1 Nifae 16:29). E i ai sau molimau o le mulimuli i se faasologa o le vave ona amata e aumaia ai le tele o faamanuiaga i o tatou olaga, e aofia ai faaaliga. E ofoofogia le tele o mea e sili atu ona ou ausia i se aso pe a ou vave moe ma vave ona ala i luga. O faamanuiaga o lenei loto pulea e sili atu nai lo le taumafaiga e manaomia. Pe a tatou manumalo i le taua muamua o le aso e faasaga i le faamalua, o le a sili atu le avanoa e manumalo ai i taua o le aso. O le a sili atu foi ona faatumulia i tatou i le ola ma le malosi. ■

E alala le tusitala i Texas, ISA.

FAAMATALAGA

1. Tagai i le Joe J. Christensen, *To Grow in Spirit: A Ten-Point Plan for Becoming More Spiritual* (1989), 27–28.
2. Aristotle, i le *Wit and Wisdom of Socrates, Plato, Aristotle*, ed. N. B. Sen (1967), 100.
3. *Selections from the Writings of Benjamin Franklin*, ed. U. Waldo Cutler (1905), 16.
4. Tagai i le *Forbes* magazine, “Emerging Culture, Worldwide Success,” Oct. 25, 2012.
5. Ernest L. Wilkinson, *Lifting One’s Sights*, Brigham Young University Speeches of the Year (Oct. 1, 1963), 4.
6. Russell M. Nelson, “E Oo Mai le Fiafia i le Taeao,” *Liahona*, Ian. 1987, 71.
7. *Journal of American College Health* 49 (2000): 125–30.
8. Boyd K. Packer, *Teach Ye Diligently* (1975), 205.
9. Joe J. and Barbara K. Christensen, *Making Your Home a Missionary Training Center* (1985), 33.
10. Joe J. Christensen, “Resolutions” (Faeasaite a le Iunivesite a Polika Iaga, Ian. 9, 1994), 5, speeches.byu.edu.
11. Gordon B. Hinckley, in Sheri L. Dew, *Go Forward with Faith: The Biography of Gordon B. Hinckley* (1996), 166–67.

O Poutu o le Malosi i Hanikeri

Saunia e McKelle George

Ua faapea mai Krisztian Eszther o le talavou matutua i Hanikeri* e faamalosia e le talalelei lona faatuatua—e le gata i le Atua ae faapea foi i se olaga lelei ma faamanuiaina. “O tagata Hanikeri e matele lava ina mafaufau i lo matou tuanai pogisa nai lo lo matou lumanai manuia,” o lana tala lea. O le tuanai na faatatau i ai Eszther o le vaitau o taimi i le talafaasolopito o Hanikeri (1949–56). I lena taimi, o upu o le vii o Hanikeri—*Isten, áldd meki se magyart*, o lona uiga “Ia faamanuia e le Atua tagata Hanikeri”—sa le’i lagiina lava.

Ua Oo Mai le Talalelei i Hanikeri

Sa aloaia le faailoaina e Hanikeri o le Ekalesia i le 1988, e tasi le tausaga i le mavae ai o le tuuina atu e Elder Russell M. Nelson o le Korama a Aposetolo e Toasefululua se tatalo o le faapaiaiga i le tumutumu mauga o Gellért, e iloa atu ai Budapest. I le 1990 na tatalaina ai se misiona i Budapest, i se atunuu ua atiaeina mai le 40 tausaga e aunoa ma le saolotoga o tapuaiga faalelotu. O lenei la ua malosi le uunaiga a le Atua, ae maise lava i loto o ona autalavou matutua o le Au Paia o Aso e Gata Ai.

Nofoaga Autu mo le Aapa Atu o le Inisitituti

O nofoaga autu mo le aapa atu o se vaega tele e fesoasoani ai i talavou matutua i Europa Tutotonu ma Sasae. O le po a o lei asiasi atu Elder L. Tom Perry o le Korama a Aposetolo e Toasefululua i Europa Tutotonu, sa ia maleifua mai i se faaaliga mamana. Sa ia lagonaina o le malosi o le Ekalesia i lena vaega o le lalolagi o le a i ai i le lotolotoi o autalavou matutua. O lenei la o nofoaga autu mo le aapa atu o se nofoaga o faafeiloaiga lea e mafai e talavou matutua ona maua ai vasega, gaoioiga, ma uo e tutusa [o latou] talitonuga. “O iinei e mafai ona matou fiafia ai e aunoa ma le faapopoleina e uiga i le luitauina o o matou tulaga faatonuina,” o le tala lea a Eszther.

Sa feiloai Eszther i faifeautalaiti i lona nuu o Újfehértó ma auai ai i a latou vasega Faaperetania [e faia fua] faalevaiaso. E lei umi ae valaaulia e faifeautalaiti o ia i gaoioiga a le paranesi. “Mai le amataga sa ou auai i taaloga i po uma, afiafi faaleaiga, ma siva,” o lana tala lea. “Sa ou papatiso i le tolu vaiaso ao le’i atoa lo’u 18. O lenei la ua ou iloa o a’u

Sa faatafunaina Hanikeri i le taua ma sauaga, ae o le autalavou matutua nofofua o le Ekalesia o loo faatumulia i le faamoemoe.

o se afafine o le Atua, ma o le a le tuulafoaiina e le Tama Faalelagi Lona afafine.”

Gaoioiga a Talavou Matutua

E alu pea ia Eszther i gaoioiga a talavou matutua i lana paranesi i Nyíregyháza. E le’o i ai lava se uarota po o se paranesi a talavou matutua i Hanikeri, ae o loo “matou faatasitasi pea,” o le tala lea a Eszther. “Sa matou o i le Faaaliga Fugalaau, i se faafiafiaga lane, ma le nofoaga mo manu.”

E pei ona muai vaaia e Elder Perry, e ofoina atu e talavou matutua o le ekalesia i Hanikeri se punavai o le malamalama i tagata uma. ■

E alala le tusitala i luga, ISA.

**I Hanikeri, e muamua le faaii i le igoa muamua.*

O NISI MEA E UIGA IA ESZTHER***E faapei le tafao faamasani i Hanikeri?***

Ua fatuina e talavou matutua o le ekalesia ia sauniga e feiloai ai le tasi ma le isi, ae e faigata ona e latou te nonofo i itu eseese e lua o le atunuu.

E faafia ona e alu i le malumalu?

O a'u o se tasi o tagata o le ekalesia e sili ona faamanuiaina aua e mafai ona faa-tasi i le tausaga ona ou asiasi i le Malumalu o Freiberg Siamani.

E taua aooaga i Hanikeri?

loe, ae sa faigata ona talitonu i ai ona o o'u matua ua i ai ni nai tipiloma ma na tauivi pea lo matou aiga. O lenei la ua ou vaaia ia itu lelei, ma na ou amata i le kolisi ia Ianuari 2014.

FUAINUMERA O HANIKERI

E 9,877,365 tagata (talu mai le 2014)
35,919 maila faatafafa (93,030 km²)
o le laueleele

Lauiloa i ona vaipuna vevela, e 450
vaitaele a Hanikeri mo tagata lautele
E 14 vaoeli i le gagana Hanikeri

O LE EKALESA I HANIKERI

E 5,050 Au Paia o Aso e Gata Ai
22 uarota ma paranesi
E 1 le siteki (faatuina i le 2006)
E 6 nofoaga autu o talafaasolopito
o aiga
1 misiona (Budapest)

O MEA MONI E UIGA I HANIKERI

Taulaga: Budapest

Gagana: Hanikeri (*Magyar*)



O Iesu Keriso—Lo Tatou Aloalii o le Filemu

*E mafai ona oo mai le filemu ia i latou
uma o e saili atu ma le naunautai i le
Aloalii o le Filemu.*



**Saunia e Elder
Russell M. Nelson**

O Le Korama
a Aposetolo e
Toasefululua

Ole taulai atu i le Alii ma le ola e faavavau e mafai ona fesoasoani ia i tatou i luitau uma o le olaga faalelino. E nonofo faatasi tagata le atoatoa ma isi tagata le atoatoa i lenei lalolagi. O lo tatou lalolagi o se lalolagi pa ‘ū ua faaleagaina i aitalafu soona fai, taua, mala faanatura, faama’i, ma le oti.

E oo mai luitau faaletagata lava ia. Po o le a lava se mea e ono afua ai le popole, e naunau lava i tatou taitoatasi ia maua le filemu i le loto.

O la’u savali e faatatau i le puna e tasi o le filemu moni ma le tumau, o Iesu le Keriso—lo tatou Aloalii o le Filemu.¹

Na fetalai Iesu, “Ina tuu mai ia o tama iti e o mai ia te au, aua le vaoia i latou, aua e faapei o i latou nei o e o i le malo o le lagi.”²

E mafai ona la aumaia le filemu ia i latou ua matuai faatamaia o latou olaga e taua. O aiga na faalavelaveina e tiute faamiliteli o loo i ai manatuaga o taua, lea i lou mafaufau sa totoina i le taimi o le Taua a Korea.

O taua o lo tatou nei vaitaimi ua sili atu ona faigata, ae o loo mafatia ai pea aiga. O i latou o loo mafatia e mafai ona liliu atu i le Alii. O Lana savali o le savali faamafanafana o le manuia i le lalolagi ma le alofa i tagata.³

E mafai ona oo mai le filemu ia i latou e le o lagonaina le malos. O nisi tino ua manunua.

O isi ua tiga faaleagaga ona o le misia o e pele po o isi mafatiaga faalelagona. Uso e ma tuafafine, e mafai ona oo mai le filemu i lou agaga pe a e fausiaina le faatuatua i le Aloalii o le Filemu.

“E i ai ea ni isi o ia te outou ua mama’i? Ia aumai i latou iinei. E i ai ea ni isi o outou ua pipili, pe ua tauaso, pe ua setu, pe ua manua, . . . pe ua puapuagatia i soo se ala? Ia aumai i latou iinei ma o le a ou faamaloloina i latou.”⁴

“Aua ua ou iloa ua lava lo outou faatuatua ou te faamaloloina ai outou.”⁵

E mafai ona oo mai le filemu i se tasi ua mafatia i le faanoanoa.

Pe o le faanoanoa e mafua mai se mea sese po o se agasala, e na o le pau le mea e manaomia e le Alii o le salamo moni. Ua uunaia i tatou e tusitusiga paia ina ia “sola ese [mai] tuinanau o taulelea: . . . [ma] valaau i le Alii ai le loto mama.”⁶ Ona mafai lea e Lona “pulupasama i Kiliata” malu ona faamaloloina se agaga ua gasegase ona o agasala.⁷

Maufaufau i le suiga ia John Newton, na soifua mai i Lonetona i le 1725. Sa salamo mai lona olaga agasala o se tagata e faatauina atu pologa ma avea ma se faifeau o le

Lotu Egelani. Faatasi ai ma lena suiga tele o le loto, sa tusia e John ia upu o le viiga “Amazing Grace.”

*E ofoofogia le alofa tunoa! E malu i le faalogo
Na laveatina se faalogogata e pei o a'u.
Sa ou leiloa, ae ua toe maua nei,
Sa tauaso, ae ua ou vaai nei.*⁸

“E olioli le lagi i le tagata agasala e toatasi e salamo.”⁹

E mafai ona oo mai le filemu ia i latou ua mamafatu a latou avega:

“Ia outou o mai ia te au, o outou uma o e tigaina ma mafatia i avega, o a'u foi e malolo ai outou.

“Ia outou amoina la'u amo, ma ia outou faaa'oa'o ia te au; aua o au le agamalu, ma le loto maualalo: ona maua lea e outou o le malologa mo outou agaga.

“Aua e avegofie la'u amo, o la'u avega foi e māmā ia.”¹⁰

E mafai ona oo mai le filemu ia i latou e faanoanoa. Na

fetalai le Alii, “Amuia e faanoanoa: aua e faamafanafanaina i latou.”¹¹ A o tatou onosaia le maliu ai o se tasi e pele ia i tatou, e mafai ona faatumulia i tatou i le filemu e ala mai i musumusuga a le Agaga.

“O le a le tofo i le oti i latou o e e oti ia te au, aua o le a suamalie ia te i latou.”¹²

“Ou te tuuina atu ia te outou le manuia; o lou manuia ou te avatu ai ia te outou: ou te le avatu ia te outou faapei ona avatu e le lalolagi. Aua le atuavale o outou loto, aua foi tou te matatau.”¹³

“O a'u nei o le toetu ma le ola: o lē faatuatua mai ia te a'u, e ui lava ina oti, a e ola lava ia:

“O tagata ola uma o e faatuatua mai ia te au, e le oti lava e oo i le faavavau.”¹⁴

E mafai ona oo mai le filemu ia i latou uma o e saili atu ma le naunautai i le Aloalii o le Filemu. O Lana savali o le savali suamalie ma faaola o loo avatu e a tatou faifeautalai i le



lalolagi atoa. Latou te talai atu le talalelei a Iesu Keriso e pei ona Ia toefuatai mai i le Perofeta o Iosefa Samita. O loo aoao atu e faifeautalai le fetalaiga lenei a le Alii o loo suia ai olaga: “Afaai tou te alofa mai ia te au, ia outou tausii mai i au poloaiga.”¹⁵

E mafai ona oo mai le filemu ia i latou uma o e ua filifili e savavali i ala o le Matai. O Lana valaaulia ua faamatalaina i upu e ono o le alofa: “Sau, mulimuli mai ia te au.”¹⁶

Ia Tatou Viia le Suafa o Iesu,¹⁷ aua o le a toe afio mai o Ia. Ma “ona faaali mai ai lea o le pupula o Ieova, e vaai lava e tagata uma faatasi.”¹⁸ I le avea ai ma Mesia o le meleniuma, o le a Ia nofotupu ai o le Tupu o tupu ma le Alii o alii.¹⁹

A tatou mulimuli ia Iesu Keriso, o le a Ia taitai atu i tatou e nonofo faatasi ma Ia ma lo tatou Tama Faalagilagi, faatasi ma o tatou aiga. E ala i o tatou luitau e tele o le olaga faaletino, afaai tatou te tumau faamaoni i feagaiga na osia, afaai tatou te tumau e oo i le iuga, o le a tatou agavaa mo lena meaalofo aupito sili o meaalofo uma a le Atua, le ola e faavavau.²⁰ I Lona afioaga paia, e mafai ona faatasia ai o tatou aiga e faavavau.

Ia faamanuia le Atua ia te outou, o’u uso e, ma tuafafine. Ia outou olioli faatasi ma e pele ia te outou e faavavau i faamanuiaga uma a lo tatou Alii—lo tatou Aloalii o le Filemu. ■

Mai se saunoaga o le Faigalotu o le Kerisimasi i le 2013.

FAAMATALAGA

1. Tagai i le Isaia 9:6; 2 Nifae 19:6.
2. Mataio 19:14.
3. Tagai i le Luka 2:14.
4. 3 Nifae 17:7.
5. 3 Nifae 17:8; tagai foi Mataio 13:15; 3 Nifae 18:32; Mataupu Faavae ma Feagaiga 112:13.
6. 2 Timoteo 2:22; tagai foi 3 Nifae 9:13.
7. Tagai i le Ieremia 8:22; tagai foi “Pe na Faia Sau Tatalo?” *Viiga*, nu. 75; “There Is a Balm in Gilead,” *Recreational Songs* (1949), 130.
8. “Amazing Grace,” *Olney Hymns* (1779), nu. 41; tagai foi Ioane 9:25.
9. Luka 15:7; tagai foi i le fuaiupu 10.
10. Mataio 11:28–30.
11. Mataio 5:4; tagai foi 3 Nifae 12:4; Mataupu Faavae ma Feagaiga 101:14.
12. Mataupu Faavae ma Feagaiga 42:46.
13. Ioane 14:27.
14. Ioane 11:25–26.
15. Ioane 14:15.
16. Luka 18:22.
17. Tagai i le “Ia Tatou Vi’ia le Suafa o Iesu,” *Viiga*, nu. 102.
18. Isaia 40:5.
19. Tagai Faaaliga 19:16.
20. Tagai Mataupu Faavae ma Feagaiga 14:7.



TUUSAO I LE MATAUPU



I le avea ai o se aoao e

14 tausaga le matua, o le a le mea e mafai ona ou saofaga moni atu ai i faiaoga o aiga?

Etusa ai ma tusitusiga paia, o le faamoemoega o faiaoga o aiga o le “asiasi atu i fale o tagata taitoatasi, ma apoapoi atu ia te i latou ia tatalo atu ma le leo ma i le mea lilo ma faasaga i tiute uma faaleaiga” (MF&F 20:51). O faiaoga o aiga e “leoleo . . . ma faatasi ma faamalosi” ia tagata ua tofia i latou e aoao atu (MF&F 20:53). Latou te “lapatai atu, faamalamalama atu, apoapoi atu, aoao atu, ma valaau atu i tagata uma ia o mai ia Keriso” (MF&F 20:59).

Ia fesili ifo ia te oe lava, “E mafai ona ou faia na mea?” O le tali o le ioe. Fesili i lau soa pe faapefea ona mafai ona e saofaga atu. E mafai ona ia fesoasoani ia te oe e aoao e faia nei taimi faatulagaina, faasoa atu le molimau, tuuina atu lesonea, ma isi mea. Ona mafai lea ona e vaaia mo oe lava ia auala e mafai ai ona e faamanuiaina olaga o i latou o loo e asia, ma o le a e lagonaina le mautinoa e uiga i le faaogaina o meaalofo ua tuuina mai e le Atua ia te oe e faataunu ai lenei mea ma le tele o isi tiute faaleperisitua i lou olaga atoa. ■

Aisea e tatau ai ona ou faamagaloina se tasi ua mafua ai ona ou tiga?

Ole poloaiga ia faamagaloina atu i tagata uma o se [poloalaga] e toatele i latou o loo tauivi ai. Ae na fetalai mai le Alii e tatau ona tatou faamagaloina atu ia te i latou po o ua tatou solia le agasala e sili atu (tagai i le

MF&F 64:9–11). E ono le fetalai lena mea ia i tatou i le taimi muamua, ae o loo taumafai pea le Alii ina ia fesoasoani ia i tatou ia avea atili e pei o Ia ma maua le olioli sili atu. Afai tatou te tuuina atu a tatou avega ia

te Ia ma ia aveese le ita, le le fiafia, ma le tiga, o le a tatou maua le filemu i lenei olaga ma faamanuiaga silisili i le faavavau. E ono manaomia ai sina taimi, loimata, o le anapogi, tatalo, ma fefautuaai ma taitai perisitua, ma asiasiga i le malumalu, ae o le a matua aoga lava.

E pei ona aoao mai e Peresitene Dieter F. Uchtdorf, Fesoasoani Lua i le Au Peresitene Sili:

“E tatau ona tatou lafoai a tatou faitioga. O se vaega o le faamoemoega o le

olaga faaletino o le aoao lea pe faapefea ona lafoai na mea. *O le ala lena a le Alii.*

“Ia manatua, ua faatumulia le lagi ia i latou o loo i ai le tulaga tutusa lenei: Ua faamagaloina i latou. Ma latou te faamagaloina atu” (“O Le e Alofa Atu e Alofaina Mai,” *Liahona*, Me 2012, 77). ■

Mo nisi faamatalaga e uiga i le faamagaloina o isi, tagai i le Gordon B. Hinckley, “Faamagaloina,” Liahona, Nov. 2005, 81–84; James E. Faust, “O le Mana Faamalolo o le Faamagaloina,” Liahona, Me 2007, 67–69.



LESONA I ASO SA
.....

O Le Autu o le Masina Lenei:
**O Sauniga ma
Feagaiga**

UA SAUNIA MO LE MAUAINA O LE **PERISITUA** **MEKISATEKO?**

“O le mea lea, o i latou uma o e e mauaina le perisitua, e mauaina lenei tautoga ma le feagaiga a lo’u Tamā, e lē mafai ona soli e ia” (MF&F 84:40).

Ele pei o le Perisitua Arona, lea e maua e aunoa ma se tautoga, e mauaina le Perisitua Mekisateko faatasi ai ma se tautoga ua faia e le Tama Faalelagi, ma faatasi ai ma se feagaiga e osia i le va o oe ma Ia. O manatu nei o le a fesoasoani e te malamalama ai i faaupuga autu i le Mataupu Faavae ma Feagaiga 84:33–44, lea na faaali mai ai e le Alii le tautoga ma le feagaiga o le perisitua.

O LE A LE TAUTOGA NA FAIA E LO TATOU TAMA FAALELAGI?

“O le ola agavaa mo folafolaga o le tautoga ma le feagaiga e aumaia ai le meaalofa sili o meaalofa uma a le Atua: ola e faavavau. O se faamoe-moega lena o le Perisitua Mekisateko. O le tausia o feagaiga pe a tatou mauaina le perisitua ma le faafouina i sauniga o le malumalu, ua folafola mai ai ia i tatou i se tautoga na osia e lo tatou Tama Faalelagi, o Elohimā, e faapea o le a tatou maua le atoatoaga o Lona mamalu ma ola ai e pei ona soifua ai o Ia.”

Peresitene Henry B. Eyring, Fesoasoani Muamua i le Au Peresitene Sili, “Faatuatua ma le Tautoga ma le Feagaiga o le Perisitua,” Liahona, Me 2008, 61.

O LE A LAU VAEGA I LE FEAGAIGA?

“O le feagaiga i le vaega o le tagata e faapea o le a ia faalauteleina lona valaauga i le perisitua [tagai MF&F 84:33], ma o le a ola o ia i upu uma e tulei mai le fofoga o le Atua, ma o le a ia tausia poloaiga.”

Peresitene Iosefa Filitia Samita (1876–1972), “Magnifying Our Callings in the Priesthood,” in Conference Report, Ape. 1970, 59.

O LE A LE UIGA O LE FAAFOUINA O LOU TINO?

“Ua ou vaaia le faataunuuna o lena folafolaga i lo’u lava olaga faapea ma olaga o isi. Sa auauna se tasi o a’u uo o se peresitene o le misiona. Na ia tau mai ia te au faapea i le faaiuga o aso taitasi a o ia auauna atu sa toetoe a le mafai ona ia oo atu i le fogafale i luga i lona moega i le po ma mafaufau pe na te toe maua le malosi e feagai ai ma le isi aso. Ona oo lea i le taeao, sa ia iloina le toefuataiina o lona malosi ma lona lototele. Ua e vaaia i olaga o perofeta matutua o e na foliga mai ua faafouina i taimi taitasi uma e tutulai atu ai e molimau atu i le Alii o Iesu Keriso ma le talalelei toefuataiina. O se folafolaga lenei mo i latou o e agai i luma ma le faatuatua i la latou auaunaga i le perisitua.”

Peresitene Henry B. Eyring, “Faatuatua ma le Tautoga ma le Feagaiga o le Perisitua,” Liahona, Me 2008, 62.

O LE A LE UIGA O LE TALIAINA O LE ALII?

“O alii o e taliaina ma le agavaa le perisitua, ua talia foi le Alii o Iesu Keriso, ma o i latou o e talia le Alii ua talia le Tama. Ma o i latou o e talia le Tama, e maua mea uma ua i ai ia te Ia. E tafe mai faamanuiaga silisili mai lenei tautoga ma le feagaiga i alii, tamaitai, ma fanau agavaa i le lalolagi atoa.”

Elder Russell M. Nelson o le Korama a Aposetolo e Toasefululua, “Feagaiga,” Liahona, Nov. 2011, 88.

Filifili o Mau: Mauaina o le Alii

O le mauaina o le perisitua o se tasi o auala e maua ai le Alii. Faitau fuaiupu nei e aoao ai le isi lua: loane 13:20 ma le Mataupu Faavae ma Feagaiga 112:20.



PE MAFAI E TAMAITAI TALAVOU ONA MAUA FOI NEI FAAMANUIAGA?

“O faamanuiaga o le perisitua e le faapea e gata ai i na o alii lava. O nei faamanuiaga ua liliigiina mai foi i o tatou ava ma fanau teine ma tamaitai faamaoni uma o le Ekalesia. O nei tuafafine lelei e mafai ona saunia i latou lava, e ala i le tausia o poloaiga ma le auauna atu i le Ekalesia, mo le faamanuiaga o le aiga o le Alii. Ua ofo mai e le Alii i ona afafine uma faale-agaga e mafai ona maua ia meaalofa ma faamanuiaga e ala i ona atalii.”

Peresitene Iosefa Filitia Samita (1876–1972), “Faalauteleina o Tatou Valaauga i le Perisitua,” i le Conference Report, Ape. 1970, 59.

MAUAINA O MEA UMA O I AI I LE TAMA: O SE FAATAOTO I ONA PO NEI



Sa saunia se alii talavou e auauna atu i se misiona. Na malilie ona matua e totogi lana misiona pau lava le mea ia tausia e ia tulafono o le misiona ma galue malosi. Sa ioe o ia.

Ina ua uma ona ulufale atu i le misiona, sa ia iloa ai o le galuega faafaifeautalai e faigata tele nai lo le mea na ia manatu i ai. O le aoaoina o se gagana fou, fetuunai i se aganuu e ese mai ai, ma le feagai ai ma le teenaina na faavaivai ai o ia. Na taumafai lana peresitene o le misiona ma lana soa e faamalosiau ia te ia, ae sa ia lagonaina pea le fiu.

Sa ia ta'u atu i lana peresitene o le misiona sa ia manao e alu i le fale. Sa valaau atu lana peresitene o le misiona i le tama o le alii talavou ma tuuina atu ia te ia le faatagaga e valaau atu ai i lona atalii. Sa ta'u atu e le faifeautalai i lona tama e uiga i lona lotovaivai. Sa fai mai lona tama, "Mo le tele o tausaga na ma tulimatai atu ma lou tina i le aso o le a e auauna atu ai i se misiona talai. Ua tatou iloa le taua o le aoao atu o le talalelei a Iesu Kerisomia i latou e le o mauaina."

Sa tali mai le atalii, "Tama, ou te lei iloa e taua tele ia te oe lou faia o se misiona."

"E taua tele ia te au," na tautino atu ai le tama. "Sa ou galue i lou olaga atoa ma faasaosao se tupe ma lou faamoemoe e tasi ia te: oe. Sa ou faamoemoe lava e saunia o se tofi tele mo oe."

"A e, Tama," le tali atu o le atalii, "ua faigata tele le galuega ma ou te le fiafia i ai . . ."

Na faasalaveia e le tama, "E faapefea ona ou tuu atu la'u pisinisi ia te oe pe a e le faamaoni e auauna atu i le Atua mo ni tausaga pupuu se lua?"

Sa leai se tali a le tama ae na o le mafaufau i le fesili a lona tama.

Ona fai atu lea o le tama, "Lo'u atalii e, a e faamaoni i lenei valaauga ma faamaonia lou lava agavaa i mea uma, ou te avatu ia te oe au mea uma."

I le ootia ai i lenei folafolaga, sa fai atu le atalii ma le lototele i lona tama, "O le a ou nofo."


Sa nofo le atalii i le misiona, ma sa auauna atu ma le faamaoni. Sa ia mulimuli i tulafono o le misiona ma galue malosi. Ioe, i se taimi ina ua maea lana misiona, sa ia maua mai lona tama le tofi na folafolaina, e oo lava i mea uma a lona tama.

Mai ia Elder Carlos E. Asay (1926–1999) o le Fitugafulu, "O Le Tautoga ma le Feagaiga o le Perisitua," Liahona, Ian. 1986, 35.

O FAAMANUIAGA OU TE MAUA E ALA MAI I LE PERISITUA

A o ou ola i le amiotonu o se afafine o le Atua, e mafai ona ou maua le tele o faamanuiaga e ala i Lana perisitua. E mafai ona ou avea ma se tagata o le Ekalesia a lesu Keriso, lea na toefuatai mai e ala mai i le perisitua. E mafai ona ou tagofia le faamanatuga lea na faamanuiaina e ala i le mana o le perisitua o lesu Keriso e toe faafouina a'u feagaiga, ma fesoasoani ia te au ia salamo atoatoa. Ou te maua le taitaiga patino mai le Tama Faalelagi e ala i faamanuiaga o le perisitua. E mafai ona vaetofia au i lalo o le taitaiga a se tagata o le umiaina ki o le perisitua ma tuuina mai i ai le pule e galue ai i valaauga. E mafai ona ou faaogaina lena pule e faamanuia ai olaga o isi. E mafai ona ou faia nisi o feagaiga ma le Tama Faalelagi e ala i le mana o le perisitua o loo maua i le malumalu. E mafai ona ou faaipoipo i se alii agavaa e umia le perisitua i le malumalu, ma mafai ona ma tausia faatasi se aiga i le amiotonu. Faatasi ai ma lo'u aiga e faavavau, e mafai ona ou maua mea uma o i ai i lo'u Tama Faalelagi (tagai i le MF&F 84:38).

Melissa Hart, Iuta, ISA



AUAI I LE TALANOAGA

O Mea e Mafaufau Loloto i ai mo le Aso Sa

- E faapefea ona e manatu o le tausia o au feagaiga e saunia ai oe e maua uma mea a lou Tama?
- O le a sou manatu i le eseesea i le va o le “mauaina” o le perisitua (MF&F 84:33) ma le “taliaina” o le perisitua (tagai i le i le fuaiupu 35)?
- E mafai faapefea e aoaoga o loo i le Mataupu Faavae ma Feagaiga 98:11–12 ona fesoasoani ia te oe e “ola i afioga uma ... o le Atua” (MF&F 84:44)?

O Mea E Te Ono Faia

- Saili ia agavaa mo le Agaga Paia. O le a fesoasoani musumusuga e te malamalama atili ai i le aoaoga faavae o le perisitua.
- Tauloto le tautoga ma le feagaiga o le perisitua, o loo maua i le Mataupu Faavae ma Feagaiga 84:33–44.
- Ma le agaga tatalo ia suesueina mau faaopoopo e uiga i le perisitua, e pei o le Alema 13 ma le Mataupu Faavae ma Feagaiga 13; 20; 107; 121.



Saunia e Elder
Kent F. Richards

O Le Fitugafulu
ma Le Faatonu Sili
o le Matagaluega
o Malumalu

SAUNIA E ULUFALE ATU I LE MAOTA O LE ALII

*Ataata pe a e mafaufau i le malumalu.
O se nofoaga o le mana ma faamanuiaga.*

I se fale tatala o le malumalu, sa ou matauina ai le mulimuli ai o nisi o teineiti i tua o o latou matua i le malumalu. Sa latou ataata a o latou iloa atu o latou ata i faata o le potu mo tamaitai faaipoipo. “Manatua,” le musumusu atu lea a lo latou tinamatua, “oka se tou faapitoa ma le tele o le alofa o le Tama Faalelagi ia te outou.” Na vaai faalemafaufau tamaitai taitasi i le taimi o le a ia toe foi mai ai i le malumalu o se tamaitai o le faatuatua, ma le tuputupu ae o le lalelei ma le gafatia, e sauni e faataunuu lana misiona i le lalolagi. Na maua foi e tama o e sa auai i le fale tatala se vaaiga i o latou tiutetauave ma faamanuiaga o le lumanai.

O mea sa lagonaina e nei tamaiti i le malumalu sa sa’o. E finagalo le Tama Faalelagi e faamanuia oe. E oo mai ana faamanuiaga silisili a o e ulu atu i le malumalu e maua sauniga paia ma ia osia ma tausia feagaiga paia. E nafa oe ma le tapenaga ma ia saunia.

O le malumalu e taua i lou olaga, ae maise lava pe afai o e talavou: “E manaomia e le taulealea lona tulaga i le malumalu e sili atu nai lo lona tama ma lona tama matua, o e ua mausali e

ala i se olaga o aafiaga; ma le teineitiiti faatoa ulufale i le olaga, e manaomia le agaga, uunaiga ma le taitaiga e maua mai i le auai i sauniga o le malumalu.”¹ Amata nei ona saunia lou loto ma le mafaufau ina ia mafai ona atoatoa le *mauaina* ma le *malamalama* i nei faamanuiaga (tagai i le Mataia 13:23; Mareko 4:20).

O le Mauaina o le Atoaga o le Talalelei

Afai o le a e saunia oe lava e ulu atu i le malumalu, o le a e “*saunia* ina ia maua le atoatoaga o [Lana] talalelei” i le malumalu (MF&F 35:12; faaopoopo le faamamafa). O le malumalu o se nofoaga o le mana ma faamanuiaga. Na faatonuina e le Alii le Perofeta o Iosefa Samita ma le Au Paia anamua e faapotopoto i Katelani, Ohio, ISA, lea o le a latou fausia ai se malumalu i se taimi mulimuli. “Ma o iina o le a *faaeina ai outou i le mana* mai luga” (MF&F 38:32; faaopoopo le faamamafa).

I se faletatala o le malumalu talu ai nei, na faapotopoto ai e se Aposetolo lona aiga i autafa o le fata faitaulaga paia i se potu mo faamauga. Sa ia

aoao atu ia te i latou e faapea o mea uma tatou te faia i le Ekalesia—o vasega, gaoioiga, polokalama, ma sauniga—e saunia ai i tatou e o mai i le fata faitaulaga o le malumalu mo le mauaina o sauniga o le faamauga. Ua suitulaga le malumalu i le ute moni o le fuafuaga a lo outou Tama Faalelagi mo lo outou fiafia e faavavau ma le alualu i luma.

Saunia e Osi Feagaiga ma le Atua

O au sauniuniga e ulu atu i le malumalu ma osia feagaiga e le vave ona tupu. E amata i lou papatisoga ma le meaalofo faamau o le Agaga Paia ma tuputupu ae lea i le tatalo, sutesue i tusitusiga paia, usiusitai, ma le auauna atu. O loo valaaulia ai le mama faalevaiaso a o e auai i le faamanatuga. E tupu a o e aoao e saili le faamagaloga e ala i le salamo, pe a e tausia tulaga faatonuina, ma a o e tauave ma le agavaa se pepa faataga o le malumalu e faatapulaa le faaoga. O le a fesoasoani polokalama a le autalavou ia te oe, ae o au sauniuniga e patino; o loo e atiina ae *lou* agavaa, *lau* molimau, *lou* liua. O Le Togiola a le Faaola e faatatau ia te oe lava ia.



VAEGA AUTU

- I le malumalu, e te maua ai sauniga e taua mo lou faaolataga.
- E tatau ona e mama ma le pona e ulu atu i le malumalu, e aunoa ma soo se solitulafono e le'i faamagaloina.
- E pei o tusitusiga paia, o le tele o aoaoga ma sauniga i le malumalu e [faaoga ai] faatusa, ma mafai ai e oe ona aoao atili i taimi taitasi e te toe foi atu ai i le malumalu.


A o e faateleina lou tulaga o le matua faaleagaga, o le a e manao e sauniuni ma ulu atu i le malumalu. O iina o le a e maua ai sauniga ma osia feagaiga, o laasaga ia e manaomia e faalatalata atili atu ai i lou Tama Faalelagi. O sauniga o le malumalu e “sili ona faaeaina . . . i sauniga uma ua faaalai mai i tagata.”²

A o e mauaina sauniga o le malumalu, e te faia ni feagaiga paia faatasi ma lou Tama e na o le faatasi mo oe lava ia, ona e taumafai lea e usitai i ai i lou olaga atoa. O taimi uma lava e te ulu atu ai i le malumalu, e mafai ona e lagonaina Lona Agaga ma maua faaaliga faaopoopo ma le malamalama a o tuuina atu sauniga e tatau ai mo isi. O le a e malamalama ma maua le faamautinoaga o lou olaga e faavavau ma le mana e le iu o au feagaiga. Pe ana faapea e le o i tatou o ni tagata e faavavau, o le a leai se taua o le malumalu. E te ulu atu i le malumalu ma osia feagaiga *aua* o le a e ola faavavau ma e te manao e faatasi ma lou Tama Faalelagi ma lou aiga i le “fiafia e le gata” (Mosaea 2:41). O lenei faamautinoaga e tuputupu ae i lou lava agaga ma faamauina e le Agaga Paia.

O Le Ola Agavaa

O le matafaioi a le Agaga Paia e moni. Na te aoao oe, faamamaina oe, ma faaalai le alofa o le Tama (tagai i le Roma 5:5). O le Agaga Paia o Fola-folaga o le mana faamau o le Agaga Paia, lea e faamaonia feagaiga taitasi i le faavavau.

Ina ia maua le Agaga, e tatau ona e mama ma le pona e ulu atu i le



malumalu, e aunoa ma soo se solitulafono e le'i faamagaloina. Afai e mafai ona faamanuiaina le fili i soo se auala e faatoilalo ai oe, e faia ina ia taofia ai oe mai le malumalu pe faaososo oe e alu ma le le agavaa iina.

Mo lenei mafuaaga, o le a valaaulia ai oe e nofo i se faatalanoaga patino ma lou epikopo po o le peresitene o le paranesi, e mafaufau ai i lou agavaa ma le saunia ina ia maua se pepa faataga e ulu atu ai i le malumalu. Ia faamaoni ma faalagolago ia te ia e fesoasoani ia te oe. O le mea moni, o loo e fuafuaina lou lava tulaga i luma o le Alii (tagai i le MF&F 109:24). O le a e sainia muamua lau oe lava pepa faataga. Ua e molimauiina lou agavaa i luma o le Alii.³

Ina ia agavaa e le faapea ua e atoa-toa. O lona uiga ua sa'o lou loto, o loo e ola i poloaiga, ma e te manao ia sili atu ona lelei i aso taitasi.

Aoao mai Faailoga

I le malumalu, e pei o tusitusiga paia, e aoao mai le Alii i le faaoga-ina o faailoga. E mafai ona e maua le tele o faailoga i tusitusiga paia, e pei o le papa, o le fatu, o le fua, o le laau

o le ola, ma le falaoa ma le vai o le faamanatuga (tagai, mo se faataitaiga, 1 Nifae 11; Alema 32; Helamana 5:12). O le papatisoga i le faatofuina e faatusa i se olaga fou, le toe fanauina ma le mama (tagai i le Roma 6:3–5). I totonu o le malumalu e fai uma o tatou laei papae, e faatusaina i le mama, paia, malamalama, ma le laugatasia.

O nisi o faatusa i le malumalu e faaletino ma toe faaleagaga. Mo se faataitaiga, o le ofuina o le ofusa o se faamanatu faaletino i aso taitasi o feagaiga o le malumalu ma faamanuiaga folafolaina. Afai ae faaloaloga ma faamamaluina, e puipuia e le ofusa i tatou mai faaososoga ma uunaiga le tonu.

O sauniga taitasi o le malumalu e faafaatusa. “I se sauniga paia, e mafai ona mulumuluina ma faauuina se tagata,”⁴ manatuaga o tupu ma ositaulaga o Isaraelu anamua o le saunia ai e tauave o latou tofiga (tagai i le 1 Samuelu 10:1; 16:13). O aoaoga ma feagaiga i le faaeega paia e faailoa mai ai le faaofuina po o le tuuina atu o mana faaopoopo ma folafolaga mai le Atua (tagai i le Luka 24:49). Atonu o le faailoga sili ona matagofie o le sauniga o le faamauga, lea e tuufaatasi ai se ulugalii i se sootaga le mamotusiaina lea e mafai ona tumau e oo i le faavavau atoa.

O folafolaga i totonu o le malumalu e faamauoaina ma tamalii. O le “agalelei tetele” ma “faamanuiaga silisili” (3 Nifae 10:18) ua faapolo-polo e lo tatou Tama mo oe lava ia. O lea ia ataata pe a e mafaufau i le malumalu.



E tusa lava pe fia ou tausaga, ia fai soo se mea e tatau ai ina ia saunia mo le mauaina o faamanuiaga silisili ua ofoina mai e lou Tama oi le Lagi ia te oe. Faalagolago i le lagona a o avea ma se tamaitiiti ma pese le, “Ou te fia vaai i le malumalu. Ou te ulu i ai i se aso. . . . O le a ou saunia nei. O lo’u tiute lea.”⁵ E mafai ona moni mo oe. ■

FAAMATALAGA

1. Tagai John A. Widtsoc, “Temple Worship,” *Utah Genealogical and Historical Magazine*, Ape. 1921, 91–92.
2. *Saunia e Ulufale Atu i le Malumalu Paia* (tamaitusi, 2002), 1.
3. Tagai i le Iosua 24:22, 27: “O molimau outou ia te outou, na filifilia e outou o Ieova e auauna ia te ia. Ona latou fai mai ai lea, o molimau lava i matou.” Ona avae lea e Iosua se maa tele ma faatu i lalo o le aluna ma faapea atu, “O le maa leni [e pei o lo tatou pepa faataga a le tagata lava ia] e faia ma molimau ia te i tatou; aua ua faalogo ia i afioga uma a Ieova.”
4. *Saunia e Ulufale Atu i le Malumalu Paia* 1.
5. “Ou Te Fia Vaai i le Malumalu,” *Tusipese a Tamaiti*, 99.

AISEA UA TATOU FAUSIA AI MALUMALU?

“E tatau ona tatou maua se malamalama i le mafuaaga tatou te fausia ai malumalu, ma le mafuaaga o sauniga o loo faia ai iina. A maea ona maua lena malamalama e faaaauu pea lava ona aoaoina ma faamalalamaina i tatou i mataupu taua faaleagaga. E oo mai i lea malamalama pe a mavae le aoaoina o i tatou i lea fuaiupu ma lea fuaiupu, o lea mataupu ma lea mataupu, seia oo ina tatou maua uma se atoatoaga o le malamalama ma le poto atoa. Ona ave lea o lea malamalama ma lea poto ma puipuiga ia i tatou—e aoaoina i tatou taitoatasi. . . .

“... E leai se isi galuega e sili atu le faaleagaga e maua ai. E leai se isi galuega e tatau i ai le amiotonu a’ia’i.

“E faaofuina i tatou e galuega o le malumalu i se talita ma se puipuiga. . . .

“... Afai tatou te osia ia feagaiga e aunoa ma le masalosalo, o le a puipuia i tatou e le Alii. O le a tatou maua musumusuga e tatau ai mo luitau o le soifuaga e oo mai ia i tatou. . . .

“O lea, o mai i le malumalu—o mai e ave o outou faamanuiaga.”

Saunia e Ulufale Atu i le Malumalu Paia (tamaitusi, 2002), 37.



Sailia o se Auuala e **FAAMAGALO ATU AI**

Saunia e Bonnie Brown

Tatou te aafia uma i se tulaga lea pe a faia ai e se tasi se mea ua tatou tiga ai. O nisi taimi e lagona le le mafai ona aveese le tiga. Ae e tusa lava pe ua matua loloto le tiga, na aoaoina i tatou e le Faaola e faamagalo atu i tagata uma. E mafai ona avea le faamagaloga ma se galu-ega faigata, ae a faia mea e latalata atili atu ai i tatou ia Keriso, e mafai ona tatou mauaina le filemu e tuuina mai e le faamagaloga. I lalo, o loo faasoa mai ai e ni tamaitai talavou se toalua o laua aafiaga i le faamagalo atu i isi.

Faamagalo atu se Uo

Ina ua siitia atu Renee* i se aoga fou i Peleseuma, sa fiafia o ia e faia ni uo fou. Ona faia lea e se tasi o uo se mea na faafaigata ai. O le faamalama-lamaga lea a Renee:

“O la’u uo o Nola na fatuina se faitotoa o le Tusifoliga e faaoga ai le igoa o se isi uo, o Kate. Sa amata ona ia faatiga i tagata e faaoga ai lena talaaga ootoo, ma sa tuuaia e tagata uma Katie i le avea ma tagata faatiga. Na taufaailili mai foi Nola ia te au i le aoga, ma faifai mai i lau tapuaiga ma

o’u uiga. Sa ou taumafai e aloese mai nei osofaiga ae sa ou le mafaia, o lea sa amata ai ona ou pipii atu i isi tagata.

“Ina ua tautino mai Nola e uiga i le talaaga ootoo e le moni, sa feita tagata uma ia te ia. Na tuu mai e Nola ia te au se tusi o le faatoesega, ae na ou manatu ou te le mafai ona faamagaloina o ia. Sa matuai ou ita lava.

“I se tasi aso sa ou faitau ai i tusitu-siga paia, ma na ou tau ai i le Mataupu Faavae ma Feagaiga 64:9–10: ‘O le mea lea, Ou te fai atu ai ia te outou, e tatau ona outou faamagalo i le tasi;

ona o ia o le e le faamagalō atu i lona uso i ana agasala, e tu tausālaina o ia i luma o le Alii; aua e tumau ia te ia le agasala tele atu. O A'u, o le Alii, Ou te faamagalō i lē o le a Ou faamagalōina, ae o outou ua poloaiina ia faamagalō atu i tagata uma.'

"O le taimi lava lena na ou mafau-fau ai ia Nola. Sa ou ilōaina e le sa'ō mo au ona lagona le ita tele. Sa ou tatalo ma ole atu i le Tama Faalelagi pe mafai ona Ia fesoasoani mai ia te au e faamagalō atu ia te ia. Sa le faigofie, ae na ou mafaia lava ona fai. Sa amata ona ou auina atu ni savali ia te ia ma fesili atu e uiga i lona aso, ma o nisi taimi ma te talanoa ai i le malologa. Sa ou iloa na maliu le tama o Nola i le fa tausaga talu ai. Sa faigata lona olaga, ma sa manatu o tagata uma e le fiafia ia te ia. Sa ou fiafia sa le tumau lou ita ia te ia. O Kate ma nisi sa le malamalama pe faapefea ona mafai ona ou faamagalōina Nola, ae sa ou ilōaina o le mea na ou faia sa sa'ō, ma sa ou ilōaina ua mitamita ia te au le Tama Faalelagi."

O Renee na aoaina o le Atua ua poloaiina i tatou e faamagalō atu i tagata uma. E ala i le mulimuli i lena poloaiga, sa ia maua ai le agaalofo ma le malamalama mo Nola ma na mafai ai ona faamagalōina atoatoa.

Mauaina o le Filemu i le Malu o Lo'u Tuagane

Ina ua maliu le tuagane o Janet i se faalavelave na mafua ona o se avetaavale talavou onā, ma lana pasese, sa ia ilōaina sa manaomia ona ia faamamulu ese atu le tiga na ia lagonaina, ae na te le iloa pe faapefea.

"Sa faigata ona iloa le mea aupito sili ona tiga ia te au—lou ita agai atu i nei

talavou le mafau-fau po o lo'u faanau-nauga faamaoni i lo'u tuagane e toe foi mai. Sa le mafai ona ou tatali le mafau-fau i le tele o le gaogao i lou olaga. Ou te manatua le tatalo faatauanau mo se taimi na foliga mai o ni itula. Na pau lou manao ia toe foi mai Nathan.

"Sa ou lagona alofa mo tama na mafua ai le oti o Nathan aua na ou iloa sa latou lagonaina se lagona maoae o le tausālaina. Ae sa ou lagonaina foi le ita ma le inoino. Sa faigofie ona tuuaia i latou. Sa ou faapea i lo'u mafau-fau na ou faamagalō atu i nei alii talavou, ae o le ita sa lolovaia ai ou mafau-fauga pe a ou mafau-fau ai pea i le faalavelave. E masani ona ou fesili ia te au lava, 'O le a faapefea ona ou faamagalōina moni lava nei alii talavou, ma o le a faapefea ona ou iloa ua ou faia?'"

"Faatoa ou lagonaina mulimuli lava i le uma ai o le faitau selau o tatalo, anapogi faatauanau, ma le tele o suesuega ma mafau-fauga loloto ua ou faamagalōina moni lava i latou. Ou te manatua le mafau-fau loloto i se tasi aso. Sa ou mafau-fau, 'Ou te faamagalō atu ia te i latou. E mafai faapefea ona ou le faia? O tagata uma e sese, ma o ai a'u e faamasino ai? O le a ou le foia lava se mea i le taofiofi mamau i ai, o lea o le a ou lafoai ese atu ai.' O le lagona sa ofoofogia! Sa ou naunau pea lava pea ia iloa ua ou faamagalōina moni lava alii talavou, ma sa oo mai i le taimi sao. E le mafai ona ou suia le mea na tupu ia Nathan, ae e mafai ona ou filifili e tali atu i le faamagalō ma le alofa nai lo le ita."

Na aoaina e Janet e moni lava o le faamagalō atu e mafai ona i ai taimi ma taumafaiga. Na fetalai le Faaola, "Faalatalata mai ia te au, ma o le a ou faalatalata atu ai ia te outou" (MF&F

88:63). Na atili ona latalata atu Janet i le Alii e ala i le anapogi, tatalo, suesue i tusitusiga paia, ma isi taumafaiga. A o tatou faia faapea, o le a mafai ona tatou faatagaina lo tatou ita ma le tiga e suia i lagona o le filemu ma le faamagalō.

Faatumuina i le Alofa

E pei lava o Janet ma Renee, o le faamagalō atu e fesoasoani ia i tatou e lagona ai le agaalofo, malamalama, ma le onosai. A o tatou faamagalō atu i isi, o le a faatumuina i tatou e le Alii i lona alofa mama ma o le a avea atili faapei o Ia. ■

E alala le tusitala i Iuta, ISA.

** Ua suia igoa.*



ALOFA LE PONA

"E mafai e le alofa mama o Keriso ona aveesea ia lagona o le le fiafia ma le ita mai la tatou vaai, ma faatagaina ai i tatou e vaai i isi i le ala o loo silasila mai ai le Tama Faalelagi ia i tatou: o ni tagata sese ma le le atoatoa o e o i ai le gafatia ma le agavaa e sili atu ma lo tatou malosi e mafau-fauina ai. Talu ai e alofa tele le Atua ia i tatou, o lea e ao ai foi ona tatou alolofa atu ma faamagalō atu le tasi i le isi.

Peresitene Dieter F. Uchtdorf, Fesoasoani Lua i le Au Peresitene Sili, "O Le e Alofa Atu e Alofaia Mai," *Liahona*, Me 2012, 76.

A woman with curly hair, wearing a white top, a light green cardigan, and a floral skirt, is walking towards the camera on a cobblestone path. She is smiling and waving. The path is lined with trees with vibrant autumn foliage in shades of orange, yellow, and red. Other people are visible in the background: a man sitting on a bench, a woman walking away, and a man in a blue jacket walking towards her. A small dog is on the path to the left. The overall atmosphere is bright and cheerful.

FAASALALAUINA O LE SUSULU O LE LA

E mafai ona faia e se foliga ataata
se lalolagi o le lelei. Faafiafiaina
se aso mo se tasi.

(Tagai i le Mataio 5:14-16.)

MUSIKA

i Lo'u Olaga

Sa ou le toe taina le piano, ona sa ou fefe i le faia o se mea sese. O lenei la ua ou maua ai se avanoa e faatoilalo ai lou fefe.

Saunia e Sabrina de Sousa Teixeira

O lau miti talu mai lou laititi o le taina lea o le piano. Ina ua 12 o'u tausaga, sa aoao au e se tasi e pele o le Ekalesia e ta [le piano]. Mulimuli ane, sa ou mauaina se piano o se meaalofa mai i lo'u tama. Ae peitai, o le fiafia e taina [le piano] na amata ona mou ese ona sa ou popole lava pe a taumafai e tata i le sauniga faamanatuga. Sa ou faia [taina] ni mea sese se tele, lagona le maasiasi, ma sa le manao e toe tata. Sa ou fai ifo ia te au lava o le a ou toe taumafai i ai seiiloga lava ua maea ona faatele ona ou faataitaia ma mafai ona toeitiiti lelei atoatoa i le taina [o le piano]. Ae na amata ona ou faavaivai ma iu ai i le faatauina atu o lau piano ma le nana-ina o lenei taleni.

I le tele o tausaga mulimuli ane, i se tasi o Aso Sa na leai se ta laau. Sa siitia atu le uso o le na taina le piano i le matou uarota. Ina ua ou vaaia tagata o pepese e aunoa ma se piano po o le okeni e o faatasi ma i latou, sa ou lagonaina le Agaga o faamalosiau mai ia te au e talanoa i le epikopo. Sa ou fai atu, "E afaina pe a ou taina [le piano]?" Sa ia taliaina.

I le mavae ai o le tele o tausaga o le aloese mai le piano, sa ou


faatoilaloina lo'u fefe i le faia [taina] o ni mea sese. I lou ofo ai, na amata ona ou tata e pei lava sa le tele se taimi talu ona ou le toe tata. Sa ou faia [taina] ni mea sese i nisi o nota ae sa le tele. O lena aafiaga na ou maua ai le malosi e fautua atu i lo'u epikopo o le a ou tuuto atu i le taina o le piano i Aso Sa uma.

Ou te faataitaia i vaiaso taitasi, ma ua ou aoao e toe fiafia i le piano. Soo se taimi lava ou te faataitaia ai, ou te lagonaina le malosi o le Agaga i lou aiga. O nisi taimi pe a ou tata, e faatasi mai tagata o le aiga o loo faia ni feau i le pepese. Matou te avea ma e tasi, i le usuina o le pese e tasi.

E toatele tagata o le uarota ua matauina lo'u alualu i luma ma e faamalo mai ia te au. Ou te faafetai e saofaga atu i le faaleagaga i sauniga a la'u uarota ma le loto faafetai ua ou toe foi i se taleni sa ou tuua.

Ua ou aoao e talisapaia le musika o le ta piano; o le filemu e na te au- maia e ofoofogia. Ou te faamoemoe o le a tatou faalogo i ai i le lagi i lenei ituaiga musika, ma o ai e iloa, atonu ou te i ai iina e taina mo aufaipese selesitila! ■

E alala le tusitala i Pasila.





Saunia e Elder
Juan A. Uceda

O Le Fitugafulu

Sa ou Talanoa i le Atua e pei o se Uo

*“Tatalo, ia te Ia; talanoa, o loo Ia faafofoga”
(Children’s Songbook, 12).*

Ao ou laitiiti, sa ou matamuli lava, ma sa faigata ia te au ona maua ni uo. Sa ou tatalo soo i le Atua e uiga i le faatoilaloina o lo’u fefe ma lo’u matamuli. Sa ou tatalo atu ia te Ia e pei o se uo. E leai se isi na aoao mai ia te au pe faapefea ona faia—sa na ona ou matua manaomia lava ona talanoa atu i se tasi. Ou te lei maua ni uo, lea na ou maua ai se tasi [o uo] i le talanoa atu ia te Ia.

Ona ou feiloai lea i faifeautalai. Sa la tuu mai ia te au se Tusi a Mamona, ma sa amata ona ou faitau i ai. Ina ua ou faitau i le 3 Nifae 17, sa matua faagaetia au i le ala na ave ai e Iesu fanau laiti ma tatalo mo i latou. Sa ou iloaina o lenei mea o le auala sao lea e tatalo ai.

Sa ou filifili e faitau uma mau e uiga ia Iesu Keriso o loo tatalo. I le Luka 3:21, ina ua uma ona papatisoina e Ioane o Ia, na tatalo atu Iesu i le Tama Faalelagi ma sa tatalaina le lagi. Ina ua ou faitauina lena mea, sa ou





iloaina sa ou manao e tatalo i se auala o le a tatalaina ai foi le lagi.

O nisi taimi sa ou lagonaina le vaivai ma le maua ai se lagona e tatalo. Peitai, na ou manatua le auala na tatalo ai Iesu. Ou te taumafai e faamaoni ma agatonu i lau tatalo ina ia tatalaina le lagi mo au foi.

O nisi taimi e puupuu a'u tatalo ona e le mafai ona ou maua ni upu e lelei ai lou faaleoina ai au lava. Na o lou maua lava o le tele o lagona i totonu, ma ou faapea atu, "Ua e silafia mea o loo o'u taumafai e ta'u atu. Faamolemole, tau lava ina fesoasoani mai ia te au."

O nisi taimi pe a ou tatalo e faamanuia meaai, ou te manatua ai e oo lava i lena tatalo faatauva, e mafai e le lagi ona tatala mai. Ou te taumafai e faagalo le lalolagi ma fesootai atu i le Tama Faalelagi. Ma i se auala e ese le faatauva, ou te fai atu mea e oo mai i lo'u loto.

Pe a ou lagona le toafilemu ma le mafanafana, ou te iloa o le lagi e tatala mai ia te au.

Ina ua uma ona aoaoina e faifeautalai lo'u aiga e uiga i le talalelei, o lo'u tina, tuafafine, ma au sa papatisoina. Ae e le'i auai lo'u tama, lo'u uso, ma le isi o'u tuafafine i le Ekalesia. Ou te matuai manao lava e avea lou tama ma se tagata o le Ekalesia. Sa ou anapogi, ma i aso uma sa ou tatalo mo lo'u tama ina ia talia le talalelei ma ia papatisoina.

Sa ou iloaina e tatau ona ou tatalo mo lo'u tama, ae sa ou iloa foi e tatau ona ou faatali mo le tali a le Atua. O nisi taimi o Lana tala lea, "Leai, e le'o nei." Na iu

lava ina mafai e lo'u tama ona faalogo ma malamalama, ma sa papatisoina o ia.

Afai o lou tina po o le tama e le o se tagata o le Ekalesia, talanoa i lau uo—lou Tama oi le Lagi. Fai atu ia te Ia e pa'i atu i le loto o lou tina po o lou tama. Ia talanoa atu ia te Ia ma le lotomauualalo ma le faamaoni, i se ala faamaoni. Ona malolo ai lea. O ia o loo pule. Ua ia silafia pe faapefea ona e faia ni mea. Na te silafia lou tama ma lou tina e sili atu nai lo oe. Na te silafia le ala e aapa atu ai ia te i latou.

Aua le popole. E i ai sau uo. Tatalo ma lou loto, ma o le a faafoga mai le Tama Faalelagi ia te oe. O le a tatalaina le lagi. Na te silafia oe, ma e alofa o Ia ia te oe. ■

O LE A SE MEA E MAFAI ONA E FAIA?

Ae faapefea pe afai o se tasi i lou aiga e le o se tagata o le Ekalesia? Po o le ae faapefea pe afai e lei uma ona faamauiina ia lou aiga i le malumalu? O mea nei e lima na fai e Elder Uceda e mafai ona e faia foi:

1. Talanoa i le Tama Faalelagi i le tatalo. O la o lau uo.
2. Tatalo mo lou aiga.

3. Talitonu i le Tama Faalelagi. Na te silafia lou aiga, ma Na te silafia le auala e fesoasoani ia i latou.
4. Malolo ma aua le popole. O le Tama Faalelagi e pule.
5. Ia iloa e silafia oe e le Tama Faalelagi ma o le a la faamanuiaina oe.

O lenei tala sa tupu ia Me 1889.

Na faapupuu faatasi Anna Matilda Anderson ma lona tina ma lona uso, o Ida, i lalo o le faamalu lanu uliuli. Mai le taufaasiusiuga o lona mata, sa ia vaaia le sau o le nofoaafi. Sa ia gatete. O le a ave o ia e le nofoaafi mai Suetena ma amata lana faigamalaga i Amerika.

“Ia amio lelei ma faalogo ia Elder Carlson,” o le musumusutu atu lea i le Faasuetena o le tina a Anna. Sa ia fusimau i teineiti. O Elder Carlson o se faifeautalai o le sa auauna atu i Suetena mo le tolu tausaga, a o valu tausaga o Anna. Ua oo nei la i le taimi e toe foi atu ai o ia i lona aiga, i le Iunaite Setete.

Ina ua filifili Tina e auina atu Anna ma Ida i Amerika e aloese ai mai sauaga i Suetena, na ofo atu Elder Carlson e vaavaaia i laua. O lenei la o loo ia tu i autafa o le nofoaafi. Sa ia talo atu i teineiti e toalua e o atu ia te ia. Na opomau e Ida lona tina ma agai i luma, ae sa tu pea Anna.

“Ou te alofa ia te oe,” o le tala lea a Anna. “O le a ou misia oe.”



“O le a ou misia foi oe. Ia faalogo lelei. Afai e te oo i se nofoaga e le mafai ona e malamalama i tala a tagata, aua nei galo e tatalo i lou Tama oi le Lagi aua e malamalama o Ia ia te oe.”

I le mafaufau pea i upu a lona tina, sa oso i luga Anna i le nofoaafi ma nofo i lalo i talaane o Ida ma Elder Carlson. Sa ia fiafia lava e uiga i lana tietiega muamua i luga o se nofoaafi, ae o le taimi lea na o lona manao lava e toe vaai mulimuli atu i lona tina. Sa maualuga tele le nofoaafi mo ia e iloa atu ai foliga o tagata, ae sa ia atata ina ua ia vaaia le faamalu lanu uliuli a lona tina o loo uu maualuga i luga ae o le motu [o tagata]. Sa faamanatu mai ia te ia o loo vaavaai mai ia Tina.

Faatasi ai ma se asu tele, na oso agai i luma le nofoaafi. I le taimi muamua sa alu malie le nofoaafi ma sa tamoe Tina i tafatafa ane o le nofoaafi. Sa talotalo atu le faamalu uliuli ia Anna. Ae e lei umi ae mou atu le faamalu uliuli mai le vaaiga. Sa faalagolago atu Anna i le faamalama ma mafaufau po o le a se mea oi luma atu.

O Le Malaga a Anna

Saunia e Jessica Larsen

E faavae i se tala moni



I ni nai vaiaso mulimuli ane, na faalagolago ai Anna i le faamalama o se isi nofoaafi. O lea nofoaafi o le aveina atu o ia i le Aai o Sate Leki, Iuta. “E foliga ese mai Amerika ia Suetena, *ja?*” sa ia fai atu ia Ida.

“*Ja,*” le toe musumusu atu a Ida i le Faasuetena. “Ae o Amerika i le taimi nei o le aiga, ma afai ta te galulue malosi, e mafai foi ona ta aumaia Tina iinei.”

Sa le i lava se tupe mo Tina e faatau ai lana lava pepa malaga. Na totogi e se aiga i Ogden, Iuta, le pasese o Ida i Amerika. O le a nofo Ida ma i latou i le latou faatoaga ma galue e toe totogi atu ia te i latou. Ae o Anna o le a nonofo ma le uso o lona tina i le Aai o Sate Leki. Na o mai le uso o le tina o Anna i Iuta i ni nai tausaga na muamua atu, ma sa tusi atu Tina e ta’u atu o le a alu atu Anna.

Ina ua taunuu le nofoaafi, na latou o i le vaa i luga o le Sami i Matu i Tenimaka. Ona latou folau atu ai lea i Egelani ma Aialani a o lei sopoia le Vasa Atelani ma taunuu i le Aai o Niu Ioka. Sa maivasa Anna mo le tele o

aso i aso e 15 o le faigamalaga. Sa fiafia o ia e ulufale atu i se nofoaafi i Niu Ioka e agai atu i Iuta.

“Ogden, Iuta!” sa valaau mai ai le ao pasese. E le iloaina lava e Anna le gagana Peretania, ae sa ia iloaina le igoa o le aai. Sa tau pe lona fatu. Sa atili ai le tau pe ina ua tulai Elder Carlson ma piki i luga la ato ma Ida.

“Pe tatau ona e alu?” sa ia fesili atu i lona uso.

“Ioe,” le tali lemu a Ida. “Aua e te popole, o le a i ai iina le fafine o le tatou aiga pe a e oo i Le Aai o Sate Leki.”

Sa vaavaai atu Anna a o feiloai Ida ma Elder Carlson i lona aiga i le nofoaga o nofoaafi. O le a latou ave Ida i se taavale toso i lona aiga fou i le faatoaga ona malaga ai lea i Idaho. O lea ua lagona moni lava e Anna le tuua toatasi.

Sa ta’alililili le nofoaafi i le po atoa seia oo ina tetete ma tu i le nofoaga mo nofoaafi i le Aai o Sate Leki. Sa toetiti lava oo i le vaeluapo. Sa uu mai e Anna lona ato



ma oso i lalo i luga o le tulaga. Sa saili e ona mata le fafine o lona aiga.

Peitai sa leai se tasi na faatalitali mo ia.

Na oo mai le fefe ia Anna. Sa ia toe autilo solo i le tulaga, ma le faamoemoe sa ia misia se isi. Sa faataupupula atu i ata lafoia. Sa ia taumafai e vaai foliga o tagata i le emoemo o moli kesi. Ae sa le i i ai iina le fafine o lona aiga.

Sa savavali ane tagata ese ma fai atu ia te ia ni fesili. Sa manatu Anna o loo latou fia fesoasoani, ae sa ia le malamalama i mea sa latou fai mai.

Na te lei lagonaina se fefe faapea i lona olaga. E lei faapea ina ua ulagia o ia e tamaiti o lana vasega i Suetena i lana lotu fou. E lei faapea i le taimi na ma'i ai i luga o le vaa i Niu Ioka. Ma e oo lava ina ua ia faatofa atu ia Tina.

Na moeini mata o Anna ma mafaufau i tua i upu a lona tina: "Aua nei galo e tatalo i lou Tama oi le Lagi

ona e malamalama o Ia ia te oe."

Na tootuli Anna i luga o le tulaga e sosoo ma lana atopau ma tatalo malosi atu nai lo se isi lava taimi mua-mua i lona olaga. Sa ia tatalo i le Tama Faalelagi ina ia auina mai se tasi e tautala faaSuetena ma mafai ona malamalama ia te ia.

Ina ua uma lana tatalo, na ia tepa a'e i luga. Sa leai lava se tasi o faatalitali mo ia. Ae ona vaaia loa se aiga Siamani sa ia iloaina mai le nofoaafi. Na gego mai le Tina ia te ia e mulimuli atu ia te i latou. A o tagi lava, na uu mai e Anna lana ato ma taumalua atu i o latou tua.

Sa ia mulimuli ia i latou i le faitotoa i saute o le poloka o le Lotoa o le Malumalu. Sa ia tilotilo atu i le nofoaga lea ua fausia ai le malumalu fou matagofie. Na faafuasei lava ona faalogoina e Anna se savali faatope-tope e latalata ane. Sa nanati ane ia i latou se tamaitai, ma vaavaai ma le totoa i tagata malaga uma ua taunuu mai. Na pasi lana vaai i le aiga Siamani. Ona tu lea ia

Anna. Ina ua tepa ae Anna i luga, sa tu le fafine ma sioa atu. Na sioa atu i ai foi Anna, ma se faamoemoe na tupuga ae ia te ia.

Sa iloa e Anna o ia! O lona faiaoga o le Aoga Sa na malaga i Iuta i le na o se tausaga talu ai! Sa ia iloina o ia!

Sa opo mau mai e le faiaoga Anna i ona lima. Sa ia soloiaese loimata o Anna ma musumusu atu ai i le Faasuetena, “Sa fafagu pea lava pea au i luga. O ata o tagata malaga na taunuu mai na faatumulia ai lo’u mafaufau. Na le mafai ona ou toe foi e moe. Sa uunaia au e sau i le malumalu e vaai pe na i ai se tasi ou te masani ai iinei.” Sa ia uu le lima o Anna, ma taitaiina atu o ia i le auala. “Sau loa ta o.”

Mulimuli ane, na iloa ai e Anna o le uso o tina ma lona toalua ua siitia ese mai i Sate Leki ma la te lei maua le tusi a lona tina. Na auina e lona faiaoga le tala ia te i laua, ma la o mai ai e piki atu Anna i le faaso mulimuli ane. Na iu lava ina mafai e Ida ma Anna ona aumai foi Tina i Amerika.

Ae mo le taimi nei, sa leai se tasi o na mea taua. A o savalivali atu Anna i le fale a lona faiaoga, sa ia mafaufau, “E tele atu *nisi* mea na fai e Tama Faalelagi nai lo le tali mai i la’u tatalo. Na ou ole atu mo se tasi e mafai ona malamalama ia te au, ma na Ia auina mai se tasi ou te *iloa*.” ■

E alala le tusitala i Arisona, ISA.

SUE TOA O LOU AIGA

.....
Fai atu i ou matua po o matua o matua e tau mai tala e uiga i lou aiga. E te ono mafai ona iloa se tagata toa mai lou aiga i le taimi ua tuana!



E Tali Mai Le Tama Faalelagi i Au Tatalo



Saunia e George R., 9 tausaga,
New Mexico, ISA

Ua tele taimi na faafofoga ma tali mai ai le Tama Faalelagi i au tatalo. O lou manatuaga muamua i le tupu ai o lenei mea ina ua fa ou tausaga. Na leiloa ia te au ia poloka sa ou manao ou te taalo ai. O lea sa ou alu ai i lo'u potu ma tootuli e tatalo. Sa ou ole atu i le Tama Faalelagi e fesoasoani mai ia ou maua au meataalo. Sa vave ona tali mai la'u tatalo—sa ou maua ia poloka i le potu na sosoo ai.

O se tasi o taimi aupito sili ona taua sa tali mai ai sau tatalo o le taimi a o ou faatasi ma lo'u aiga atoa. I ni nai masina talu ona uma le misiona a lo'u tausoga o Kerisiano, sa ia aveina se taavale i le leva o le po i luga o se auala vanu i luga o

le mauga. Sa fetoi ai lana [taavale] ma se isi [taavale]. Sa manuia le isi avetaavale, ae sa ave lou tausoga i le falemai e se helikopa.

Sa i ai ia Kerisiano ni manu'a tuga i lona tino atoa. Sa koma o ia, ma e le'i manatu fomai o le a ia ala mai. Sa filifili lo matou aiga e anapopogi. Na feauaua'i ou matua, tuafafine, matua matutua, fafine o le aiga, tamaloloa o le aiga, ma o'u tausoga uma e anapopogi mo Kerisiano. Sa ou anapogi i se aso o le aoga. Na tatau ona ou faamalamalama atu i lou faiaoga ma tamaiti o le vasega le mafuaaga sa ou le ai ai i le malologa o lena aso. Sa ou le popole tele e

alu e aunoa ma ni meaai mo se aso aua na ou anapogi mo lo'u tausoga.

Na tali mai e le Tama Faalelagi a matou tatalo, ma na iu ai ina ala mai Kerisiano mai i lona koma. E le'i toe maua e ia lona tomai atoatoa, ae o loo ia faasolosolo manuia. Ou te iloa o Kerisiano e umi se taimi e manuia ai o ia. O loo matou tatalo pea mo ia. E mafai ona faia soo se mea faatasi ai ma le fesoasoani a le Tama Faalelagi. ■

FESILI MO OE

O a ni mea e te manaomia ai le fesoasoani? la manatua e talanoa ma le Tama Faalelagi!

Mulimuli Mai, ia te Au

(Ua Faafaigofie)

Upu na tusia e John Nicholson
Fati na saunia e Samuel McBurney

Loto Maulalo ♩ = 69-76

C F C F C

1. "Muli - mu - li mai i - a te a'u."
2. "Muli - mu - li mai i - a te a'u."
3. Pe na - 'o le nei o - la - ga ea,
4. Fa'a - ta - 'i ta - 'i i - a te ia,

A7 Dm G C

Le fe - ta - lai - ga a le - su.
U - pu fai - go - fie, mo - ni, pa - 'ia
Ta - tou te fai ai o le nei mea?
I le o - la - ga nei ma - fa - tia.

Cm Gm D7 G

Na - 'o lea ta - tou te ta - si ai,
O a - fi - o - ga mu - su - ia.
Le - ai, e ta - tau fo'i i lu - ga,
A ma - vae a - tu ma tu - 'ua.

G7 C D7 G7 C

Ma le Alo o le Ma - tai.
Ma - fau - fau - ga e ua o - 'o - tia.
I na o - la - ga e pa - 'ia.
Ta - tou ma - fu - ta ma le A - tua.

© 2015 Puletaofia e le Intellectual Reserve, Inc. Ua taofia aia tatau uma.
E mafai ona kopiina lenei pese mo le faaogaina mo gaoioga laiti e le saili tupe i le lotu ma le fale.
E tatau ona i ai lenei faaaliga i kopi uma e fai.

O Le Faataoto i Taleni

Saunia e Jean Bingham

Na faamatala e Iesu se tala, po o se faataoto, e uiga Ni se alii na tuuina atu ni tupe i ni tagata se toatolu o e sa faigaluega mo ia. Ona alu ese lea o le alii. A o alu ese atu o ia, o tagata e toalua sa galulue malolosi ma faaoga a laua tupe e maua mai ai nisi tupe e tuuina atu i le alii. Ae o le tagata e toatasi na ona tanu lava o lana tupe aua sa fefe o ia ina nei leiloa. Ina ua toe foi mai le alii, na ia tuuina atu ni tau ia i laua na faateleina tupe sa ia tuu atu ia te i laua. Ae sa ia aveese le tupe mai le tagata na te le'i taumafai e faateleina. (Tagai Mataiao 25:14–29.)

E pei o le tagata i le faataoto, ua tuuina mai e le Tama Faalelagi ia i tatou taitoatasi nisi o mea e taua tele—e le o tupe, ae o tomai faapitoa po o taleni, e pei o pesepesega, faaalua o le alofa, o le tamoe, po o le fesoasoani atu i isi. E pei o tagata o loo i le faataoto, e tataua ona e galue malosi ina ia tuputupu ae lau taleni!

E mafai faapefea ona e mulimuli i aoaoga a Iesu e ala i le faaogaina ma le faaleleia o au taleni? E mafai ona e lagonaina le fiafia tele ma fesoasoani atu i isi pe a e faia. ■

E alala le tusitala i Iuta, ISA.

AOAO ATILI

O se taleni o se tomai faapitoa, e pei o se taleni mo le tusi ata. Ae i le taimi o Iesu, o le upu *taleni* o lona uiga o se aofaiga o tupe e taua tele. E faapefea ona tutusa nei ituaiga o taleni e lua?



Fuafua se faaaliga e faasoa atu ai au taleni.

1. Tuu atu i tagata taitasi o le aiga e faasoa mai se mea latou te lelei ai, e pei o le faitauina leotele, tao se meaai manaia, faatinoina o se vaega o le musika, ta'u atu se tala malie, faia o se tagafiti, pe faasoa atu se ataata fiafia.
2. A o taitasi ma faamaea le faasoaina atu o se taleni, tuu atu i isi tagata o le aiga e ta'u mai se mea lelei ua latou matauina e uiga i lena tagata.
3. Mo le taumafataga mama, tuu faatasi fualaauaina e sili ona fiafia i ai tagata taitoatasi ina ia faia ai se salati fualaauaina manaia!

TALANOAGA I LE AIGA

Fesoasoani i tagata taitoatasi o le aiga e ta'u mai ia le itiiti ifo ma le tasi se taleni o loo ia te ia. E mafai faapefea ona e fesoasoani i le tasi ma le isi ina ia tuputupu ae au taleni? Talanoa e uiga i le auala e faaoga ai au taleni e fesoasoani ai i isi ma faaali atu i le Tama Faalelagi lou loto faafetai. Lu'i tagata o le aiga e saili mo taleni a le tasi ma le isi ma faasoa atu se faamalo faamaoni i aso taitasi.

Pese: " 'Foai,' O si Auvai Lea " (*Tusi Pese a Tamaiti*, 116)

Mau: Mataupu Faavae ma Feagaiga 46:11

Vitio: Alu i le Biblevideos.org e matamata ai i le "The Parable of the Talents"

Faasoa
Mai **LAU**
Taleni!

Nofoaga: _____

Aso: _____

Taimi: _____

Aumai se fasi fualaauaina e fesoasoani e faia ai le taumafataga mama!

E mafai ona e lolomiina nisi valaaulia i le liahona.lds.org.

MOTUGAAFA O TUSITUSIGA PAIA

O le faatinoina o se tala faatusitusiga paia o se auala malie lea e aoao atili ai e uiga i ai.

1. Tofi se tasi e faatino ia vaega taitasi o i le tala. E mafai ona e faaogaina ni toniga faigofie ma fesoasoaniga e pei o ofutaele po o tupe pepa siliva.
2. Tuu atu i se tasi e faitau le tala, ma taofi i fuaiupu taitasi ina ia mafai ona faatino e le au faatino [tala] mea sa faatoa faitauina.
3. Toe faatino le tala ina ia tofu tagata uma ma se avanoa.


O LA TATOU ITULAU



SA OU TATALO INA IA ILOA LE MEA E FAI

A o ou i ai i le vasega tolu, sa faia sa matou pati e faamanatu ai le faaiuga o le tausaga. O tagata uma na tauaia vai, feei, ma tautatala i upu leaga. Sa ou le maua se lagona lelei i le mea na tupu, o lea sa ou faia ai se tatalo ma na fesoasoani mai le Agaga Paia ia lelei ou lagona ma iloa le mea e fai. Sa ou laa ese mai tagata uma ma alu atu i se isi potu. Sa ou lagona ai le saogalemu ma maua ai se lagona mafanafana i totonu.

Cristina V., 11 tausaga, lurukuei



O Le Tusi a Mamona e moni. O le afioga ia a le Atua. Ou te fiafia e faitau i ai aua e ta'u mai ai tala ma aoaoga a perofeta.

Z. Pei-chen, 7 tausaga, Taiuani



Ou te fiafia i le tala e uiga i le vaa o Noa i le Tusi Paia, ma ou te fiafia e tusitusi, vali, taalo, ma faaalu se taimi ma lo'u aiga. O lo'u ata tusi lea o le Malumalu o Katelani.


Leonardo G., 7 tausaga, Venesuela



Joaquin V., 9 tausaga, Kalefonia, ISA


Kata o Malumalu

Oti ese le itulau lenei, faapipii i se pepa malo, ma oti ese ia kata.
Alu i le liahona.lds.org e lolomi nisi kopi o le kata ma maua ai kata mo isi malumalu.



Kyiv Lukureini

Na faapaiaina i le aso 29 o Aokuso, 2010,
e Perisitene Thomas S. Monson




San Salvador El Salvador

Na faapaiaina i le aso 21 o Aokuso, 2011,
e Perisitene Henry B. Eyring




Quetzaltenango Kuatemala

Na faapaiaina i le aso 11 o Tesema, 2011,
e Perisitene Dieter F. Uchtdorf




Kansas City Misuri

Na faapaiaina i le aso 6 o Me, 2012,
e Perisitene Thomas S. Monson




Manaus Pasila

Na faapaiaina i le aso 10 o Luni, 2012,
e Perisitene Dieter F. Uchtdorf




Brigham City Iuta

Na faapaiaina i le aso 23 o Setema, 2012,
e Perisitene Boyd K. Packer




Calgary Alberta

Na faapaiaina i le aso 28 o Oketopa, 2012,
e Perisitene Thomas S. Monson



Tegucigalpa Honduras

Na faapaiaina i le aso 17 o Mati, 2013,
e Perisitene Dieter F. Uchtdorf



Gilbert Arisona

Na faapaiaina i le aso 2 o Mati, 2014,
e Perisitene Thomas S. Monson

O A Mea Tatou Te Faia I LE MALUMALU?

Saunia e Carolyn Colton

O le malumalu o le maota o le Alii. Pe a tatou ulu atu i totonu, tatou te lagona le latalata i le Tama Faalelagi ma Iesu Keriso. E mafai ona tatou lagonaina le Agaga Paia. I le malumalu, tatou te auai i *sauniga* paia, e pei o papatisoga. Tatou te faia foi ni folafolaga faapitoa, po o *feagaiga*, ma le Tama Faalelagi. E mafai ona tatou fesoasoani e tuuina atu ia i latou o e ua maliliu le avanoa e talia ai le talalelei. O le a avea ma se aso faapitoa pe a e alu i totonu mo le taimi muamua! ■



VAI PAPATISO

A atoa lo tatou 12, e mafai ona tatou papatiso mo tagata o e ua maliliu ae le'i papatisoina. E faalagolago le faatanoa i luga o povi e fai ma sui o ituaiga e sefululua o Isaraelu.

POTU SELESITILA

E matagofie le potu selesitila! E faamanatu mai ai ia i tatou le auala o le filemu ma le fiafia o le a tatou oo i ai pe a tatou ola faatasi ma le Tama Faalelagi ma Iesu Keriso i se aso.

TALIMATAU OGATOTONU MAMAO SAJINIA E SUMMER RACHAEL DERRICK, ATA NA TUSIA E BRADLEY CLARK



A atoa lou 12, e mafai ona e feiloai ma lou epikopo ina ia maua lau oe lava pepa faataga o le malumalu. Ona mafai lea ona e alu i le malumalu e faia papatisoga.



POTU O LE FAAMAUGA
I potu faapenei, e mafai ona faamauina faatasi ai aiga mo le faavavau. O lona uiga e mafai ona latou nonofo faatasi o se aiga e faavavau—e le na o lenei olaga.



*O le malumalu o le maota o le Atua.
 O se nofoaga o le alofa ma le matagofie.
 O le a ou saunia a o ou laitiiti;
 O lo'u tiute paia.
 ("Ou Te Fia Vaai i le Malumalu," Tusipese a Tamaiti, 99).*

Mo ata o malumalu i le lalolagi atoa, asiasi i le temples.lds.org ma kiliki i le "Gallery."

ATA NA PUJUNA O LE POTU SELESITILA O LE MALUMALU O OGDEN IUITA, VAI PAPATISOGA, POTU O LE SAUNIGA, POTU O LE FAAMAUGA



POTU O LE SAUNIGA
I potu faapenei, tatou te aoao ai e uiga i le fuafuaga a le Tama Faalelagi mo i tatou, ma tatou te osia feagaiga o le a mafai ai ona tatou toe nonofo faatasi ai ma ia. Tatou te aoao e uiga i le Foafoaga o le lalolagi, e uiga ia Atamu ma Eva, ma e uiga ia Iesu Keriso. Tatou te aoao foi e uiga i faamanuiaga o le a tatou maua i le olaga a sau pe a tatou faamaoni.

Ou Te Alu I Ai i Se Aso

Saunia e Mary N., 12 tausaga, Maryland, ISA

I na ua toeitiiti atoa lou 12, sa ou matuai fiafia lava e alu i le malumalu. Sa matou talanoa ma lou aiga pe faapei le i ai i totonu, ma sa ou tilotilo foi i ata o totonu o se malumalu.

I ni nai vaiaso ae ou te le'i alu e fai papatisoga o le malumalu, sa fai e lo'u aiga se afiafi faaleaiga faapitoa. Ma matou faalogologo i tala maoae e uiga i nisi o o matou tuaa ma aoao e uiga i nofoaga sa nonofo ai pe na faapei o latou olaga. Sa ou iloa foi o le tama o le tama o le tama matua o lou tina sa taia i le feemo o uila ma na sao mai ai! O nisi o o'u tuaa e o mai mai Egelani, o lea sa matou valiina ai ma o'u tei laiti ia ata o le tagavai o Egelani. Sa ou lagonaina e pei na ou faia se vaega itiiti o le sootaga i ou tuaa.

Sa matagofie totonu o le malumalu e pei lava o fafo o le malumalu. Sa agalelei tagata uma na i ai, ma sa i ai se agaga mafanafana ma le filemu iina. Sa ese lava nai lo se isi lava mea na ou lagonaina muamua. Sa lelei atoatoa mea uma. Na aumai e le uso o lou tina ia igoa o nisi o tagata o le aiga e lei

papatisoina. A o matou faatalitali, sa matou vaai faalemafau ma lou tina ma le uso o lou tina i nei tamaitai pe na faapei a o ola ai i le lalolagi i le 300 tausaga talu ai. Sa faapitoa lava le i ai o lo'u tama e papatiso au mo i latou.

O le vaaia o tagata uma o laei papae na ou lagona ai e pei o siomia au e ni agelu. O le malumalu na pei o le lagi i le lalolagi. ■



MOTUGAAFA E 5 MO LAU ASIASIGA MUAMUA I LE MALUMALU

Talanoa i se matua po o se faiaoga e uiga i mea e faamoemoeina.

Tagai i ata o potu i totonu o le malumalu.

Faatulaga se taimi ma lou epikopo ina ia maua ai lau pepa faataga. O le a ia talanoa ia te oe e uiga i lau molimau ma e uiga i le tausia o poloaiga.

Saili e uiga i ou lava tuaa. Afai e mafai, ia saili se tuaa e mafai ona e papatiso e sui ai! Asiasi i le FamilySearch.org ina ia aoao atili ai.

Tatalo mo le Agaga Paia e faatasi ma oe.

Ona olioli ai lea i lau asiasiga muamua i le malumalu!



Saunia e Elder Neil L. Andersen

O Le Korama a Apo-
setolo e Toasefululua

*O sui o le Korama a
Aposetolo e Toasefu-
lulua o ni molimau
faapitua a Iesu Keriso.*

E faapei pe afai ou te alu i totonu o le malumalu?



O le a e aoao e uiga i le Fofoaga o le lalolagi.



O le a e aoao e
uiga i lo tatou
Faaola, o Iesu
Keriso.



O le a faatoilalo
e le filemu o
le Faaola ia ou
popolega ma
mea e fefe ai.



O le a e maua
se lagona o le
faapaiaina.



O le a fesoa-
soani ia te oe
e tu malosi pe
a faigata le
olaga.



Saunia e Peresitene
James E. Faust
(1920–2007)

Fesoasoani Lua i le
Au Peresitene Sili

O TAMAI MAMOE MA LEOLEO MAMOE

Sa fefe si au uo laitiiti i le afa, ma sa mafai ona ou lagonaina lana tagi mai.

A o o'u ititi lava, sa maua ai e lou tama se tamai mamoe ua se i le toafa. O le lafu mamoe e i ai le tina o lenei tamai mamoe ua o ese, ma o lea na se ese mai ai loa le tamai mamoe lea mai lona tina ma sa leiloa foi e le leoleo mamoe ua leiloa. Talu ai o le a le mafai ona ola lenei tamai mamoe i le toafa, o lea na aumai ai loa e lo'u tama i lo matou aiga. O le tuu ai o le tamai mamoe i le toafa o lona uiga o le a tele se avanoa e mate ai, a le faa-tamaiaina e luko po o le fia 'ai foi aua e manaomia le suasusu ona e laitiiti tele. E ta'ua e nisi o leoleo mamoe nei tamai mamoe o "[mamoe] tafaovale." Na tuuina mai ia te au e lo'u tama le tamai mamoe ma avea ai au ma ona leoleo mamoe.

Mo ni nai vaiaso, sa ou faamafanafanaina ai le susu povi i totonu o le fagususu ma fafaga ai le tamai mamoe. Sa vave ona avea i maua o se uo. Sa ou faaigoaina ia Nigh—ou te leiloina pe aisea. Sa amata ona tupu. Ma te taaalo lava ma la'u tamai mamoe i luga o le mutia. O nisi taimi e ma te taoto faatasi ai i luga o le mutia ma ou aluga ai i luga o



lona tino taifulufulua ma vaavaai i le vanimonimo lanu moana ma ao mafafia papae. Ou te le lokaina la'u tamai mamoe i le ao. E le mafai ona sola ese. Sa vave ona iloa ona 'ai le mutia. Na mafai ona ou valaauina la'u tamai mamoe mai soo se vaega o le matou fanua i lo'u faataitaiina lea o le tagi a le mamoe i le lelei ou te mafaia: *Baa. Baa.*

O se tasi po na agi ai se afa matautia. Sa galo ia te au ona tuu la'u tamai mamoe i totonu o le pa, o se mea sa tatau ona ou faia. Sa ou alu i lou moega. Sa fefe si au uo i le tetele o le afa ma sa ou lagonaina lona tagi mai. Sa ou iloa sa tatau ona ou fesoasoani i la'u fagafao, ae sa ou manao foi au ia ou te saogalemu, mafanafana, ma mago i luga o lo'u moega. Ou te le'i nofo i luga e pei ona sa tatau ona ou faia. Ina ua malama le taeao, sa ou alu atu ai i fafo ma ou iloina lau tamai

mamoe ua pe. Na faalogoina foi e se taifau lana tagi mai ma alu atu loa ma faaumatia o ia. Sa ou matuai faanoanoa lava. Sa le avea au o se leoleo mamoe lelei poo se taitai e faatuatuaina e lou tama. Sa faapea mai lo'u tama, "Atalii, pe le mafai ea ona ou faatuatuaina oe e tausii nao se tamai mamoe e tasi?" Sa sili atu ona tiga faa-matalaga a lou tama ia te au nai lo le toesea o si au uo taifulufulua. Sa ou tautino ai lava i lea aso ao ou laitiiti, o le a ou taumafai e aua lava nei ou toe faatamala i lou tiute o se leoleo mamoe pe afai ae toe tuuina mai ia te au lena tofiga. . . .

Ua silia nei ma le onosefulu tausaga, o loo mafai pea ona ou lagonaina i lo'u mafaufau le tagi mai i le fefe o la'u tamai mamoe lea sa ou le'i leoleoina lelei a'o ou laitiiti. O loo mafai foi ona ou lagonaina pea upu alofa a lo'u tama: "Atalii, pe le mafai ea ona ou faatuatuaina oe e tausii nao se mamoe e tasi?" Pe afai o i tatou e le o ni leoleo mamoe lelei, ou te fia iloa pe o le a se tatou faalagona i le faavavau. ■

Mai ia James E. Faust, "Tiutetauave o Leoleo Mamoe," Liahona, Iulai, 1995, 52, 54.

MALAMALAMAAGA



O le aiga o Rasolo o Madagascar o ni paionia i lo latou nuu maotua.

Ae faapefea pe afai e leai ni ou tuaa paionia?

“Ou te alofa ma faamamalu i le faatuatua ma le lototele o na paionia i le popofou o le Ekalesia. O le taimi lena sa va i vasa le mea sa nonofo ai o’u augatama. E leai se tasi o i latou sa nofo faatasi ma i latou sa aumau i Navu po o Uinita Kuota, e leai foi se tasi o i latou sa laasia laufanua valevalenoa i se faigamalaga. Peitai, i le avea ai o se tagata o le Ekalesia, ou te avea ma le lotofaafetai ma le mitamita lenei talatuu o paionia o sa’u lava talatuu.

“Faatasi ai ma lena lava olioli, ou te aveina foi mo’u ia talatuu o paionia o le Ekalesia i ona po nei, o e o loo aumau i atunuu uma, o a latou tala foi o le tutumau, faatuatua, ma taulaga ua faapoopo atu ai fuaiupu viia fou i le tali o le vii o le malo o le Atua i aso e gata ai.”

E I Ai Foi i le Lomiga Lenei

MO TALAVOU MATUTUA

FAATUMUINA I LE OLA & MALOSI

O se tasi lenei o mausa e mafai ona e amataina ina ia maua ai le soifua maloloina sili atu, tele atu le malosi, ma musumusuga sili atu.



i.42

MO LE AUTALAVOU

i.52



UA SAUNIA MO LE MAUAINA O LE **PERISITUA MEKISATEKO?**

O nei aoaoga mai taitai o le Ekalesia o le a fesoasoani e te malamalama atili ai i le uiga moni o le tautoga ma le feagaiga o le perisitua.

MO TAMAITI

O Le Malaga a Anna

Ina ua alu ese atu Anna mai le nofoaafi i Amerika, sa na o ia lava ma sa leai se tasi e malamalama i lana gagana. Ae ona ia manatuaina loa le faamanatu a lona tina e faafofoga mai i taimi uma le Tama Faalelagi ma malamalama i a tatou tatalo.



i.66



SAMOAN

O LE EKALESA A
IESU KERISO
O LE AU PA'IA O ASO
E GATA AI